


南史

冊四



南史卷十八

唐 李 延 壽 撰

列傳第八

趙倫之 子伯符

蕭思話

子惠開 惠明 惠基 子洽

惠明子眎素 惠明弟惠基

惠休 惠休弟子介

惠明弟惠基 介

子允 惠開從子琛

臧燾

玄孫嚴 燾弟燾

嚴族叔未甄 燾子質

未甄子盾

厥

厥

厥

厥

厥

趙倫之字幼成下邳僮人宋孝穆皇后之弟也幼孤貧事母以孝稱宋武帝起兵以軍功封闔中縣五等侯累遷雍州刺史武帝北伐倫之遣順陽太守傅弘之扶風太守沈田子出嶢柳大破姚泓於藍田及武帝受命以佐命功封霄城縣侯少帝即位徵拜護軍元嘉三年拜領軍將軍倫之雖外戚貴寵而居身儉素性野拙澀於人間世事多所不解久居方伯公私富貴入為護軍資力不稱以為見貶光祿大夫范泰好戲笑謂曰司徒公缺必用汝老奴我不言汝資地所任要是外戚高秩次第所至耳倫之大喜每載酒肴詣泰五年卒諡元侯子伯符嗣

伯符字潤遠少好弓馬爲寧遠將軍總領義徒以居宮城北每火起及有劫盜輒身貫甲冑助郡縣赴討武帝甚嘉之文帝卽位累遷徐兗二州刺史爲政苛暴吏人畏懼如與虎狼居而劫盜遠迸無敢入境元嘉十八年徵爲領軍將軍先是外監不隸領軍宜相統攝者自有別詔至此始統領焉後爲丹陽尹在都嚴酷曹局不復堪命或委叛被錄投水而死典筆吏取筆失旨頓與五十鞭子倩尙文帝第四女海鹽公主甚愛重倩嘗因言戲以手擊主事上聞文帝怒離婚伯符慚懼發病卒諡曰肅傳國至孫勗齊受禪國除

蕭思話南蘭陵人宋孝懿皇后弟子也父源之字君流歷徐兗二州刺史永初元年卒贈前將軍思話十歲許時未知書好騎屋棟打細箚鼓侵暴隣曲莫不患毒之自此折節數年中遂有令譽頗工隸書善彈琴能騎射後襲爵封陽縣侯元嘉中爲青州刺史亡命司馬朗之兄弟聚黨謀爲亂思話遣北海太守蕭汪之討斬之八年魏軍大至乃棄鎮奔平昌魏軍定不至由是徵繫尙方初在青州常用銅斗覆在藥廚下忽於斗下得二死雀思話歎曰斗覆而雙雀殞

其不祥乎既而被繫及梁州刺史甄法護在任失和氏帥楊難當因此寇漢中乃自徒中起思話爲梁南秦二州刺史平漢中悉收侵地置戍葭萌水思話遷鎮南鄭法護中山無極人也過江寓居南郡弟法崇自少府爲益州刺史法護委鎮之罪爲府所收於獄賜死文帝以法崇受任一方命言法護病卒文帝使思話上定漢中本末下之史官十四年遷臨川王義慶平西長史南蠻校尉文帝賜以弓琴手敕曰前得此琴言是舊物今以相借并往桑弓一張理材乃快良材美器宜在盡用之地丈人真無所與讓也嘗從文帝登鍾山北嶺中道有盤石清泉上使於石上彈琴因賜以銀鍾酒謂曰相賞有松石間意歷寧蠻校尉雍州刺史監四州軍事徵爲吏部尙書思話以去州無復事力倩府軍身九人文帝戲之曰丈人終不爲田父於閭里何憂無人使邪未拜遷護軍將軍是時魏攻懸瓠文帝將大舉北侵朝士僉同思話固諫不從魏軍退卽代孝武爲徐兗二州刺史監四州軍事後爲圍碣磔城不拔退師歷下爲江夏王義恭所奏免官元凶弒立以爲徐兗二州刺史卽起義以應孝武孝武卽位徵爲尙書

左僕射固辭改爲中書令丹陽尹散騎常侍時都下多劫掠二旬中十七發引咎陳遜不許後拜郢州刺史加都督卒贈征西將軍開府儀同三司謚曰穆侯思話外戚令望早見任待歷十二州杖節監督者九焉所至雖無皎皎清節亦無穢黷之累愛才好士人多歸之

長子惠開少有風氣涉獵文史家雖貴戚而居服簡素初爲祕書郎意趣與人多不同比肩或三年不共語外祖光祿大夫沛郡劉成戒之曰汝恩戚家子無多異以取天下之疾轉太子舍人與汝南周朗同官友善以偏奇相尙孝建元年爲黃門侍郎與侍中何偃爭推積射將軍徐冲之事偃任遇甚隆怒使門下推彈惠開乃上表解職由此忤旨別敕有司以屬疾多免之思話素恭謹與惠開不同每加嫌責及見惠開自解表歎曰兒不幸與周朗周旋理應如此杖之二百尋除中庶子丁父艱居喪有孝性家素事佛凡爲父起四寺南岡下名曰禪岡寺曲阿舊鄉宅名曰禪鄉寺京口墓亭名曰禪亭寺所封封陽縣名曰禪封寺謂國僚曰封秩鮮而兄弟甚多若全關一人則在我所讓若人人等分又

事可悲恥寺衆旣立自宜悉供僧衆襲封封陽縣侯爲新安王子鸞冠軍長史
惠開妹當適桂陽王休範女又當適孝武子發遣之資應須二千萬乃以爲豫
章內史聽其肆意聚納由是在郡著貪暴之名再遷御史中丞孝武與劉秀之
詔曰今以蕭惠開爲憲司冀當稱職但一往眼額已自殊有所震及在職百僚
憚之後拜益州刺史路經江陵時吉翰子在荊州共惠開有舊爲設女樂樂人
有美者惠開就求不得又欲以四女妓易之不許惠開怒收吉斬之卽納其妓
啓云吉爲劉義宣所遇交結不逞向臣訕毀朝政輒已戮之孝武稱快惠開素
有大志至蜀欲廣樹經略善於敘述聞其言者皆以爲大功可立才疎意廣竟
無成功嚴用威刑蜀人號曰臥虎明識過人嘗三千沙門一閱其名退無所失
明帝卽位晉安王子勛反惠開乃集將佐謂曰吾荷世祖之眷當投袂萬里推
奉九江蜀人素怨惠開嚴及是所遣兵皆不得前晉原郡及諸郡悉應並來圍
城城內東兵不過二千凡蜀人惠開疑之悉皆遣出子勛尋敗蜀人並欲屠城
以望厚賞明帝以蜀土險遠赦其誅責遣其弟惠基使蜀宣旨而蜀人志在屠

城不使王命速達，遏留惠基，惠基破其渠帥，然後得前。惠開奉旨歸順，城圍得解。明帝又遣惠開宗人寶首、水路慰勞益州。寶首欲以平蜀爲功，更獎說蜀人處處蜂起。惠開乃啓陳情事，遣宋寧太守蕭惠訓、州別駕費欣業分兵並進，大破之。禽寶首，送之。惠開至都，明帝問其故。侍衛左右莫不悚然，側目惠開舉動。自若。從容答曰：「臣唯知逆順，不識天命。又云：非臣不亂，非臣不平。初，惠開府錄事參軍劉希微負蜀人責，將百萬爲責主。所制未得，俱還。惠開與希微共事，不厚。而廐中凡有馬六十疋，悉以乞希微償責。其意趣不常如是。惠開還資二千餘萬，悉散施道俗，一無所留。後除桂陽王休範征北長史、南東海太守。其年會稽太守蔡興宗之郡，惠開自京口請假還都，相逢於曲阿。惠開先與興宗名位略同，又經情款，自以負釁，摧屈慮興宗不能詣己。戒勒部下蔡會稽部伍若問，慎不得答。惠開素嚴，部下莫敢違。興宗見惠開舟力甚盛，遣人訪訊事力。二三百人皆低頭直去，無一人答者。尋除少府加給事中。惠開素剛，至是益不得志。曰：大丈夫入管喉舌，出葢方伯，乃復低頭入中邪寺內所住齋前，嚮種花草甚。

美惠開悉剷除別種白楊每謂人曰人生不得行胸懷雖壽百歲猶爲夭也發病嘔血吐物如肝肺者卒子睿嗣齊受禪國除惠開與諸弟並不睦惠基使至益州遂不相見與同產弟惠明亦致嫌隙云

惠明其次弟也亦有時譽泰始初爲吳興太守郡界有卞山山下有項羽廟相承云羽多居郡聽事前後太守不敢上惠明謂綱紀曰孔季恭嘗爲此郡未聞有災遂盛設筵榻接賓數日見一人長丈餘張弓挾矢向惠明旣而不見因發背旬日而卒

子眎素梁天監中位丹陽尹丞初拜日武帝賜錢八萬眎素一朝散之親友遷司徒左西屬南徐州中從事性靜退少嗜慾好學能清言榮利不關於中喜怒不形於色在人間及居職並任情通率不自矜尙天然簡素及在京口便有終焉之志後爲中書侍郎在位少時求爲諸暨令到縣十餘日挂衣冠於縣門而去獨居屏事非親戚不得至其籬門妻卽齊太尉王儉女久與別居遂無子卒親故迹其事行諡曰貞文先生

惠明弟惠基幼以外戚見宋江夏王義恭歎其詳審以女結婚歷中書黃門郎
惠基善隸書及奕棋齊高帝與之情好相得桂陽王休範妃惠基姊也高帝謂
之曰卿家桂陽遂復作賊高帝頓新亭壘以惠基爲軍副惠基弟惠朗親爲休
範攻戰惠基在城內了不自疑後爲長兼侍中袁粲劉彥節起兵之夕高帝以
彥節是惠基妹夫惠基時直在省遣王敬則觀其指趣見惠基安靜不與彥節
相知由是益加恩信仕齊爲都官尙書掌吏部永明中爲侍中領驍騎將軍尙
書令王儉朝宗貴望惠基同在禮閣非公事不私覲焉遷太常加給事中自宋
大明以來聲伎所尙多鄭衛而雅樂正聲鮮有好者惠基解音律尤好魏三祖
曲及相和歌每奏輒賞悅不能已當時能棋人琅邪王抗第一品吳郡褚思莊
會稽夏赤松第二品赤松思速善於大行思莊戲遲巧於鬪棋宋文帝時羊玄
保爲會稽帝遣思莊入東與玄保戲因置局圖還於帝前覆之齊高帝使思莊
與王抗交賭自食時至日暮一局始竟上倦遣還省至五更方決抗睡於局後
寢思莊達旦不寐時或云思莊所以品第致高緣其用思深久人不能及抗思

莊並至給事中永明中敕使抗品棋竟陵王子良使惠基掌其事初思話先於曲阿起宅有閑曠之致惠基常謂所親曰須婚嫁畢當歸老舊廬立身退素朝廷稱爲善士卒贈金紫光祿大夫

子洽字宏稱幼敏悟年七歲誦楚辭略上口及長好學博涉善屬文仕梁位南徐州中從事近畿重鎮職更數千人前後居者皆致巨富洽清身率職饋遺一無所受妻子不免飢寒累遷臨海太守爲政清平不尙威猛人俗便之後拜司徒左長史敕撰當塗堰碑辭甚瞻麗卒於官文集二十卷行於世

惠基弟惠休齊永明四年爲廣州刺史罷任獻奉傾資上敕中書舍人茹法亮曰可問蕭惠休故當不復私邪吾欲分受之也後封建安縣子永元元年從吳興太守徵爲尙書右僕射吳興郡項羽神舊酷烈人云惠休事神謹故得美遷于時朝士多見殺二年惠休還至平望帝令服藥而卒贈金紫光祿大夫惠休弟惠朗同桂陽賊齊高帝赦之後爲西陽王征虜長史行南兗州事坐法免官惠朗弟惠蒨仕齊左戶尙書子介

介字茂鏡少穎悟有器識梁大同中武陵王紀爲揚州刺史以介爲府長史在職以清白稱武帝謂何敬容曰蕭介甚貧可以處一郡復曰始興郡頗無良守可以介爲之由是出爲始興太守及至甚著威德徵爲少府卿尋加散騎常侍會侍中闕選司舉王筠等四人並不稱旨帝曰我門中久無此職宜用蕭介爲之應對左右多所匡正帝甚重之遷都官尙書每軍國大事必先訪介帝謂朱异曰端右材也中大同二年辭疾致仕帝優詔不許終不肯起乃遣謁者僕射魏祥就拜光祿大夫太清中侯景於渦陽敗走入壽陽帝救助防韋黯納之介聞而上表致諫極言不可帝省表歎息卒不能用介性高簡少交游唯與族兄琛從兄眎素及洽從弟淑等文酒賞會時人以比謝氏烏衣之游初武帝總延後進二十餘人置酒賦詩臧盾以詩不成罰酒一斗盾飲盡顏色不變言笑自若介染翰便成文無加點帝兩美之曰臧盾之飲蕭介之文卽席之美也年七十三卒於家

第三子允字叔佐少知名風神凝遠通達有識鑒容止醞藉仕梁位太子洗馬

侯景攻陷臺城百僚奔散允獨整衣冠坐于宮坊景軍敬焉弗之逼也尋出居京口時寇賊縱橫百姓波駭允獨不行人問其故允曰性命自有常分豈可逃而免乎方今百姓爭欲奮臂而論大功何事於一書生哉莊周所謂畏景避迹吾弗爲也乃閉門靜處併日而食卒免於患陳永定中侯安都爲南徐州刺史躬造其廬以申長幼之敬宣帝卽位爲黃門侍郎晉安王爲南豫州以爲長史時王尙少未親人務故委允行府事入爲光祿卿允性敦重未嘗以榮利干懷及晉安出鎮湘州又苦攜允允少與蔡景歷善子徵修父黨之敬聞允將行乃詰允曰公年德並高國之元老從容坐鎮旦夕自爲列曹何爲方辛苦蕃外答曰已許晉安豈可忘信其恬榮勢如此至德中鄱陽王出鎮會稽允又爲長史帶會稽郡丞行經延陵季子廟設蘋藻之薦託異代之交爲詩以敘意辭理清典後主嘗問蔡徵允之爲人徵曰其清虛玄遠殆不可測至於文章可得而言因誦允詩以對後主嗟賞久之尋拜光祿大夫及隋師濟江允遷于關右時南士至長安者例皆授官允與尙書僕射謝伯辭以老疾隋文帝義之並厚賜帛

尋卒年八十四

珍做宋版印

弟引字叔休方正有器度性聰敏博學善屬文仕梁位西昌侯儀同府主簿侯景之亂梁元帝爲荊州刺史朝士多歸之引曰諸王力爭禍患方始今日逃難未是擇君之秋吾家再世爲始與郡遺愛在人政可南行以存家門耳乃與弟彤及宗親等百餘人南奔嶺表時始與人歐陽頎爲衡州刺史乃往依焉頎遷廣州病死子紇領其衆引疑紇異圖因事規正由是情禮漸疎及紇反時都下士人岑之敬公孫挺等並惶駭唯引怡然謂之敬等曰管幼安袁曜卿亦但安坐耳君子正身以明道直己以行義亦何憂乎及章昭達平番禺引始北還拜尙書金部侍郎引善書爲當時所重宣帝嘗披奏事指引署名曰此字筆趣翩翩似鳥之欲飛引謝曰此乃陛下假其毛羽耳帝又謂引曰我每有所忿見卿輒意解何也引曰此自陛下不遷怒臣何預此恩引性抗直不事權貴宣帝每欲遷用輒爲用事者所裁及呂梁覆師戎儲空匱轉引爲庫部侍郎掌知營造引在職一年而器械充足歷中書黃門吏部侍郎廣州刺史馬靖甚得嶺表人

心而甲兵精練每年深入俚洞數有戰功朝野頗生異議宣帝以引悉嶺外物情且遣引觀靖審其舉措諷令送質及至靖卽悟旨遣兄弟爲質後主卽位爲中庶子建康令時殿內隊主吳璉及宦者李善度蔡脫兒等多所請屬引一皆不許引始族子密時爲黃門郎諫引曰李蔡之權在位皆憚亦宜少爲身計引曰吾之立身自有本末亦安能爲李蔡致屈就令不平不過免職耳吳璉竟作飛書李蔡證之坐免官卒於家子德言最知名引弟彤位太子中庶子南康王長史

琛字彥瑜惠開從子也祖僧珍宋廷尉卿父惠訓齊末爲巴東相梁武帝起兵齊和帝於荊州卽位惠訓與巴西太守魯休烈並以郡相抗惠訓使子瓚據上明建康城平始歸降武帝宥之以爲太中大夫卒官琛少明悟有才辯數歲時從伯惠開見而奇之撫其背曰必與吾宗起家齊太學博士時王儉當朝琛年少未爲儉所識負其才氣候儉宴于樂游苑乃著虎皮靴策桃枝杖直造儉坐儉與語大悅儉時爲丹陽尹辟爲主簿永明九年魏始通好琛再銜命北使還

爲通直散騎侍郎時魏遣李彪來使齊武帝讌之琛於御筵舉酒勸彪彪不受
曰公庭無私禮不容受勸琛答曰詩所謂爾我公田遂及我私坐者皆悅服彪
乃受琛酒累遷尙書左丞時齊明帝用法嚴峻尙書郎坐杖罰者皆卽科行琛
乃密啓曰郎有杖起自後漢爾時郎官位卑親主文案與令史不異故郎三十
五人令史二十人是以古人多恥爲此職自魏晉以來郎官稍重今方參用高
華吏部又近於通貴不應官高昔品而罰遵曩科所以從來彈舉雖在空文而
許以推遷或逢赦恩或入春令便得息停宋元嘉大明中經有被罰者別由犯
忤主心非關常準自泰始建元以來未經施行事廢已久人情未習自奉敕之
後已行倉部郎江重欣杖督五十皆無不人懷慚懼兼有子弟成長彌復難爲
儀適其應行罰可特賜輸贖使與令史有異以彰優緩之澤帝納之自是應受
罰者依舊不行東昏初嗣立時議無廟見文琛議據周頌烈文閔予皆爲卽位
朝廟之典於是從之梁武在西邸與琛有舊梁臺建以爲御史中丞天監九年
累遷平西長史江夏太守始琛爲宣城太守有北僧南度唯齋一瓠蘆中有漢

書序傳僧云三輔舊書相傳以爲班固真本琛固求得之其書多有異今者而紙墨亦古文字多如龍舉之例非隸非篆琛甚祕之及是以書餉鄱陽王範獻于東宮後爲吳興太守郡有項羽廟土人名爲憤王甚有靈驗遂於郡廳事安牀幕爲神坐公私請禱前後二千石皆於廳拜祠以軛下牛充祭而避居他室琛至者履登廳事聞室中有叱聲琛厲色曰生不能與漢祖爭中原死據此廳事何也因遷之於廟又禁殺牛解祀以脯代肉琛頻莅大郡不事產業有闕則取不以爲嫌歷左戶度支二尚書侍中帝每朝讌接琛以舊恩嘗犯武帝偏諱帝斂容琛從容曰名不偏諱陛下不應諱順上曰各有家風琛曰其如禮何又經預御筵醉伏上以棗投琛琛乃取栗擲上正中面御史中丞在坐帝動色曰此中有人不得如此豈有說邪琛卽答曰陛下投臣以赤心臣敢不報以戰栗上笑悅上每呼琛爲宗老琛亦奉陳昔恩以早籴中陽夙忝同閤雖迷興運猶荷洪慈上答曰雖云早契闊乃自非同志勿談興運初且道狂奴異琛常言少壯三好音律書酒年長以來二事都廢唯書籍不衰而琛性通脫常自解竈事

畢餘餒必陶然致醉位特進金紫光祿大夫卒遺令諸子與妻同墳異藏祭以
蔬菜葬止車十乘事存率素乘輿臨哭甚哀謚曰平子琛所撰漢書文府齊梁
拾遺并諸文集數十萬言子遊位少府卿遊子密字士幾幼聰敏博學有文詞
位黃門郎太子中庶子散騎常侍

臧燾字德仁東莞莒人宋武敬皇后兄也少好學善三禮貧約自立操行爲鄉
里所稱晉太元中衛將軍謝安始立國學徐兗二州刺史謝玄舉燾爲助教晉
孝武帝追崇庶祖母宣太后議者或謂宜配食中宗燾議曰陽秋之義母以子
貴故仲子成風咸稱夫人經言考仲子宮若配食惠廟則宮無緣別築前漢孝
文孝昭太后並繫子爲號祭於寢園不配於高祖孝武之廟後漢和帝之母曰
恭懷皇后安帝祖母曰敬隱皇后順帝之母曰恭愍皇后雖不繫子爲號亦祭
於陵寢不配章安二帝此則二漢雖有太后皇后之異至於並不配食義同陽
秋唯光武追廢呂后故以薄后配高廟又衛后旣廢霍光追尊李夫人爲皇后
配武帝廟此非母以子貴之例直以高武二廟無配故耳又漢世立寢於陵自

是晉制所異謂宜遠準陽秋考宮之義近慕二漢不配之典尊號既正則罔極之情申別建寢廟則嚴禩之義顯繫子爲稱兼明母貴之所由一舉而允三義固哲王之高致也議者從之頃之去官以父母老家貧與弟熹俱棄人事躬耕自業約己養親者十餘年父母喪亡居喪六年以毀瘠著稱宋武帝義旗建參右將軍何無忌軍事隨府轉鎮南參軍武帝鎮京口參帝中軍軍事入補尚書度支郎改掌祠部襲封高陵亭侯時太廟鴟尾災燾謂著作郎徐廣曰昔孔子在齊聞魯廟災曰必桓僖也今征西京兆四府君宜在毀落而猶列廟饗此其徵乎乃上議曰臣聞國之大事在祀與戎將營宮室宗廟爲首古先哲王莫不致肅恭之誠心盡崇嚴乎祖考然後能流淳化於四海通幽感於神明固宜詳廢興於古典修情禮以求中者也禮天子七廟三昭三穆與太祖而七自考廟以至祖考五廟皆月祭之遠廟爲祧有二祧享嘗乃止去祧爲壇去壇爲墀有禱然後祭之此宗廟之次親疏之序也鄭玄以爲祧者文王武王之廟王肅以爲五世六世之祖尋去祧之言則祧非文武之廟矣文武周之祖宗何云去祧

爲壇乎明遠廟爲祧者無服之祖也又遠廟則有享嘗之降去祧則有壇墀之殊明世遠者其義彌疏也若祧是文武之廟宜同月祭於太祖雖推后稷以配天由功德之所始非尊崇之義每有差降也又禮有以多爲貴者故傳稱德厚者流光德薄者流卑又言自上以下降殺以兩禮也此則尊卑等級之典上下殊異之文而云天子諸侯俱祭五廟何哉又王祭嫡殤下及來孫而上祀之禮不過高祖推隆恩於下流替誠敬於尊廟亦非聖人制禮之意也是以泰始建廟從王氏議以禮父爲士子爲天子諸侯祭以天子諸侯其尸服以士服故上及征西以備六世之數宣皇雖爲太祖尙在子孫之位至於殷祭之日未申東向之禮所謂子雖齊聖不先父食者矣今京兆以上旣遷太祖始得居正議者以昭穆未足欲屈太祖於卑坐臣以爲非禮典之旨也所謂與太祖而七自是昭穆旣足太廟在六世之外非爲須滿七廟乃得居太祖也議者又以四府君神主宜永同於殷祫臣又以爲不然傳所謂毀廟之主陳乎太祖謂太祖以下先君之主也故白虎通云禘祫祭遷廟者以其繼君之體持其統而不絕也豈

如四府君在太祖之前非繼統之主無靈命之瑞非王業之基昔以世近而及今則情禮已遠而當長饗殷裕永虛太祖之位求之禮籍未見其可昔永和之初大議斯禮于時虞喜范宣並以洪儒碩學咸謂四府君神主無緣永存於百世或欲瘞之兩階或欲藏之石室或欲爲之改築雖所執小異而大歸是同若宣皇既居羣廟之上而四主禘祫不已則大晉殷祭長無太祖之位矣夫理貴有中不必過厚禮與世遷豈可順而不斷故臣子之情雖篤而靈厲之諡彌彰追遠之懷雖切而遷毀之禮爲用豈不有心於加厚顧禮制不可踰耳石室則藏於廟北改築則未知所處虞主所以依神神移則有瘞埋之禮四主若饗祀宜廢亦神之所不依也準傍事例宜同虞主之瘞埋然經典難詳羣言錯繆非臣淺識所能折中時學者多從熹議竟未施行宋武帝受命拜太常雖外戚貴顯而彌自沖約茅屋蔬飧不改其舊所得奉祿與親戚共之永初三年致事拜光祿大夫加金章紫綬卒少帝贈左光祿大夫長子邃宜都太守邃子凝之學涉有當世才與司空徐湛之爲異常交年少時與傅僧祐俱以通家子始爲文

帝所引見時上與何尚之論鑄錢事凝之便于其語次上因回與語僧祐引凝之衣令止凝之大言曰明主難再遇便應政盡所懷上與往復十餘反凝之辭韻詮序上甚賞焉後爲尚書左丞以徐湛之黨爲元凶所殺凝之子寅字士若事在沈攸之傳寅弟稜後軍參軍稜子嚴

嚴字彥威幼有孝性居父憂以毀聞孤貧勤學行止書卷不離手從叔未甄爲江夏郡攜嚴之官於途作屯游賦又作七算辭並典麗性孤介未嘗造請梁僕射徐勉欲識之嚴終不詣累遷湘東王宣惠輕車府參軍兼記室嚴於學多所諳記尤精漢書諷誦略皆上口王嘗自執四部書目試之嚴自甲至丁卷中各對一事并作者姓名遂無遺失王遷荊州隨府轉西中郎安西錄事參軍歷義陽武寧郡守郡界蠻左前郡守常選武人以兵鎮之嚴獨以數門生單車入境羣蠻悅服後卒於鎮南諮議參軍文集十卷

嚴族叔未甄燾曾孫也父潭左戶尚書未甄有才幹少爲外兄汝南周顥所知仕梁爲太尉長史丁所生母憂三年廬于墓側歷廷尉卿江夏太守卒子盾

盾字宣卿幼從徵士琅邪諸葛璩受五經璩學徒常有數十百人盾處其間無所狎比璩曰此生王佐才也爲尙書中兵郎美風姿善容止每趣奏梁武帝甚悅焉入兼中書通事舍人盾有孝性嘗隨父宿直廷尉府母劉氏在宅夜暴亡盾左手中指忽痛不得寢及旦宅信果報凶問其感通如此服未終父卒居喪五年不出廬戶形骸枯悴家人不識武帝累敕抑譬後累遷御史中丞性公強甚稱職中大通五年帝幸同泰寺開講設四部大會衆數萬人南越所獻馴象忽於衆中狂逸衆皆駭散唯盾與散騎侍郎裴之禮凝然自若帝甚嘉焉大同二年爲中領軍領軍管天下兵要監局事多盾爲人敏瞻有風力長於撥繁職事甚理先是吳平侯蕭景居此職著聲至是盾復繼之後卒於領軍將軍謚曰忠

盾弟厥字獻卿亦以幹局稱爲晉安太守郡居山海常結聚逋逃前二千石討捕不能止厥下車宣化凶黨皆襁負而出自是居人復業然政嚴百姓謂之臧彪前後再兼中書通事舍人卒於兼司農卿厥前後居職所掌之局大事及蘭

臺廷尉所不能決者悉以付厥辯斷精明咸得其理卒後有搗登聞鼓訴求付清直舍人帝曰臧厥既亡此事便無所付其見知如此子操尚書三公郎

熹字義和熹之弟也與熹並好經學隆安初兵起熹乃習騎射志立功名嘗與溧陽令阮崇獵遇猛獸突圍獵徒並散熹射之應弦而倒從宋武入京城進至建鄴桓玄走武帝便使熹入宮收圖書器物封府庫有金飾樂器武帝問熹卿欲此乎熹正色曰主上幽逼播越非所將軍首建大義劬勞王室雖復不肖實無情於樂帝笑曰聊以戲耳以建義功封始興縣五等侯參武帝車騎中軍軍事武帝將征廣固議者多不同熹贊成其行武帝遣朱齡石統大衆伐蜀命熹奇兵出中水領建平巴東二郡太守蜀主譙縱遣大將譙撫之屯牛脾又遣譙小苟重兵塞打鼻熹至牛脾撫之敗走追斬之成都平熹遇疾卒於蜀追贈光

祿勳

子質字含文少好鷹犬善蒲博意錢之戲長六尺七寸出面露口頰頂拳髮初爲世子中軍參軍嘗詣護軍趙倫之倫之名位已重不相接質憤然起曰大丈夫

夫各以老嫗作門戶何至以此中相輕倫之慚謝質拂衣而去後爲江夏王義恭撫軍參軍以輕薄無檢爲文帝所嫌徙給事中會稽長公主每爲之言乃出爲建平太守甚得蠻楚心歷竟陵內史巴東建平三郡太守吏人便之質年始出三十屢居名郡涉獵文史尺牘便敏有氣幹好言兵文帝謂可大任以爲徐兗二州刺史加都督在鎮奢凌爵命無章爲有司所紕遇赦與范曄徐湛之等厚善曄謀反量質必與之同會事發復爲義興太守二十七年遷南譙王義宣司空司馬南平內史未之職會魏太武帝圍汝南城主陳憲固守告急文帝遣質輕往壽陽與安蠻司馬劉康祖等救憲後太武率大衆數十萬劫彭城以質爲輔國將軍北救始至盱眙太武已過淮二十八年正月太武自廣陵北返悉力攻盱眙就質求酒質封漉便與之太武怒甚築長圍一夜便合質報太武書云爾不聞童謠言邪虜馬飲江水拂狸死卯年冥期使然非復人事寡人受命相滅期之白登師行未遠爾自送死豈容復令爾饗有桑乾哉假令寡人不能殺爾爾由我而死爾若有幸得爲亂兵所殺爾若不幸則生相鎖縛載以一驢

直送都市爾識智及衆豈能勝苻堅邪頃年展爾陸梁者是爾未飲江太歲未
卯故耳時魏地童謠曰輜車北來如穿雉不意虜馬飲江水虜主北歸石濟死
虜欲渡江天不徙故答書引之太武大怒乃作鐵牀於上施鐵鑱破城得質當
坐之此上質又與魏軍書寫臺格購斬太武封萬戶侯賜布絹各萬疋魏以鉤
車鉤垣樓城內繫緇數百人叫呼引之車不能退質夜以木桶盛人縣出城外
截鉤獲之明日又以衝車攻城土堅密每頽落下不過數斗魏軍乃肉薄登城
墜而復升莫有退者殺傷萬計死者與城平如此三旬死者過半太武乃解圍
而歸上嘉質功以爲寧蠻校尉雍州刺史監四州諸軍事明年文帝又北侵使
質率見力向潼關質頓兵不肯時發又顧戀嬖妾棄軍營壘單馬還城散用臺
庫見錢六七百萬爲有司所糾上不問元凶弒立以質爲丹陽尹質家遣門生
師顓報質具言文帝崩問質使告司空義宣及孝武帝而自率衆五千馳下討
逆自陽口進江陵見義宣時質諸子在都聞質舉義並逃亡義宣始得質報即
日舉兵馳信報孝武板進質號征北將軍孝武卽位加質車騎將軍開府儀同

三司都督江州諸軍事使質自白下步上薛安都程天祚等亦自南掖門入與質同會太極殿庭生禽元凶仍使質留守朝堂封始興郡公之鎮舫千餘乘部伍前後百餘里六平乘並施龍子幡時孝武自攬威權而質以少主遇之刑政慶賞不復諮稟朝廷自謂人才足爲一世英傑始聞國禍便有異圖以義宣凡闇易制欲外相推奉以成其志及至江陵便致拜稱名質於義宣雖爲兄弟而年近六十歲義宣驚曰君何意拜弟質曰事中宜然時義宣已推崇孝武故其計不行每慮事泄及至新亭又拜江夏王義恭義恭愕然問質所以質曰天下屯危禮異常日前在荊州亦拜司空會義宣有憾於孝武質因此密信說誘陳朝廷得失又謂震主之威不可持久質女爲義宣子採妻謂質無復異同納其說且義宣腹心將佐蔡超竺超人等咸有富貴情願又勸義宣義宣時未受丞相質子敦爲黃門侍郎奉詔敦勸道經尋陽質令敦具更譬說義宣義宣意乃定馳報豫州刺史魯爽期孝建元年秋同舉爽失旨卽起兵遣人至都報弟瑜席卷奔叛瑜弟弘爲質府佐孝武馳使報質誅弘於是執臺使狼狽舉兵馳報

義宣孝武遣撫軍將軍柳元景統豫州刺史王玄謨等屯梁山洲兩岸築偃月壘水陸待之元景檄書宣告而義宣亦相次係至江夏王義恭書曰昔桓玄借兵於仲堪有似今日義宣由此與質相疑質進計曰今以萬人取南州則梁山中絕萬人綴玄謨必不敢輕動質浮舟外江直向石頭此上略也義宣將從之義宣客顏樂之說義宣曰質若復拔東城則大功盡歸之矣宜遣麾下自行義宣遣腹心劉謔之就質陳軍城南玄謨留羸弱守城悉精兵出戰薛安都騎軍前出垣護之督諸將繼之乃大潰質求義宣欲計事密已走矣質不知所爲亦走至尋陽焚府舍載妓妾入南湖摘蓮噉之追兵至以荷覆頭沉於水出鼻軍士鄭俱兒望見射之中心兵刃亂至腹胃纏縈水草隊主裘應斬質傳首建鄴錄尚書江夏王義恭等奏依漢王莽事漆其頭藏於武庫詔可

論曰趙倫之蕭思話俱以外戚之親並接風雲之會言親則在趙爲密論望則於蕭爲重古人云人能弘道蓋此之謂乎惠開親禮雖篤弟隙尤著方寸之內孝友異情嶮於山川有驗於此臧氏文義之美傳于累代含文以致誅滅好亂

之所致乎

南史卷十八

南

史

卷十八

列傳

十四

中華書局聚

續文卷十八

大英圖書館

南史卷十八考證

蕭惠開傳今以蕭惠開爲憲司冀當稱職但一往眼額已自殊有所震○眼宋書作服

蕭惠明傳郡界有卞山山下有項羽廟○本卷中凡三見項羽事此其一也顧炎武謂惠明因發背旬日而卒與齊書李安民爲吳興太守不祀神以牛而牛死安民尋卒略相類

蕭惠基弟惠休傳吳興郡項羽神舊酷烈○又一項羽神事顧炎武謂下文云惠休事神謹故得美遷略與本書蕭猷爲吳興郡守所禱必從相類

蕭琛傳負其才氣侯儉宴于樂游○樂游下梁書有苑字

後爲吳興太守郡有項羽廟○又一項羽神事顧炎武謂下文遷之於廟禁祀以牛略與宋書孔季恭居聽事竟無害相類

臧燾傳武帝鎮京口參帝軍中軍事○參帝監本誤參軍今從閣本

臧盾傳美風姿善容止每趣奏梁武帝甚悅焉○趣一本作趨

南史卷十九

唐

李

延

壽

撰

列傳第九

謝

晦

兄瞻從叔澹

弟暉

謝

裕

子恂

玄孫微

裕弟純

謝方明

子惠連

謝靈運

孫超宗

曾孫幾卿

謝晦字宣明陳郡陽夏人晉太常哀之玄孫也哀子奕據安萬鐵並著名前史

據子朗字長度位東陽太守朗子重字景重位會稽王道子驃騎長史重生絢

瞻晦暉遜絢位至宋文帝鎮軍長史早卒晦初為孟昶建威府中兵參軍昶死

帝問劉穆之昶府誰堪入府穆之舉晦即命為太尉參軍武帝當訊獄其旦刑

獄參軍有疾以晦代之晦車中一覽訊牒隨問酬對無失帝奇之即日署刑獄

賊曹累遷太尉主簿從征司馬休之時徐達之戰死帝將自登岸諸將諫不從

晦持帝帝曰我斬卿晦曰天下可無晦不可無公晦死何有會胡藩登岸賊退

乃止晦美風姿善言笑眉目分明鬢髮如墨涉獵文義博瞻多通時人以方楊

德祖微將不及晦聞猶以爲恨帝深加愛賞從征關洛內外要任悉委之帝於彭城大會命紙筆賦詩晦恐帝有失起諫帝卽代作曰先蕩臨淄穢却清河洛塵華陽有逸驥桃林無伏輪於是羣臣並作詩謝琨風華爲江左第一嘗與晦俱在武帝前帝目之曰一時頓有兩玉人耳劉穆之遣使陳事晦往往異同穆之怒曰公復有還時不及帝欲以晦爲從事中郎穆之堅執不與故終穆之世不遷及穆之喪問至帝哭之甚慟曰喪我賢友晦時正直喜甚自入閣參審其日教出轉晦從事中郎宋臺建爲右衛將軍加侍中武帝聞咸陽淪沒欲復北伐晦諫以士馬疲怠乃止於是登城北望慨然不悅乃命羣僚誦詩晦詠王粲詩曰南登霸陵岸回首望長安悟彼下泉人喟然傷心肝帝流涕不自勝及帝受命於石頭登壇備法駕入宮晦領游軍爲警加中領軍封武昌縣公永初二年坐行璽封鎮西司馬南郡太守王華而誤封北海太守球板免晦侍中尋轉領軍將軍加散騎常侍依晉中軍羊祜故事入直殿省總統宿衛及帝不豫給班劍二十人與徐羨之傅亮檀道濟並侍醫藥少帝卽位加中書令與徐傅輔

政及少帝廢徐羨之以晦領護南蠻校尉荊州刺史加都督欲令居外爲援慮文帝至或別用人故遽有此授精兵舊將悉以配之文帝卽位晦慮不得去甚憂惶及發新亭顧石頭城喜曰今得脫矣進封建平郡公固讓又給鼓吹一部至江陵深結侍中王華冀以免禍二女當配彭城王義康新野侯義賓元嘉二年遣妻及長子世休送女還都先是景平中魏師攻取河南至是欲誅羨之等并討晦聲言北行又言拜京陵裝舟艦傅亮與晦書言薄伐河朔事猶未已朝野之慮憂懼者多又言當遣外監萬幼宗往時朝廷處分異常其謀頗泄三年正月晦弟黃門侍郎曠馳使告晦晦猶謂不然呼諮議參軍何承天示以亮書曰計幼宗一二日必至傅公慮我好事故先遣此書承天曰外間所聞咸謂西討已定幼宗豈有止理晦尙謂虛使承天豫立答詔啓草北行宜須明年江夏內史程道慧得尋陽人書言其事已審使執晦晦問計於承天對曰蒙將軍殊顧常思報德事變至矣何敢隱情然明日戒嚴動用軍法區區所懷懼不得盡晦懼曰卿豈欲我自裁哉承天曰尙未至此其在境外晦曰荊州用武之地兵

糧易給聊且決戰走復何晚吾不愛死負先帝之顧如何又謂承天曰幼宗尙未至若後二三日無消息便是不復來邪承天曰程說其事已判豈容復疑晦欲焚南蠻兵籍率見力決戰士人多勸發兵晦問諸將戰士三千足守城乎南蠻司馬周超曰非徒守城若有外寇亦可立勳司馬庾登之請解司馬南郡以授之晦卽命超爲司馬轉登之爲長史文帝誅羨之等及晦子世休收曠世子平兄子紹等晦知訖先舉羨之亮哀次發子弟凶問旣而自出射堂集得精兵三萬人乃奉表言臣等若志欲專權不顧國典便當輔翼幼主孤背天日豈得恣流數十虛館三月奉迎鑾駕以遵下武故廬陵王於滎陽之世屢被猜嫌積怨犯上自貽非命不有所廢將何以興耿弇不以賊遺君父臣亦何負於宋室邪又言羨之亮無罪見誅王弘兄弟輕躁昧進王華猜忌忍害帝時已戒嚴尙書符荊州暴其罪狀晦率衆二萬發自江陵舟艦列自江津至于破冢旗旌相照歎曰恨不得以此爲勤王之師移檄建鄴言王弘曇首王華等罪又上表陳情初晦與徐傅謀爲自全計晦據上流檀鎮廣陵各有強兵足制朝廷羨之亮

於中知權可得持久及帝將行召檀道濟委之以衆晦始謂道濟不全及聞其
來大衆皆潰晦得小船還江陵初雍州刺史劉粹遣弟竟陵太守道濟與臺軍
主沈敞之襲江陵至沙橋周超大破之俄而晦至江陵無佗唯愧周超而已超
其夜詣到彥之降晦乃攜弟遯兄子世基等七騎北走遯肥不能騎馬晦每待
不得速至安陸延頭晦故吏戍主光順之檻送建鄴於路作悲人道以自哀周
超既降到彥之以參府事劉粹遣告彥之沙橋之事敗由周超彥之乃執與晦
等並伏誅世基絢之子也有才氣臨死爲連句詩曰偉哉橫海鱗壯矣垂天翼
一旦失風水翻爲螻蟻食晦續之曰功遂侔昔人保退無智力既涉太行險斯
路信難陟晦女爲彭城王義康妃聰明有才貌被髮徒跣與晦訣曰阿父大丈
夫當橫屍戰場奈何狼籍都市言訖叫絕行人爲之落淚晦死時年三十七庚
登之殷道鸞何承天自晦下並見原

瞻字宣遠一曰名檐字通遠晦次兄也六歲能屬文爲紫石英贊果然詩爲當
時才士歎異與從叔琨族弟靈運俱有盛名嘗作喜霽詩靈運寫之琨詠之王

弘在坐以爲三絕瞻幼孤叔母劉撫養有恩兄弟事之同於至親劉弟柳爲吳郡將姊俱行瞻不能遠自楚臺祕書郎解職隨從故爲柳建威長史後爲宋武帝相國從事中郎晦時爲宋臺右衛權遇已重於彭城還都迎家賓客輻湊時瞻在家驚駭謂晦曰吾家以素退爲業汝遂勢傾朝野此豈門戶福邪乃籬隔門庭曰吾不忍見此後因宴集靈運問晦潘陸與賈充優劣晦曰安仁詔於權門士衡邀競無已並不能保身自求多福公閻勳名佐世不得爲並靈運曰安仁士衡才爲一時之冠方之公閻本自遼絕瞻斂容曰若處貴而能遺權斯則是非不得而生傾危無因而至君子以明哲保身其在此乎常以裁止晦如此及還彭城言於武帝曰臣本素士父祖位不過二千石弟年始三十志用凡近位任顯密福過災生特乞降黜以保衰門前後屢陳帝欲以瞻爲吳興郡又自陳請乃爲豫章太守晦或以朝廷密事語瞻瞻輒向親舊說以爲戲笑以絕其言晦遂建佐命功瞻愈憂懼永初二年在郡遇疾不療幸於不永晦聞疾奔波瞻見之曰汝爲國大臣又總戎重萬里遠出必生疑謗時果有詐告晦反者

瞻疾篤還都帝以晦禁旅不得出宿使瞻居於晉南郡公主壻羊賁故第在領軍府東門瞻曰吾有先人弊廬何爲於此臨終遺晦書曰吾得歸骨山足亦何所多恨弟思自勉爲國爲家卒時年三十五瞻文章之美與從叔琨族弟靈運相抗靈運父瑒無才能爲祕書郎早卒而靈運好臧否人物琨患之欲加裁折未有其方謂瞻曰非汝莫能乃與晦瞻弘微等共遊戲使瞻與靈運共車靈運登車便商較人物瞻謂曰祕書早亡談者亦互有同異靈運默然言論自此衰

止

瞻弟暉字宣鏡年數歲所生母郭氏疾暉晨昏溫清勤容戚顏未嘗暫改恐僕役營疾懈倦躬自執勞母爲疾畏驚而微賤過甚一家尊卑感暉至性咸納履行屏氣語如此者十餘年位黃門侍郎從坐伏誅

澹字景恆晦從叔也祖安晉太傅父瑤琅邪王友澹任達仗氣不營當世與順陽范泰爲雲霞之交歷位尚書宋武帝將受禪有司議使侍中劉劼進璽帝曰此選當須人望乃使澹攝澹嘗侍帝宴酣飲大言無所屈鄭鮮之欲按之帝以

爲澹方外士不宜規矩繩之然意不說不以任寄後復侍飲醉謂帝曰陛下用羣臣但須委屈順者乃見貴汲黯之徒無用也帝大笑景平中累遷光祿大夫從子晦爲荊州將之鎮詣澹別晦色自矜澹問晦年答曰三十五澹笑曰昔荀中郎年二十九爲北府都督卿比之已爲老矣晦色甚愧元嘉中位侍中特進金紫光祿大夫卒初澹從弟混與劉毅昵澹常以爲憂漸疎混每謂弟璞從子瞻曰益壽此性終當破家混尋見誅朝廷以澹先言故不及禍璞字景山幼孝友祖安深賞愛之位光祿勳

謝裕字景仁朗弟允之子而晦從父也名與宋武帝諱同故以字行允字令度位宣城內史景仁幼爲從祖安所知始爲前軍行參軍會稽王世子元顯嬖人張法順權傾一時內外無不造門唯景仁不至年三十而方爲著作佐郎桓玄誅元顯見景仁謂四坐曰司馬庶人父子云何不敗遂令謝景仁三十而方佐著作郎玄建楚臺以補黃門侍郎及篡位領驍騎將軍景仁博聞強識善敘前言往往玄每與言不倦玄出行殷仲文卞範之之徒皆騎馬散從而使景仁陪

輦宋武帝爲桓修撫軍中兵參軍嘗詣景仁諮事景仁與語說因留帝食食未辦而景仁爲玄所召玄性促俄頃間騎詔續至帝屢求去景仁不許曰主上見待要應有方我欲與客食豈不得待竟安坐飽食然後應召帝甚感之及平建鄴景仁與百僚同見武帝目之曰此名公孫也歷位武帝鎮軍司馬復爲車騎司馬義熙五年帝將伐慕容超朝議皆謂不可劉毅時鎮姑孰固止帝以爲苻堅侵境謝太傅猶不自行宰相遠出傾動根本景仁獨曰公建桓文之烈應天人之心雖業高振古而德刑未樹宜推亡固存廣振威略平定之後養銳息徒然後觀兵洛汭修復園寢豈有縱敵貽患者哉帝從之及北伐大司馬琅邪王天子母弟屬當儲副帝深以根本爲憂轉景仁大司馬左司馬專總府任又遷吏部尙書時從兄混爲尙書左僕射依制不得相監帝啓依僕射王彪之尙書王劭前例不解職坐選吏部令史邢安泰爲都令史平原太守二官共除安泰以令史職拜謁陵廟爲御史中丞鄭鮮之所糾白衣領職十一年爲左僕射景仁性矜嚴整潔居宇淨麗每唾輒唾左右人衣事畢卽聽一日澣濯每欲唾左

右爭來受之武帝雅相知重申以昏姻廬陵王義真妃景仁女也十二年卒贈金紫光祿大夫葬曰武帝親臨甚慟

子恂字泰温位都陽太守恂子孺子少與族兄莊齊名多藝能尤善聲律車騎將軍王彧孺子姑之子也嘗與孺子宴桐臺孺子吹笙彧自起舞既而歎曰今日真使人飄飄有伊洛間意爲新安王主簿出爲廬江郡辭宋孝武謂有司曰謝孺子不可屈爲小郡乃以爲司徒主簿後以家貧求西陽太守卒官子璟少與從叔朓俱知名齊竟陵王子良開西邸招文學璟亦預焉位中書郎梁天監中爲左戶尚書再遷侍中固辭年老求金紫帝不悅未敘會卒

子微字玄度美風采好學善屬文位兼中書舍人與河東裴子野沛國劉顯同官友善時魏中山王元略還北梁武帝餞於武德殿賦詩三十韻限三刻成微二刻便就文甚美帝再覽焉又爲臨汝侯猷製放生文亦見賞於世後除尚書左丞及昭明太子薨帝立晉安王綱爲皇太子將出詔唯召尚書右僕射何敬容宣惠將軍孔休源及微三人與議微時年位尚輕而任遇已重後卒於北中

郎豫章王長史南蘭陵太守文集二十卷

純字景懋景仁弟也劉毅鎮江陵以爲衛軍長史南平相及王鎮惡襲毅毅時病佐史聞兵至馳還入府左右引車欲還外解純叱之曰我人吏也逃欲安之及入毅兵敗衆散純爲人所殺純弟尪字景尪位司徒右長史尪弟述字景先小字道兒少有至行隨純在江陵純遇害述奉純喪還都至西塞遇暴風純喪舫流漂不知所在述乘小船尋求經純妻庾舫過庾遣人謂曰小郎去必無及寧可存亡俱盡邪述號泣答曰若安全至岸尙須營理如其已致意外述亦無心獨存因冒浪而進見純喪幾沒述號叫呼天幸而獲免咸以爲精誠所致武帝聞而嘉之及臨豫州諷中正以爲迎主簿甚被器遇景仁愛尪而憎述嘗設饌請宋武帝希命尪豫坐而帝召述述知非景仁夙意又慮帝命之請急不從帝馳遣呼述須至乃餐其見重如此及景仁疾述盡心視湯藥飲食必嘗而後進衣不解帶不盥櫛者累旬景仁深感愧焉友愛遂篤及景仁卒哀號過禮景仁肥壯買材數具皆不合用述哀惶親選迺獲焉爲太尉參軍從征司馬休之

封吉陽縣五等侯元嘉二年拜中書侍郎後爲彭城王義康驃騎長史領南郡太守義康入相述又爲司徒左長史轉左衛將軍莅官清約私無宅舍義康遇之甚厚尙書僕射殷景仁領軍將軍劉湛並與述爲異常之交述美風姿善舉止湛每謂人曰我見謝道兒未嘗足雍州刺史張邵以贖貨將致大辟述表陳邵先朝舊勳宜蒙優貸文帝手詔酬納焉述語子綜曰主上矜邵夙誠自將曲恕吾所啓謬會故特見納若此跡宣布則爲侵奪主恩使綜對前焚之帝後謂邵曰卿之獲免謝述力焉述有心虛疾性理時或乖謬卒於吳興太守喪還未至都數十里殷景仁劉湛同乘迎赴望船流涕及劉湛誅義康外鎮將行歎曰謝述唯勸吾退劉湛唯勸吾進述亡而湛存吾所以得罪也文帝亦曰謝述若存義康必不至此三子綜約緯綜有才藝善隸書爲太子中舍人與范曄謀反伏誅約亦死緯尙宋文帝第五女長城公主素爲綜約所憎免死徙廣州孝建中還都方雅有父風位正員郎子朧

朧字玄暉少好學有美名文章清麗爲齊隨王子隆鎮西功曹轉文學子隆在

荊州好辭賦。朧尤被賞不捨。日夕長史王秀之以朧年少相動。欲以啓聞。朧知之。因事求還道中。爲詩寄西府曰。常恐鷹隼擊。時菊委嚴霜。寄言尉羅者。寥廓已高翔。是也。仍除新安王中軍記室。朧賤辭。子隆曰。朧聞橫汗之水。思朝宗而每竭。驚蹇之乘希。沃若而中疲。何則。臯壤搖落。對之惆悵。岐路東西。或以嗚咷。況乃服義徒擁。歸志莫從。邈若墜雨。飄似秋蒂。朧實庸流。行能無算。屬天地休明。山川受納。裹采一介。搜揚小善。故得捨耒場圃。奉筆兔園。東泛三江西。浮七澤。契闊戎旃。從容讌語。長裾日曳。後乘載脂。榮立府廷。恩加顏色。沐髮晞陽。未測涯涘。撫臆論報。早誓肌骨。不悟滄溟。未運波臣。自蕩渤澥。方春旅翻。先謝清切。藩房寂寥。舊葦輕舟。反泝弔影。獨留白雲。在天龍門。不見去德。滋永思德。滋深。唯待青江可望。候歸艫於春渚。朱邸方開。效蓬心於秋實。如其簪屨。或存衽席。無改雖復。身填溝壑。猶望妻子。知歸攬涕。告辭悲來。橫集時荊州。信去倚待。朧執筆便成文。無點易以本官兼尙書殿中郎。隆昌初。敕朧接北使。朧自以口訥。啓讓見許。明帝輔政。以爲驃騎。諮議領記室。掌霸府文筆。又掌中書詔誥。轉

中書郎出爲晉安王鎮北諮議南東海太守行南徐州事啓王敬則反謀上甚賞之遷尙書吏部郎朧上表三讓中書疑朧官未及讓以問國子祭酒沈約約曰宋元嘉中范曄讓吏部朱修之讓黃門蔡興宗讓中書並三表詔答近代小官不讓遂成恆俗恐有乖讓意王藍田劉安西並貴重初自不讓今豈可慕此不讓邪孫興公孔顓並讓記室今豈可三署皆讓邪謝吏部今授超階讓別有意豈關官之大小撝謙之美本出人情若大官必讓便與詣闕章表不異例旣如此謂都非疑朧讓優答不許朧善草隸長五言詩沈約常云二百年來無此詩也敬皇后遷祔山陵朧撰哀策文齊世莫有及者東昏失德江祏欲立江夏王寶玄末更回惑與弟祀密謂朧曰江夏年少脫不堪不可復行廢立始安年長入纂不乖物望非以此要富貴只求安國家爾遙光又遣親人劉渢致意於朧朧自以受恩明帝不肯答少日遙光以朧兼知衛尉事朧懼見引卽以祏等謀告左興盛又說劉暄曰始安一旦南面則劉渢劉宴居卿今地但以卿爲反覆人爾暄陽驚馳告始安王及江祏始安欲出朧爲東陽郡祏固執不與先是

朧常輕祜爲人祜常詰朧朧因言有一詩呼左右取既而便停祜問其故云定復不急祜以爲輕己後祜及弟祀劉渢劉宴俱候朧朧謂祜曰可謂帶二江之雙流以嘲弄之祜轉不堪至是構而害之詔暴其過惡收付廷尉又使御史中丞范岫奏收朧下獄死時年三十六臨終謂門賓曰寄語沈公君方爲三代史亦不得見沒初朧告王敬則反敬則女爲朧妻常懷刀欲報朧朧不敢相見及當拜吏部謙挹尤甚尙書郎范縝嘲之曰卿人才無慚小選但恨不可刑於寡妻朧有愧色及臨誅歎曰天道其不可昧乎我雖不殺王公王公因我而死朧好獎人才會稽孔顛粗有才筆未爲時知孔珪嘗令草讓表以示朧朧嗟吟良久手自折簡寫之謂珪曰士子聲名未立應共獎成無惜齒牙餘論其好善如此朧及殷叡素與梁武以文章相得帝以大女永興公主適叡子鈞第二女永世公主適朧子謨及帝爲雍州二女並暫隨母向州及武帝卽位二主始隨內還武帝意薄謨又以門單欲更適張弘策子策卒又以與王志子諲而謨不堪歎恨爲書狀如詩贈主主以呈帝甚蒙矜歎而婦終不得還尋用謨爲信安縣

稍遷王府諮議時以爲沈約早與朮善爲制此書云

謝方明裕從祖弟也祖鐵字鐵石位永嘉太守父冲字秀度中書郎家在會稽病歸爲孫恩所殺贈散騎常侍方明隨伯父吳興太守邈在郡孫恩寇會稽東土諸郡響應吳興人胡桀郃驃破東遷縣方明勸邈避之不從賊至被害方明逃免初邈舅子長樂馮嗣之及北方學士馮翊仇玄達俱投邈禮待甚簡二人並恨遂與恩通謀劉牢之謝琰等討恩恩走臨海嗣之等不得同去方更聚合方明體素羸弱而勇決過人結邈門生討嗣之等悉禽手刃之時亂後吉凶禮廢方明合門遇禍資產無遺而營舉凶功盡力數月葬送並畢平世備禮無以加也頃之孫恩重陷會稽謝琰見害因購方明甚急方明於上虞載母妹奔東陽由黃巖嶠出鄞陽附載還都寄居國子學流離險厄屯苦備經而貞履之操在約無改桓玄剋建鄴丹陽尹卞範之勢傾朝野欲以女嫁方明方明終不回桓玄聞而賞之卽除著作佐郎後從兄景仁舉爲宋武中軍主簿方明知無不爲帝謂曰愧未有瓜衍之賞且當與卿共豫章國祿屢加賞賜方明嚴恪善自

居遇雖暗室未嘗有惰容從兄混有重名唯歲節朝拜而已丹陽尹劉穆之權重當時朝野輻湊其不至者唯混方明郗僧施蔡廓四人而已穆之甚恨及混等誅後方明廓來往造穆之穆之大悅白武帝曰謝方明可謂名家駒及蔡廓直置並台鼎人無論復有才用頃之轉從事中郎仍爲右將軍道憐長史武帝令府中衆事皆諮決之府轉爲中軍長史尋加晉陵太守復爲驃騎長史南郡相委任如初嘗年終江陵縣獄囚事無輕重悉放歸家使過正三日還到罪重者二十餘人綱紀以下莫不疑懼時晉陵郡送故主簿弘季咸徐壽之並隨在西固諫以爲昔人雖有其事或是記籍過言且當今人情僞薄不可以古義相許方明不納一時遣之囚及父兄並驚喜涕泣以爲就死無恨至期有重罪一人醉不能歸違二日乃反餘一囚十日不來五官朱千期請見欲自討之方明知爲囚事使左右謝五官不須入囚自當反囚逡巡墟里不能自歸鄉村責讓率領將送竟無逃者遠近歎服焉宋武帝受命位侍中丹陽尹有能名轉會稽太守江東人戶殷盛風俗峻刻疆弱相陵姦吏蜂起符書一下文攝相續方明

深達政體不拘文法闊略苛細務在統領貴族豪士莫敢犯禁除比伍之坐判久繫之獄前後征伐每兵運不充悉倩士庶事寧皆使還本而守宰不明與奪乖謬人事不至必被抑塞方明簡汰精當各順所宜東土稱詠之性尤愛惜未嘗有所是非承代前人不易其政必宜改者則漸變使無迹可尋卒官

子惠連年十歲能屬文族兄靈運加賞之云每有篇章對惠連輒得佳語嘗於永嘉西堂思詩竟日不就忽夢見惠連卽得池塘生春草大以爲工嘗云此語有神功非吾語也本州辟主簿不就惠連先愛幸會稽郡吏杜德靈及居父憂贈以五言詩十餘首乘流遵歸路諸篇是也坐廢不豫榮位尙書僕射殷景仁愛其才言次白文帝言臣小兒時便見此文而論者云是惠連其實非也文帝曰若此便應通之元嘉七年方爲司徒彭城王義康法曹行參軍義康修東府城城塹中得古冢爲之改葬使惠連爲祭文留信待成其文甚美又爲雪賦以高麗見奇靈運見其新文每曰張華重生不能易也文章並行於世年三十七卒旣早亡輕薄多尤累故官不顯無子惠連弟惠宣位臨川太守

謝靈運安西將軍奕之曾孫而方明從子也祖玄晉車騎將軍父瑒生而不慧位祕書郎早亡靈運幼便穎悟玄甚異之謂親知曰我乃生瑒瑒兒何爲不及我靈運少好學博覽羣書文章之美與顏延之爲江左第一縱橫俊發過於延之深密則不如也從叔祖混特加愛之襲封康樂公以國公例除員外散騎侍郎不就爲琅邪王大司馬行參軍性豪侈車服鮮麗衣物多改舊形制世共宗之咸稱謝康樂也累遷祕書丞坐事免宋武帝在長安靈運爲世子中軍諮議黃門侍郎奉使慰勞武帝於彭城作撰征賦後爲相國從事中郎世子左衛率坐輒殺門生免官宋受命降公爵爲侯又爲太子左衛率靈運多愆禮度朝廷唯以文義處之不以應實相許自謂才能宜參權要既不見知常懷憤惋廬陵王義真少好文籍與靈運情款異常少帝卽位權在大臣靈運搆扇異同非毀執政司徒徐羨之等患之出爲永嘉太守郡有各山水靈運素所愛好出守旣不得志遂肆意遊遨徧歷諸縣動踰旬朔理人聽訟不復關懷所至輒爲詩詠以致其意在郡一周稱疾去職從弟晦曜弘微等並與書止之不從靈運父祖

並葬始寧縣并有故宅及墅遂移籍會稽修營舊業傍山帶江盡幽居之美與
隱士王弘之孔淳之等放蕩爲娛有終焉之志每有一首詩至都下貴賤莫不
競寫宿昔間士庶皆徧名動都下作山居賦并自注以言其事文帝誅徐羨之
等徵爲祕書監再召不起使光祿大夫范泰與書敦獎乃出使整祕閣書遺闕
又令撰晉書粗立條流書竟不就尋遷侍中賞遇甚厚靈運詩書皆兼獨絕每
文竟手自寫之文帝稱爲二寶旣自以名輩應參時政至是唯以文義見接每
侍上宴談賞而已王曇首王華殷景仁等名位素不踰之並見任遇意旣不平
多稱疾不朝直穿池植援種竹樹果驅課公役無復期度出郭游行或一百六
七十里經旬不歸旣無表聞又不請急上不欲傷大臣諷旨令自解靈運表陳
疾賜假東歸將行上書勸伐河北而游娛宴集以夜續晝復爲御史中丞傅隆
奏免官是歲元嘉五年也靈運旣東與族弟惠連東海何長瑜潁川荀雍太山
羊璿之以文章賞會共爲山澤之游時人謂之四友惠連幼有奇才不爲父方
明所知靈運去永嘉還始寧時方明爲會稽靈運造方明遇惠連大相知賞靈

運性無所推唯重惠連與爲刎頸交時何長瑜教惠連讀書亦在郡內靈運又以爲絕倫謂方明曰阿連才悟如此而尊作常兒遇之長瑜當今仲宣而飴以下客之食尊旣不能禮賢宜以長瑜還靈運載之而去荀雍字道雍官至員外散騎郎璿之字曜璿爲臨川內史被司空竟陵王誕所遇誕敗坐誅長瑜才亞惠連雍璿不及也臨川王義慶招集文士長瑜自國侍郎至平西記室參軍嘗於江陵寄書與宗人何勛以韻語序義慶州府僚佐云陸展染白髮欲以媚側室青青不解久星星行復出如此者五六句而輕薄少年遂演之凡人士並爲題目皆加劇言苦句其文流行義慶大怒白文帝除廣州所統曾城令及義慶薨朝士並詣第敘哀何勛謂袁淑曰長瑜便可還也淑曰國新喪未宜以流人爲念廬陵王紹鎮尋陽以長瑜爲南中郎行參軍掌書記之任行至板橋遇暴風溺死靈運因祖父之資生業甚厚奴僮旣衆義故門生數百鑿山浚湖功役無已尋山陟嶺必造幽峻巖嶂數十重莫不備盡登躡常着木屐上山則去其前齒下山去其後齒嘗自始寧南山伐木開徑直至臨海從者數百臨海太守

王琇驚駭謂爲山賊未知靈運乃安又要琇更進琇不肯靈運贈琇詩曰邦君
難地嶮旅客易山行在會稽亦多從衆驚動縣邑太守孟顓事佛精懇而爲靈
運所輕嘗謂顓曰得道應須慧業丈人生天當在靈運前成佛必在靈運後顓
深恨此言又與王弘之諸人出千秋亭飲酒保身大呼顓深不堪遣信相聞靈
運大怒曰身自大呼何關癡人事會稽東郭有回踵湖靈運求決以爲田文帝
令州郡履行此湖去郭近水物所出百姓惜之顓堅執不與靈運旣不得回踵
又求始寧休蝗湖爲田顓又固執靈運謂顓非存利人政慮決湖多害生命言
論傷之與顓遂隙因靈運橫恣表其異志發兵自防露板上言靈運馳詣闕上
表自陳本末文帝知其見誣不罪也不欲復使東歸以爲臨川內史在郡游放
不異永嘉爲有司所糾司徒遣使隨州從事鄭望生收靈運靈運與兵叛逸遂
有逆志爲詩曰韓亡子房奮秦帝魯連恥本自江海人忠義感君子追討禽之
送廷尉廷尉論正斬刑上愛其才欲免官而已彭城王義康堅執謂不宜恕詔
以謝玄勳參微管宜宥及後嗣降死徙廣州後秦郡府將宋齊受使至涂口行

達桃墟村見有七人下路聚語疑非常人還告郡縣遣兵隨齊掩討禽之其一
人姓趙名欽云同村薛道雙先與靈運共事道雙因同村成國報欽云靈運犯
事徙廣州給錢令買弓箭刀楯等物使道雙要合鄉里健兒於三江口篡之若
得者如意後功勞是同遂合部黨要謝不得及還饑饉緣路爲劫有司奏收之
文帝詔於廣州棄市臨死作詩曰龔勝無餘生李業有終盡嵇公理旣迫霍生
命亦殞所稱龔勝李業猶前詩子房魯連之意也時元嘉十年年四十九所著
文章傳於世孟顛字彥重平昌安丘人衛將軍昶弟也昶顛並美風姿時人謂
之雙珠昶貴盛顛不就辟昶死後顛歷侍中僕射太子詹事散騎常侍左光祿
大夫嘗就徐羨之因敘關洛中事顛歎劉穆之終後便無繼者王弘亦在甚不
平曰昔魏朝酷重張邵謂不可一日無之及邵死何關興廢顛不悅衆賓笑而
釋之後卒於會稽太守靈運子鳳坐靈運徙嶺南早卒

鳳子超宗隨父鳳嶺南元嘉末得還與慧休道人來往好學有文辭盛得名譽
選補新安王子鸞國常侍王母殷淑儀卒超宗作誄奏之帝大嗟賞謂謝莊曰

超宗殊有鳳毛靈運復出時右衛將軍劉道隆在御坐出候超宗曰聞君有異物可見乎超宗曰懸磬之室復有異物邪道隆武人無識正觸其父名曰旦侍宴至尊說君有鳳毛超宗徒跣還內道隆謂檢覓毛至闇待不得乃去泰始中爲尚書殿中郎三年都令史駱宰議榮秀孝格五問並得爲上四三爲中二爲下一不第超宗議不同詔從宰議齊高帝爲領軍愛其才衛將軍袁粲聞之謂高帝曰超宗開亮善可與語取爲長史臨淮太守粲誅高帝以超宗爲義興太守昇明二年坐公事免詣東府門自通其日風寒高帝謂四坐曰此客至使人不衣自暖矣超宗旣坐飲酒數杯辭氣橫出高帝對之甚歡及齊受禪爲黃門郎有司奏撰郊廟歌上敕司徒褚彥回侍中謝朓散騎侍郎孔珪太學博士王咺之總明學士劉融何法圖何曇秀作者凡十人超宗辭獨見用爲人恃才使酒多所陵忽在直省常醉上召見語及北方事超宗曰虜動來二十年矣佛出亦無如之何以失儀出爲南郡王中軍司馬人問曰承有朝命定是何府超宗怨望答曰不知是司馬爲是司驢旣是驢府政應爲司驢爲有司奏以怨望免

禁錮十年後司徒褚彥回因送湘州刺史王僧虔閣道壞墜水僕射王儉驚跣下車超宗拊掌笑曰落水三公墜車僕射彥回出水霑溼狼藉超宗先在僧虔舫抗聲曰有天道焉天所不容地所不受投畀河伯河伯不受彥回大怒曰寒士不遜超宗曰不能賣袁劉得富貴焉免寒士前後言諂稍布朝野武帝卽位使掌國史除竟陵王征北諮議領記室愈不得志超宗爲子娶張敬兒女爲婦帝甚疑之及敬兒誅超宗謂丹陽尹李安人曰往年殺韓信今年殺彭越君欲何計安人具啓之上積懷超宗輕慢使兼中丞袁彖奏超宗請付廷尉武帝雖可其奏以彖言辭依違使左丞王遂之奏彖輕文略奏撓法容非請免彖所居官詔彖匿情欺國愛朋罔主免官禁錮十年超宗下廷尉一宿髮白皓首詔徙越巂行至豫章上敕豫章內史虞悛賜盡勿傷其形骸明年超宗門生王永先又告超宗子才卿死罪二十餘條上疑其妄以才卿付廷尉辯以不實見原永先於獄盡之

才卿弟幾卿清辯時號神童超宗徙越巂詔家人不得相隨幾卿年八歲別父

於新亭不勝其慟遂投於江超宗命估客數人入水救之良久涌出得就岸瀝
耳目口鼻出水數斗十餘日乃裁能言居父憂哀毀過禮年十二召補國子生
齊文惠太子自臨策試謂王儉曰幾卿本長玄理今可以經義訪之儉承旨發
問幾卿辯釋無滯文惠大稱賞焉儉謂人曰謝超宗爲不死矣及長博學有文
采仕齊爲太尉晉安王主簿梁天監中自尚書三公郎爲治書侍御史舊郎官
轉爲此職者世謂之南奔幾卿頗失志多陳疾臺事略不復理累遷尚書左丞
幾卿詳悉故實僕射徐勉每有凝滯多詢訪之然性通脫會意便行不拘朝憲
嘗預樂遊苑宴不得醉而還因詣道邊酒壚停車褰幔與車前三騶對飲時觀
者如堵幾卿處之自若後以在省署夜著犢鼻褌與門生登閣道飲酒酣呼爲
有司糾奏坐免普通六年詔西昌侯藻督衆軍北侵幾卿啓求行擢爲藻軍師
長史將行與僕射徐勉別勉云淮肥之役前謝已著奇功未知今謝何如幾卿
應聲曰已見今徐勝於前徐後謝何必愧於前謝勉默然軍至渦陽退敗幾卿
坐免官居白楊石井宅朝中文好者載酒從之客恆滿坐時左丞庾仲容亦免

歸二人意相得並肆情誕縱或乘露車歷游郊野醉則執鐸挽歌不屑物議湘東王繹在荆鎮與書慰勉之後爲太子率更令放達不事容儀性不容非與物多忤有乖己者輒肆意罵之退無所言遷左丞僕射省嘗議集公卿幾卿外還宿醉未醒取枕高臥傍若無人又嘗於閣省裸袒酣飲及醉小遺下霑令史爲南司所彈幾卿亦不介意轉左光祿長史卒文集行於世幾卿雖不持檢操然於家門篤睦兄才卿早卒子藻幼孤幾卿撫養甚至及藻成立歷清官皆幾卿獎訓之力也

論曰謝晦以佐命之功當顧托之重殷憂在日黜昏啓聖於社稷之計蓋爲大矣但廬陵之殞事非主命昌門之覆有乖臣道博陸所慎理異於斯加以身處上流兵權總己將欲以外制內豈人主所久堪乎向令徐傅不亡道濟居外四權制命力足相侔劉氏之危則有逾累卵以此論罰豈曰妄誅宣遠所爲寒心可謂睹其萌矣然謝氏自晉以降雅道相傳景恆景仁以德素傳美景懋景先以節義流譽方明行己之度玄暉藻績之奇各擅一時可謂德門者矣靈運才

南史卷十九考證

謝瞻傳瞻文章之美與從叔琨族弟靈運相抗○琨一本作混應從之

謝純弟述傳述號泣答曰若安全至岸尙須營理○監本脫尙字今從各本增

謝方明傳承代前人不異其政必宜改者則漸變○政監本訛正今從梁書

謝超宗傳常醉上召見語及北方事○語監本訛詔今改正

以失儀出爲南郡王中軍司馬○失監本訛朱今從閣本

南史卷十九考證

南史卷十六

○

○

○

○

○

南史卷十六

南史卷二十

唐

延

壽

撰

列傳第十

謝弘微

子莊 穎弟 藩

孫 肅 子 寬

曾 孫 讓 寬弟 舉

玄 孫 哲 舉子 報

肅 弟 穎 舉兄子 儵

謝密字弘微晉西中郎萬之曾孫尚書左僕射景仁從子也祖韶車騎司馬父

思武昌太守弘微年十歲繼從叔峻名犯所繼內諱故以字行童幼時精神端

審時然後言所繼叔父混名知人見而異之謂思曰此兒深中夙敏方成佳器

有子如此足矣峻司空琰子也於弘微本服總親戚中表素不相識率意承接

皆合禮衷義熙初襲爵建昌縣侯弘微家素貧儉而所繼豐泰唯受數千卷書

國吏數人而已遺財祿秩一不關預混聞而驚歎謂國郎中令漆凱之曰建昌

國祿本應與北舍共之國侯既不厝意今可依常分送弘微重混言乃少有所

受北舍弘微本家也混風格高峻少所交納唯與族子靈運瞻晦曜以文義賞

會常共宴處居在烏衣巷故謂之烏衣之游混詩所言昔為烏衣游戚戚皆親

姓者也其外雖復高流時譽莫敢造門瞻等才辭辯富弘微每以約言服之混特所敬貴號曰微子謂瞻等曰汝諸人雖才義豐辯未必皆愜衆心至於領會機賞言約理要故當與我共推微子常言阿遠剛躁負氣阿客博而無檢矍仗才而持操不篤晦自知而納善不周設復功濟三才終亦以此爲恨至如微子吾無間然又言微子異不傷物同不害正若年造六十必至公輔嘗因酣讌之餘爲韻語以獎勸靈運瞻等曰康樂誕通度實有名家韻若加繩染功剖瑩乃瓊瑾宣明體遠識穎達且沉雋若能去方執穆穆三才順阿多標獨解弱冠纂華胤質勝誠無文其尙又能峻通遠懷清悟采采標蘭訊直轡鮮不躓抑用解偏吝微子基微尙無倦由慕蘭勿輕一簣少進往必千仞數子勉之哉風流由爾振如不犯所知此外無所慎靈運瞻等並有誠厲之言唯弘微獨盡褒美矍弘微兄多其小字通遠卽瞻字客兒靈運小名也晉世名家身有國封者起家多拜員外散騎侍郎弘微亦拜員外散騎侍郎琅邪王大司馬參軍義熙八年混以劉毅黨見誅混妻晉陵公主改適琅邪王練公主雖執意不行而詔與謝

氏離絕公主以混家事委之弘微混仍世宰相一門兩封田業十餘處僮役千人唯有二女年並數歲弘微經紀生業事若在公一錢尺帛出入皆有文簿宋武受命晉陵公主降封東鄉君以混得罪前代東鄉君節義可嘉聽還謝氏自混亡至是九年而室宇修整倉廩充盈門徒不異平日田疇墾闢有加於舊東鄉君歎曰僕射生平重此一子可謂知人僕射爲不亡矣中外姻親道俗義舊見東鄉之歸者入門莫不歎息或爲流涕感弘微之義也性嚴正舉止必修禮度事繼親之黨恭謹過常伯叔二母歸宗兩姑晨夕瞻奉盡其誠敬內外或傳語通訊輒正其衣冠婢僕之前不妄言笑由是尊卑大小敬之若神時有蔡湛之者及見謝安兄弟謂人曰弘微貌類中郎而性似文靖文帝初封宜都王鎮江陵以琅邪王球爲友弘微爲文學母憂去職居喪以孝稱服闋蔬素踰時文帝卽位爲黃門侍郎與王華王曇首殷景仁劉湛等號曰五臣遷尙書吏部郎參機密尋轉右衛將軍諸故吏臣佐並委弘微選擬居身清約器服不華而飲食滋味盡其豐美兄曜歷御史中丞彭城王義康驃騎長史卒官弘微哀戚過

禮服雖除猶不噉魚肉沙門釋慧琳嘗與之食見其猶蔬素謂曰檀越素既多疾卽吉猶未復膳若以無益傷生豈所望於得理弘微曰衣冠之變禮不可踰在心之哀實未能已遂廢食獻歎不自勝弘微少孤事兄如父友睦之至舉世莫及口不言人短見兄曜好藏否人物每聞之常亂以他語歷位中庶子加侍中志在素宦畏忌權寵固讓不拜乃聽解中庶子每獻替及陳事必手書焚草人莫之知上以弘微能膳羞每就求食弘微與親舊經營及進之後親人問上所御弘微不答別以餘語酬之時人比之漢世孔光及東鄉君薨遺財千萬園宅十餘所又會稽吳興琅邪諸處太傅安司空琰時事業奴僮猶數百人公私咸謂室內資財宜歸二女田宅僮僕應屬弘微弘微一不取自以私祿營葬混女夫殷叡素好擣蒲聞弘微不取財物乃濫奪其妻妹及伯母兩姑之分以還戲責內人皆化弘微之讓一無所爭弘微舅子領軍將軍劉湛謂弘微曰天下事宜有裁衷卿此不問何以居官弘微笑而不答或有譏以謝氏累世財產充殷君一朝戲責譬棄物江海以爲廉耳弘微曰親戚爭財爲鄙之甚今內人尙

能無言豈可導之使爭今分多共少不至有乏身死之後豈復見關東鄉君葬
混墓開弘微牽疾臨赴病遂甚元嘉十年卒年四十二文帝歎惜甚至謂謝景
仁曰謝弘微王曇首年踰四十名位未盡其才此朕之責也弘微性寬博無喜
愠末年嘗與友人棋友人西南棋有死勢復一客曰西南風急或有覆舟者友
悟乃救之弘微大怒投局於地識者知其暮年之事果以此歲終時有一長鬼
寄司馬文宣家言被遣殺弘微弘微疾每劇輒豫告文宣及弘微死與文宣分
別而去弘微臨終語左右曰有二封書須劉領軍至可於前燒之慎勿開也書
是文帝手敕上甚痛惜之使二衛千人營畢葬事追贈太常弘微與琅邪王惠
王球並以簡淡稱人謂沈約曰王惠何如約曰令明簡次問王球約曰倩玉淡
又次問弘微約曰簡而不失淡而不流古之所謂名臣弘微當之其見美如此
子莊

莊字希逸七歲能屬文及長韶令美容儀宋文帝見而異之謂尚書僕射殷景
仁領軍將軍劉湛曰藍田生玉豈虛也哉爲隨王誕後軍諮議領記室分左右氏

經傳隨國立篇製木方丈圖山川土地各有分理離之則州郡殊別合之則寓
內爲一元嘉二十七年魏攻彭城遣尙書李孝伯與鎮軍長史張暢語孝伯訪
問莊及王微其名聲遠布如此二十九年除太子中庶子時南平王鑠獻赤鸚
鵡普詔羣臣爲賦太子左衛率袁淑文冠當時作賦畢示莊及見莊賦歎曰江
東無我卿當獨秀我若無卿亦一時之傑遂隱其賦元凶弑立轉司徒左長史
孝武入討密送檄書與莊令加改正宣布之莊遣腹心門生具慶奉啓事密詣
孝武陳誠及帝踐阼除侍中時魏求通互市上詔羣臣博議莊議以爲拒而觀
釁有足表強驃騎竟陵王誕當爲荊州徵丞相荊州刺史南郡王義宣入輔義
宣固辭不入而誕便剋日下船莊以丞相旣無入志而驃騎發便有期如似欲
相逼切帝乃申誕發日義宣竟亦不下孝建元年遷左將軍莊有口辯孝武嘗
問顏延之曰謝希逸月賦何如答曰美則美矣但莊始知隔千里今共明月帝
召莊以延之答語語之莊應聲曰延之作秋胡詩始知生爲久離別沒爲長不
歸帝撫掌竟日又王玄謨問莊何者爲雙聲何者爲疊韻答曰玄護爲雙聲礮

礪爲疊韻其捷速若此初孝武嘗賜莊寶劍莊以與豫州刺史魯爽後爽叛帝因宴問劍所在答曰昔以與魯爽別竊爲陛下杜郵之賜上甚悅當時以爲知言于時搜才路狹莊表陳求賢之義曰臣聞功傾魏后非特照車之珍德柔秦客豈徒祕璧之貴隆陂所漸成敗之由何嘗不興資得才替因失士故楚書以善人爲寶虞典以則哲爲難而進選之軌旣隳中代登造之律未聞當今必欲豐本康務庇人濟俗匪更憊憊奚取九成夫才生於時古今豈貳士出於世屯泰焉殊升歷中陽英賢起於徐沛受籙白水茂異出於荆苑寧二都智之所產七隩愚之所育實遇與不遇用與不用耳今大道光亨萬務俟德而九服之曠九流之艱提鈞懸衡委之選部一人之鑒易限天下之才難源以易限之鑒鏡難源之才使國罔遺賢野無滯器其可得乎昔公叔登臣管仲升盜趙文非私親疎嗣祁奚豈詔讎比子茹茅以彙作範前經舉爾所知式昭往牒且自古任薦弘明賞罰成子舉三哲而身致魏輔應侯任二士而已捐秦相白季稱冀缺而疇以田采張勃進陳湯而坐之褫爵此則先事之盛準亦後王之彝鑒臣謂

宜普命大臣各舉所知以付尚書依分銓用若任得其才舉主延賞有不稱職
宜及其坐重者免黜輕者左遷被舉之身加以禁錮年數多少隨愆議制若犯
大辟則任者刑論又政平訟理莫先親人親人之要實歸守宰故黃霸莅潁川
累稔杜畿居河東歷載或就加恩秩或入崇暉寵今莅人之職宜遵六年之限
進得章明庸惰退得民不勤擾如此則上靡棄能下無浮謬考績之風載泰薪
燠之歌克昌初文帝世限年三十而仕郡縣六周乃選代刺史或十年餘至是
皆易之仕者不拘長少莅人以三周爲滿宋之善政於是乎衰是年拜吏部尚
書莊素多疾不願居選部與大司馬江夏王義恭牋自陳兩脅癰疔殆與生俱
一月發動不減兩三每痛來逼心氣餘如縊利患數年遂成痼疾岌岌憊憊常
如行尸眼患五月來便不復得夜坐恆閉帷避風晝夜惛懵爲此不復得朝謁
諸王慶弔親舊今之所止唯在小閣下官微命於天下至輕在己不能不重家
世無年亡高祖四十曾祖三十三亡祖四十七下官新歲便四十五加以疾患
如此當復幾時入年當申前請以死自固願侍坐言次賜垂接助三年坐疾多

免官大明元年起爲都官尙書上時親覽朝政慮權移臣下以吏部尙書選舉所由欲輕其勢力二年詔吏部尙書依部分置并詳省閑曹又別詔大宰江夏王義恭曰吏部尙書由來與錄共選良以一人之識不辨洽通兼與奪威權不宜專一故也於是置吏部尙書二人省五兵尙書莊及度支尙書顧顛之並補選職遷左衛將軍加給事中時河南獻舞馬詔羣臣爲賦莊所上甚美又使莊作舞馬歌令樂府歌之五年又爲侍中領前軍將軍時孝武出行夜還敕開門莊居守以榮信或虛須墨詔乃開上後因宴從容曰卿欲効邳君章邪對曰臣聞蒐巡有度郊祀有節盤於游田著之前誠陛下今蒙犯塵露晨往宵還容致不逞之徒妄生矯詐臣是以伏須神筆六年又爲吏部尙書領國子博士坐選公車令張奇免官事在顏師伯傳後除吳郡太守前廢帝卽位以爲金紫光祿大夫初孝武寵姬殷貴妃薨莊爲誅言贊軌堯門引漢昭帝母趙婕妤好堯母門事廢帝在東宮銜之至是遣人詰莊曰卿昔作殷貴妃誅知有東宮不將誅之孫奉伯說帝曰死是人之所同政復一往之苦不足爲困莊少長富貴且繫之

尙方使知天下苦劇然後殺之未晚帝曰卿言有理繫於左尙方明帝定亂得出使爲敕詔莊夜出署門方坐命酒酌之已微醉傳詔立待詔成其文甚工後爲尋陽王師加中書令散騎常侍尋加金紫光祿大夫給親信二十人卒贈右光祿大夫謚憲子所著文章四百餘首行於世五子颺肫顙從瀟世謂莊名子以風月景山水颺位晉平太守女爲順帝皇后追贈金紫光祿大夫

肫字敬冲幼聰慧莊器之常置左右十歲能屬文莊游土山使肫命篇攬筆便就琅邪王景文謂莊曰賢子足稱神童復爲後來特達莊撫肫背曰真吾家千金宋孝武帝游姑孰敕莊攜肫從駕詔爲洞井讚於坐奏之帝曰雖小奇童也仕宋爲衛將軍袁粲長史粲性簡峻時人方之李膺肫謁退粲曰謝令不死矣宋明帝嘗敕肫與謝鳳子超宗從鳳莊門入二人俱至超宗曰君命不可以不往乃趨而入肫曰君處臣以禮進退不入時人兩稱之以比王尊王陽後爲臨川內史以賄見劾袁粲寢其事齊高帝爲驃騎將軍輔政選肫爲長史高帝方圖禪代欲以肫佐命遷左長史每夕置酒獨與肫論魏晉故事言石苞不早勸

晉文死方慟哭方之馮異非知機也肅曰昔魏臣有勸魏武帝卽位魏武曰有
用我者其周文王乎晉文世事魏氏將必終身北面假使魏早依唐虞故事亦
當三讓彌高帝不悅更引王儉爲左長史以肅爲侍中領祕書監及齊受禪肅
當日在直百僚陪位侍中當解璽肅佯不知曰有何公事傳詔云解璽授齊王
肅曰齊自應有侍中乃引枕臥傳詔懼乃使稱疾欲取兼人肅曰我無疾何所
道遂朝服出東掖門乃得車仍還宅是日遂以王儉爲侍中解璽旣而武帝請
誅肅高帝曰殺之則成其名正應容之度外又以家貧乞郡辭旨抑揚詔免官
禁錮五年永明中爲義興太守在郡不省雜事悉付綱紀曰吾不能作主者吏
但能作太守耳歷都官尙書中書令侍中領新安王師求出仍爲吳興太守明
帝謀入嗣位引朝廷舊臣肅內圖止足且實避事弟濬時爲吏部尙書肅至郡
致齋數斛酒遺書曰可力飲此勿豫人事肅居郡每不理常務聚斂衆頗譏之
亦不屑也建武四年徵爲侍中中書令不應遣諸子還都獨與母留築室郡之
西郭明帝詔加優禮旌其素概賜牀帳褥席奉以卿祿時國子祭酒廬江何胤

亦抗表還會稽永元中詔徵肫胤並不屈時東昏皆命迫遣會梁武帝起兵及建鄴平徵肫胤並補軍諮祭酒皆不至及卽位詔徵肫爲侍中左光祿大夫開府儀同三司胤散騎常侍特進右光祿大夫又並不屈仍遣領軍司馬王果敦譬肫胤謀於何胤胤欲獨高其節給曰興王之世安可久處明年六月肫輕出詣闕自陳帝笑曰子陵遂能屈志詔以爲侍中司徒尙書令肫辭脚疾不堪拜謁乃角巾自輿詣雲龍門謝詔見於華林園乘小車就席明旦乘輿出幸肫宅宴語盡歡肫固陳本志不許又固請自還迎母許之臨發輿駕臨幸賦詩餞別王人送迎相望於道到都敕材官起府於舊宅武帝臨軒遣謁者於府拜授詔停諸公事及朔望朝謁三年元會詔肫乘小輿升殿肫素憚煩及居台鉞兼掌內臺職事多不覽以此頗失衆望其年母憂尋有詔攝職如故五年改授中書監司徒衛將軍固讓不受遣謁者敦授留府門及暮至於經春夏八月乃拜受焉是冬薨車駕出臨哭諡曰靖孝武初肫爲吳興以雞卵賦人收雞數千及遁節不全爲清談所少著書及文章行於世子讓位司徒右長史坐殺牛廢黜爲

東陽內史及還五官送錢一萬止留一百答曰數多劉寵更以爲愧

次子諲不妄交接門無雜賓有時獨醉曰入吾室者但有清風對吾飲者唯當明月位右光祿大夫子哲字穎豫美風儀舉止醞藉襟情豁朗爲士君子所重仕梁至廣陵太守侯景之亂因寓居焉仕陳歷吏部尚書中書令侍中司徒左長史卒諡康子

穎字仁悠肫弟也少簡靜宋末爲豫章太守至石頭遂白服登烽火樓坐免官詣齊高帝自占謝言辭清麗容儀端雅左右爲之傾目宥而不問齊永明初高選文學以穎爲竟陵王友歷吏部郎有簡秀之目卒於北中郎長史

穎弟瀟字儀潔年七歲王景文見而異之於宋孝武召見於人衆中瀟舉止閑詳應對合旨帝悅詔尙公主景和敗事寢僕射褚彥回以女妻之厚爲資送性甚敏贍嘗與劉俊飲推讓久之俊曰謝莊兒不可云不能飲瀟曰苟得其人自可流湏千日俊甚慚無言仕齊累遷中書侍郎衛軍王儉引爲長史雅相禮遇後拜吏部尚書明帝廢鬱林領兵入殿左右驚走報瀟瀟與客圍棋每下子

輒云其當有意竟局乃還齋臥竟不問外事明帝卽位瀹又屬疾不知公事蕭
諶以兵臨起之瀹曰天下事公卿處之足矣且死者命也何足以此懼人後宴
會功臣上酒尙書令王晏等興席瀹獨不起曰陛下受命應天王晏以爲己力
獻觴遂不見報上大笑解之坐罷晏呼瀹共載欲相撫悅瀹又正色曰君巢窟
在何處晏初得班劍瀹謂曰身家太傅裁得六人若何事頓得二十晏甚憚之
謂江柘曰彼上人者難爲訓對加領右軍將軍兄拙在吳興論啓公事稽晚瀹
輒代拙爲啓上知非拙手迹被問見原永泰元年卒於太子詹事贈金紫光祿
大夫諡簡子初拙爲吳興瀹於征虜渚送別拙指瀹口曰此中唯宜飲酒瀹建
武之朝專以長酣爲事與劉瑱沈昭略交飲各至數斗齊武帝問王儉當今誰
能爲五言儉曰拙得父膏腴江淹有意上起禪靈寺敕瀹撰碑文瀹子覽
覽字景滌選尙齊錢唐公主拜駙馬都尉梁武平建鄴朝士王亮王瑩等數人
揖自餘皆拜覽時年二十餘爲太子舍人亦長揖而已意氣閑雅視瞻聰明武
帝目送良久謂徐勉曰覺此生芳蘭竟體想謝莊政當如此自此仍被賞味天

監元年爲中書侍郎掌吏部事項之卽真嘗侍坐受敕與侍中王暕爲詩答贈其文甚工乃使重作復合旨帝賜詩云雙文旣後進二少實名家豈伊爾棟隆信乃俱國華爲侍中頗樂酒因宴席與散騎常侍蕭琛辭相詆毀爲有司所奏武帝以覽年少不直出爲中權長史後拜吏部尙書出爲吳興太守中書舍人黃睦之家居烏程子弟專橫前太守皆折節事之覽未到郡睦之弟迎覽覽逐去其船杖吏爲通者自是睦之家杜門不出郡境多劫爲東道患覽下車肅然初齊明帝及覽父瀟東海徐孝嗣並爲吳興號爲各守覽皆過之覽昔在新安頗聚斂至是遂稱廉潔時人方之王述卒於官贈中書令

覽弟舉字言揚幼好學與覽齊名年十四嘗贈沈約詩爲約所賞弱冠丁父憂幾致毀滅服闋爲太常博士與兄覽俱預元會江淹一見並相欽挹曰所謂馭二龍於長塗者也爲太子家令掌管記深爲昭明太子賞接祕書監任昉出爲新安郡別舉詩云詎念耄嗟人方深老夫託其屬意如此梁武嘗訪舉於覽覽曰識藝過臣甚遠唯飲酒不及於臣帝大悅尋除安成郡守母往於郡喪辭不

赴歷位左戶尚書遷掌吏部尚書舉祖莊父藩兄覽並經此職前代少比舉尤長玄理及釋氏義爲晉陵郡時常與義學僧遞講經論徵士何胤自虎丘山出赴之其盛如此先是北度人盧廣有儒術爲國子博士於學發講僕射徐勉以下畢至舉造坐屢折廣辭理適邁廣深歎服仍以所執麈尾斑竹杖滑石書格薦之以況重席焉加侍中遷尚書右僕射大同二年出爲吳郡太守先是何敬容居郡有美績世稱爲何吳郡及舉爲政聲跡略相比曾要何徵君講中論何難以巾褐入南門乃從東困進致詩往復爲虎丘山賦題于寺入爲侍中太子詹事翊左將軍舉父藩齊時終此官累表乞改敕不許後遷尚書僕射侍中將軍如故舉雖屢居端揆未嘗肯預時政保身固寵不能有所發明因疾陳解敕輒賜假并敕處方加給上藥其恩遇如此侯景來降帝詢訪朝臣舉及朝士皆請拒之帝從朱异言納之以爲景能立功趙魏舉等不敢復言太清二年遷尚書令卒於內臺上曰舉非止歷官已多亦人倫儀表久著公望悵恨未授之可贈侍中衛將軍開府儀同三司舉宅內山齋捨以爲寺泉石之美殆若自然臨

川始興諸王常所游踐邵陵王綸於婁湖立園廣讌酒後好聚衆賓冠手自裂破投之唾壺皆莫敢言舉嘗預宴王欲取舉憤舉正色曰裂冠毀冕下官弗敢聞命拂衣而退王屢召不返甚有慚色舉托情玄勝尤長佛理注淨名經常自講說有文集二十卷子嘏

嘏字含茂風神清雅頗善屬文仕梁爲太子中庶子建安太守侯景之亂之廣州依蕭勃勃敗在周迪門後依陳寶應寶應平方詣闕歷侍中中書令都官尙書卒諡曰光子有文集行於世子儼位侍中御史中丞太常卿位尙書僕射舉兄子僑字國美父玄大仕梁侍中僑素貴嘗一朝無食其子啓欲以班史質錢答曰寧餓死豈可以此充食乎太清元年卒集十卷長子禕僑弟札字世高亦博涉文史位湘東王諮議先僑卒

論曰易云積善之家必有余慶弘微立履所蹈人倫播美其世濟不隕蓋有馮焉敬冲出入三代驟經遷革遁俗之志無聞貞固之道居官之方未免貨財之累因偃成敬偃仰當年古人云處士全盜虛聲斯之謂矣

南史卷二十

南史卷二十考證

謝密傳弘微與琅邪王慧王球○慧宋書作惠

謝莊傳藍田生玉豈虛也哉○生一本作出

晝夜惛懵爲此不復得朝謁諸王○謁監本訛修今從宋書

謝朓傳及還五官送錢一萬止留一百○官監本訛官今從閣本

南史卷二十考證

南史卷二十

南史卷二十 卷二十一 卷二十二 卷二十三 卷二十四 卷二十五 卷二十六 卷二十七 卷二十八 卷二十九 卷三十

南史卷三十 卷三十一 卷三十二 卷三十三 卷三十四 卷三十五 卷三十六 卷三十七 卷三十八 卷三十九 卷四十

南史卷四十 卷四十一 卷四十二 卷四十三 卷四十四 卷四十五 卷四十六 卷四十七 卷四十八 卷四十九 卷五十

南史卷五十 卷五十一 卷五十二 卷五十三 卷五十四 卷五十五 卷五十六 卷五十七 卷五十八 卷五十九 卷六十

南史卷六十

南史卷二十一

唐

李

延

壽

撰

列傳第十一

王弘

子錫 僧祐子籍

錫弟僧達 弘從孫瞻

會孫融 弘玄孫冲

弘弟子微 冲子瑒

微兄遠 瑜

遠子僧祐

王弘字休元琅邪臨沂人也曾祖導晉丞相祖洽中領軍父珣司徒弘少好學

以清悟知名弱冠為會稽王道子驃騎主簿珣頗好積聚財物布在人間及薨

弘悉燔券書一不收責其餘舊業悉委諸弟時內外多難在喪者皆不得終其

哀唯弘徵召一無所就桓玄剋建業收道子付廷尉臣吏莫敢瞻送弘時尚居

喪獨道側拜辭攀車涕泣論者稱焉宋武帝召補鎮軍諮議參軍以功封華容

縣五等侯累遷太尉左長史從北征前鋒已平洛陽而未遣九錫弘銜使還都

諷朝廷時劉穆之掌留任而旨乃從北來穆之愧懼發病遂卒宋國建為尚書

僕射掌選領彭城太守奏彈世子左衛率謝靈運為軍人桂興淫其嬖妾靈運

殺與棄屍洪流御史中丞王淮之曾不彈舉武帝答曰端右肅正風軌誠副所

期自今以爲永制於是免靈運官後遷江州刺史省賦簡役百姓安之永初元年以佐命功封華容縣公三年入朝進號衛將軍開府儀同三司帝因宴集曰我布衣始望不至此傅亮之徒並撰辭欲盛稱功德弘率爾對曰此所謂天命求之不可得推之不可去時稱其簡舉少帝景平二年徐羨之等謀廢立召弘入朝文帝卽位以定策安社稷進位司空封建安郡公固辭見許進號車騎大將軍開府刺史如故徐羨之等以廢弑罪將及誅弘以非首謀且弟曇首又爲上所親委事將發密使報弘羨之旣誅遷侍中司徒揚州刺史錄尙書事給班劍三十人上西征謝晦與彭城王義恭居守入住中書下省引隊仗出入司徒府權置參軍元嘉五年春大旱弘引咎遜位先是彭城王義康爲荊州刺史鎮江陵平陸令河南成粲與弘書誠以盈滿兼陳彭城王宜入知朝政竟陵衡陽宜出據列藩弘由是固自陳請乃遷爲衛將軍開府儀同三司六年弘又上表陳彭城王宜入輔并求解州義康由是代弘爲司徒與之分錄弘又辭分錄弘博練政體留心庶事斟酌時宜每存優允與八座丞郎疏曰同伍犯法無人士

不罪之科然每至詰謫輒有請訴若常垂恩宥則法廢不行依事糾責則物以爲苦恐宜更爲其制時議多不同弘以爲謂之人士便無庶人之坐署爲庶人輒受人士之罰不其頗歟謂人士可不受同伍之謫取罪其奴客庸何傷邪無奴客可令輸贖有修身閭閻與羣小實隔又或無奴僮爲衆所明者官長二千石便親臨列上依事遣判又主守偷五疋常偷四十疋並加大辟議者咸以爲重弘以爲小吏無知臨財易昧或由踈慢事蹈重科宜進主守偷十疋常偷五十疋死四十疋降以補兵至於官長以上荷蒙榮祿冒利五疋乃已爲弘士人至此何容復加哀矜且此輩人士可殺不可謫謂宜奏聞決之聖旨文帝從弘議弘又上言舊制人年十三半役十六全役今四方無事應存消息請以十五至十六爲半丁十七爲全丁從之及弟曇首亡文帝嗟悼不已見弘流涕獻歎弘斂容而已旣而彭城王義康言於帝曰曇首旣爲家寶又爲國器弘情不稱何也帝曰賢者意不可度其見體亮如此九年進位太保領中書監餘如故其年薨贈太保中書監給節加羽葆鼓吹增班劍爲六十人謚曰文昭公配食武

帝廟庭弘既人望所宗造次必存禮法凡動止施爲及書翰儀體後人皆依放之謂爲王太保家法雖歷藩輔而不營財利薨亡之後家無餘業而輕率少威儀客有疑其諱者弘曰家諱與蘇子高同性褊隘人有忤意輒加詈辱少嘗擣蒲公城子野舍及後當權有人就弘求縣此人嘗以蒲戲得罪弘詰之曰君得錢會戲何用祿爲答曰不審公城子野何所在弘默然自領選及當朝總錄將加榮爵於人者每先呵責譴辱之然後施行若美相盼接語欣懽者必無所諧人問其故答曰王爵既加於人又相撫勞便成與主分功此所謂姦以事君者也若求者絕官敘之分既無以爲惠又不微借顏色卽大成怨府亦鄙薄所不任問者悅伏子錫嗣

錫字寡光位太子左衛率江夏內史高自位遇太尉江夏王義恭當朝錫箕踞大坐殆無推敬卒子僧亮嗣齊受禪降爵爲侯僧亮弟僧衍位侍中僧衍弟僧達

僧達幼聰敏弘爲揚州時僧達六七歲遇有通訟者竊覽其辭謂爲有理及大

訟者亦進弘意其小留左右僧達爲申理闇誦不失一句兄錫質訥乏風采文帝聞僧達早慧召見德陽殿應對閑敏上甚知之妻以臨川王義慶女少好學善屬文爲太子舍人坐屬疾而於揚列橋觀鬪鴨爲有司所糾原不問性好鷹犬與閩里少年相馳逐又躬自屠牛義慶聞之令周旋沙門慧觀造而觀之僧達陳書滿席舉論文義慧觀酬答不暇深相稱美訴家貧求郡文帝欲以爲秦郡吏部郎庾仲文曰王弘子旣不宜作秦郡僧達亦不堪莅人乃止遷太子洗馬母憂去職與兄錫不協錫罷臨海郡還送故及奉祿百萬以上僧達一夕令奴輦取無餘服闋爲宣城太守性好游獵而山郡無事僧達肆意馳騁或五日三日方歸受辭辯訟多在獵所人或逢不識問府君所在僧達且曰在近其後徙義興及元凶弒立孝武發尋陽沈慶之謂人曰王僧達必來赴義人問其所以慶之曰虜馬飲江王出赴難見其在先帝前議論開張執意明決以此言之其必至也僧達尋至孝武卽以爲長史及卽位爲尙書右僕射僧達自負才地三年間便望宰相嘗答詔曰亡父亡祖司徒司空其自負若此後爲護軍將軍

不得志乃求徐州上不許固陳乃以爲吳郡太守時暮歲五遷彌不得意吳郭西臺寺多富沙門僧達求須不稱意乃遣主簿顧曠率門義劫寺內沙門竺法瑤得數百萬荆江夏反叛加僧達置佐領兵臺符聽置千人而輒立三十隊隊八十人立宅於吳多役功力坐免官後孝武獨召見愀然了不陳遜唯張目而視及出帝歎曰王僧達非狂如何乃戴面向天子後顏師伯詣之僧達慨然曰大丈夫寧當玉碎安可以沒沒求活師伯不答逡巡便退初僧達爲太子洗馬在東宮愛念軍人朱靈寶及出爲宣城靈寶已長僧達詐列死亡寄宣城左丞之籍注以爲子改名元序啓文帝以爲武陵國典衛令又以補竟陵國典書令建平國中軍將軍孝建元年事發又加禁錮表謝言不能因依左右傾意權貴上愈怒僧達族子確少美容僧達與之私款確叔父休爲永嘉太守當將確之郡僧達欲逼留之確知其意避不往僧達潛於所住屋後作大阮欲誘確來別殺埋之從弟僧虔知其謀禁呵乃止御史中丞劉瑀奏請收案上不許二年除太常意尤不悅頃之上表解職文旨抑揚侍中何偃以其言不遜啓付南臺

又坐免官先是何尚之致仕復膺朝命於宅設八關齋大集朝士自行香次至僧達曰願郎且放鷹犬勿復游獵僧達答曰家養一老狗放無處去已復還尙之失色大明中以歸順功封寧陵縣五等侯累遷中書令黃門郎路瓊之太后兄慶之孫也宅與僧達門並嘗盛車服詣僧達僧達將獵已改服瓊之就坐僧達了不與語謂曰身昔門下騶人路慶之者是君何親遂焚瓊之所坐牀太后怒泣涕於帝曰我尙在而人陵之我死後乞食矣帝曰瓊之年少無事詣王僧達門見辱乃其宜耳僧達貴公子豈可以此加罪乎太后又謂帝曰我終不與王僧達俱生先是南彭城蕃縣人高闍沙門釋曇標道方等共相誑惑自言有鬼神龍鳳之瑞常聞簫鼓音與秣陵人藍宕期等謀爲亂又結殿中將軍苗乞食等起兵攻宮門事發凡黨與死者數十人僧達履經犯忤以爲終無悛心因高闍事陷之收付廷尉於獄賜死時年三十六帝亦以爲恨謂江夏王義恭曰王僧達遂不免死追思太保餘烈使人慨然於是詔太保華容文昭公門爵國姻一不貶絕時有蘇寶者名寶生本寒門有文義之美官至南臺侍御史江寧

令坐知高閣謀反不卽聞啓亦伏誅僧達子道琰徙新安元徽中爲廬陵內史未至郡卒子融

融字元長少而神明警慧母臨川太守謝惠宣女性敦敏教融書學博涉有文才從叔儉謂人曰此兒至四十名位自然及祖舉秀才累遷太子舍人以父宦不通弱年便欲紹興家業啓齊武帝求自試遷祕書丞從叔儉初有儀同之授贈儉詩及書儉甚奇之笑謂人曰穰侯印詎便可解歷丹陽丞中書郎永明末武帝欲北侵使毛惠秀畫漢武北伐圖融因此上疏開張北侵之議圖成上置琅邪城射堂壁上游幸輒觀焉九年芳林園禊宴使融爲曲水詩序當時稱之上以融才辯使兼主客接魏使房景高宋弁弁見融年少問主客年幾融曰五十之年久踰其半景高又云在北聞主客曲水詩序勝延年實願一見融乃示之後曰宋弁於瑤池堂謂融曰昔觀相如封禪以知漢武之德今覽王生詩序用見齊主之盛融曰皇家盛明豈直比蹤漢武更慚鄙製無以遠匹相如上以魏所送馬不稱使融問之曰秦西冀北實多駿驥而魏之良馬乃駑不若將旦

且信誓有時而爽駟駟之牧遂不能嗣宋弁曰當是不習地土融曰周穆馬迹徧於天下若騏驎之性因地而遷則造父之策有時而躓弁曰王主客何爲勤勤於千里融曰卿國旣異其優劣聊復相訪若千里斯至聖上當駕鼓車弁曰向意旣須必不能駕鼓車也融曰買死馬之骨亦以郭隗之故弁不能答融躁於名利自恃人地三十內望爲公輔初爲司徒法曹詣王僧祐因遇沈昭略未相識昭略屢顧盼謂主人曰是何年少融殊不平謂曰僕出於扶桑入於暘谷照耀天下誰云不知而卿此問昭略云不知許事且食蛤蜊融曰物以羣分方以類聚君長東隅居然應嗜此族其高自標置如此及爲中書郎嘗撫案歎曰爲爾寂寂鄧禹笑人行遇朱雀桁開路人填塞乃推車壁曰車中乃可無七尺車前豈可乏八騶及魏軍動竟陵王子良於東府募人板融寧朔將軍軍主融文辭捷速有所造作援筆可待子良特相友好晚節大習騎馬招集江西僉楚數百人並有幹用融特爲謀主武帝病篤蹙絕子良在殿內太孫未入融戎服絳衫於中書省閣口斷東宮仗不得進欲矯詔立子良詔草已立上重蘇朝事

委西昌侯鸞梁武謂范雲曰左手據天下圖右手刎其喉愚夫不爲主上大漸
國家自有故事道路籍籍將有非常之舉卿聞之乎雲不敢答俄而帝崩融乃
處分以子良兵禁諸門西昌侯聞急馳到雲龍門不得進乃曰有敕召我仍排
而入奉太孫登殿命左右扶出子良指麾音響如鍾殿內無不從命融知不遂
乃釋服還省歎曰公誤我鬱林深怨融卽位十餘日收下廷尉獄使中丞孔珪
倚爲奏曰融姿性剛險立身浮競動迹驚羣抗言異類近塞外微塵苦求將領
遂招納不逞扇誘荒僇狡弄威聲專行權利反覆唇齒之間傾動頰舌之內威
福自己無所忌憚誹謗朝政歷毀王公謂己才流無所推下事暴遠近使融依
源據答融辭曰囚實頑蔽觸行多愆但夙忝門素得奉教君子爰自總髮迄將
立年州閭鄉黨見許愚賚過蒙大行皇帝獎育之恩又荷文皇帝識擢之重司
徒公賜預士林安陸王曲垂盼接前後陳伐虜之計亦仰簡先朝今段犬羊乍
擾令囚草撰符詔及司徒宣敕招募同例非一實以戎事不小不敢承教續蒙
軍號賜使招集銜敕而行非敢虛扇且張弄威聲應有形迹專行權利又無賊

賄反覆唇齒之間未審悉與誰言傾動頰舌之內不容都無主此自上甘露頌
及銀甕啓三日詩序接虜使語辭竭思稱揚得非誹謗囚才分本劣謬被策用
悚怍之情夙宵兢惕自循自省並愧流言伏惟明皇臨宇普天蒙澤戾寅赦恩
輕重必宥百日曠期始蒙旬日一介罪身獨嬰憲劾融被收朋友部曲參問北
寺相繼於道請救於子良子良不敢救西昌侯故爭不得詔於獄賜死時年二
十七臨死歎曰我若不爲百歲老母當吐一言融意欲指斥帝在東宮時過失
也先是太學生會稽魏準以才學爲融所賞旣欲奉子良而準鼓成其事太學
生虞羲丘國賓竊相謂曰竟陵才弱王中書無斷敗在眼中矣及融誅召準入
舍人省詰問遂懼而死舉體皆青時人以準膽破融文集行於世

微字景玄弘弟光祿大夫孺之子也少好學善屬文工書兼解音律及醫方卜
筮陰陽數術之事宋文帝賜以名著初爲始興王友父憂去職微素無宦情服
闋除南平王鑠右軍諮議參軍仍爲中書侍郎時兄遠免官歷年微歎曰我兄
無事而屏廢我何得而叨忝踰分文帝卽以遠爲光祿勳微爲文好古言頗抑

揚袁淑見之謂爲訴屈吏部尙書江湛舉微爲吏部郎微確乎不拔時論者或云微之見舉廬江何偃亦參其議偃慮爲微所咎與之書自陳微報書深言塵外之適其從弟僧綽宣文帝旨使就職因留之宿微妙解天文知當有大故獨與僧綽仰視謂曰此上不欺人非智者其孰能免之遂辭不就尋有元凶之變微常住門屋一間尋書玩古遂足不履地終日端坐牀席皆生塵埃唯當坐處獨淨弟僧謙亦有才譽爲太子舍人遇疾微躬自處療而僧謙服藥失度遂卒深自咎恨發病不復自療哀痛僧謙不能已以書告靈僧謙卒後四旬而微終遺令薄葬不設鞀旐鼓挽之屬施五尺牀爲靈二宿便毀以常所彈琴置牀上何長史偃來以琴與之無子家人遵之所著文集傳於世贈祕書監微兄遠字景舒位光祿勳時人謂遠如屏風屈曲從俗能蔽風露言能不乖物理也

遠子僧祐字胤宗幼聰悟叔父微撫其首曰兒神明意用當不作率爾人雅爲從兄儉所重每鳴笳列騶到其門候之僧祐輒稱疾不前儉曰此吾之所望於若人也世皆推儉之愛名德而重僧祐之不趨勢也未弱冠頻經憂居喪至孝

服闋髮落略盡殆不立冠帽舉秀才爲驃騎法曹羸瘠不堪受命雅好博古善
老莊不尚繁華工草隸書鼓琴亭然獨立不交當世沛國劉瓛聞風而悅上書
薦之爲著作佐郎遷司空祭酒謝病不與公卿游齊高帝謂王儉曰卿從可謂
朝隱答曰臣從非敢妄同高人直是愛閑多病耳經贈儉詩云汝家在市門我
家在南郭汝家饒賓侶我家多鳥雀儉時聲高一代賓客填門僧祐不爲之屈
時人嘉之稍遷晉安王文學而陳郡袁利爲友詩人以爲妙選齊武帝數闋武
僧祐獻講武賦王儉借觀不與竟陵王子良聞其工琴於坐取琴進之不從命
永明末爲太子中舍人在直屬疾不待對人輒去中丞沈約彈之云肆情運氣
不顧朝典揚眉闊步直轡高驅坐贖論時何點王思遠之徒請交並不降意自
天子至於侯伯未嘗與一人游卒於黃門郎子籍

籍字文海仕齊爲餘杭令政化如神善於擿伏自下莫能欺也性頗不儉俄然
爲百姓所訟又爲錢塘縣下車布政咸謂數十年來未之有也籍好學有才氣
爲詩慕謝靈運至其合也殆無愧色時人咸謂康樂之有王籍如仲尼之有丘

明老聃之有嚴周梁天監中爲輕車湘東王諮議參軍隨府會稽郡至若邪溪賦詩云蟬噪林逾靜鳥鳴山更幽劉孺見之擊節不能己己以公事免及爲中散大夫彌忽忽不樂乃至徒行市道不擇交游有時塗中見相識輒以笠傘覆面後爲作唐侯相小邑寡事彌不樂不理縣事人有訟者鞭而遣之未幾而卒籍又甚工草書筆勢適放蓋孔琳之流亞也湘東王集其文爲十卷云

瞻字思範弘從孫也祖柳字休季位光祿大夫東亭侯父猷字世倫位侍中光祿大夫瞻年六歲從師時有伎經門過同業皆出觀瞻獨不視習業如初從父僧遠聞而異之謂其父猷曰大宗不衰寄之此子年十二居父憂以孝聞服闋襲封東亭侯後頗好逸游爲閩里患以輕薄稱及長折節修士操涉獵書記善碁工射歷位驃騎將軍王晏長史晏誅出爲晉陵太守潔己爲政妻子不免飢寒時號廉平王敬則作亂瞻赴都敬則經晉陵郡人多附之敬則敗臺軍討賊黨瞻言愚人易動不足窮法齊明帝從之所全萬數遷御史中丞梁臺建爲侍中吏部尙書性率亮居選部所舉多行其意頗嗜酒每飲或彌日而精神朗瞻

不廢簿領梁武每稱瞻有三術射棊酒也卒諡康侯子長玄早卒弘四弟虞柳
孺曇首虞字林仲位廷尉卿虞子深字景度有美名位新安太守柳孺事列於
前曇首別卷

沖字長深弘玄孫也祖僧衍位侍中父茂璋字胤光仕梁位給事黃門侍郎沖
母梁武帝妹新安公主卒於齊世武帝深鍾愛沖賜爵東安亭侯累遷侍中南
郡太守習於法令政號平理雖無赫赫之譽久而見思曉音樂習歌舞善與人
交貴游之中聲名籍甚侯景之亂元帝承制沖求解南郡讓王僧辯并獻女伎
十人以助軍賞侯景平授丹陽尹魏平江陵敬帝爲太宰承制以沖爲左長史
紹泰中累遷光祿大夫尙書左僕射開府儀同三司給扶陳武帝受禪領太子
少傅加特進左光祿大夫領丹陽尹參撰律令帝以沖前代舊臣特申長幼之
敬文帝卽位益加尊重嘗從幸司空徐度宅宴筵之上賜以几光大元年薨年
七十六贈司空諡曰元簡沖有子三十人並致通官第十二子瑒

瑒字子瑛沉靜有器局美風儀梁元帝時位太子中庶子陳武帝入輔以爲司

徒左長史文帝卽位累遷太子中庶子散騎常侍侍中父冲嘗爲瑒辭領中庶子文帝顧冲曰所以久留瑒於承華正欲使太子微有瑒風法耳宣帝卽位歷中書令吏部尙書瑒性寬和務清靜無所抑揚遷尙書左僕射加侍中參選事瑒居家篤睦每歲時饋遺徧及近親敦誘諸弟稟其規訓卒贈特進諡曰光子瑒弟瑜字子珪亦知名美容儀年三十官至侍中永定元年使齊以陳郡袁憲爲副齊以王琳故囚之齊文宣每行載死囚以從齊人呼曰供御囚每佗怒則召殺之瑜及憲並危殆者數矣齊僕射楊遵彥每救護之天嘉二年還朝復爲侍中卒諡曰貞子

論曰語云不有君子其能國乎晉自中原沸騰介居江左以一隅之地抗衡上國年移三百蓋有憑焉其初諺云王與馬共天下蓋王氏人倫之盛實始是矣及夫休元弟兄並舉棟梁之任下逮世嗣無虧文雅之風其所以簪纓不替豈徒然也僧達猖狂成性元長躁競不止闕

南史卷二十一考證

列傳第十一王弘子錫錫弟僧達○弟監本訛子今改正

王錫傳錫箕踞大坐殆無推敬卒子僧亮嗣○此子字承弘而言或因此不查宋書而遂以爲錫子因稱僧達爲孫并疑僧達傳兄錫爲訛誤矣

王僧達傳寄宣城左丞之籍注以爲子○之籍監本作籍之今改從宋書

王瞻傳爲侍中吏部尚書性率亮居選部所舉多行其意○居選部所舉多行其意句監本誤居選所舉其意多行今改從梁書

南史卷二十一考證

Blank page with vertical lines for text.

南史卷二十二

唐

李

延

壽

撰

列傳第十二

王曇首

子僧綽
諫子承

孫儉
訓

僧孫騫
僧綽弟僧虔

騫子規
僧虔子慈

騫弟暕
慈子泰

慈弟志
志弟彬

志弟子筠
寂

王曇首太保弘之弟也幼有素尚兄弟分財曇首唯取圖書而已辟琅邪王大司馬屬從府公修復洛陽園陵與從弟球俱詣宋武帝帝曰並膏梁世德乃能屈志戎旅曇首答曰既從神武自使懦夫立志時謝晦在坐曰仁者果有勇帝悅及至彭城大會戲馬臺賦詩曇首文先成帝問弘曰卿弟何如卿答曰若但如下官門戶何寄帝大笑曇首有智局喜愠不見於色閨門內雍雍如也手不執金玉婦女亦不得以爲飾玩自非祿賜一毫不受於人爲文帝鎮西長史武帝謂文帝曰曇首輔相才也汝可每事諮之及文帝被迎入奉大統議者皆致疑曇首與到彥之從兄華並勸上行上猶未許曇首固諫并言天人符應上乃

下率府州文武嚴兵自衛臺所遣百官衆力不得近部伍中兵參軍朱容子抱刀在平乘戶外不解帶者累旬及卽位謂曇首曰非宋昌獨見無以致此以曇首爲侍中領驍騎將軍容子爲右軍將軍誅徐羨之等及平謝晦皆曇首及華力也元嘉四年車駕出北堂使三更竟開廣莫門南臺云應須白獸幡銀字棨不肯開尙書左丞羊玄保奏免御史中丞傅隆旨下曇首曰旣無異敕又闕幡棨雖稱上旨不異單刺元嘉元年二年雖有再開門例此乃前事之違今之守舊未爲非禮其不請白獸幡銀字棨致開門不時由尙書相承之失亦合糾正上特無問更立科條遷太子詹事侍中如故自謝晦平後上欲封曇首等會讌集舉酒勸之因拊御牀曰此坐非卿兄弟無復今日出詔以示之曇首曰豈可因國之災以爲身幸陛下雖欲私臣當如直史何封事遂寢時弘錄尙書事又爲揚州刺史曇首爲上所親委任兼兩宮彭城王義康與弘並錄意常怏怏又欲得揚州以曇首居中分其權任愈不悅曇首固乞吳郡文帝曰豈有欲建大廈而遺其棟梁賢兄比屢稱疾固辭州任將來若相申許此處非卿而誰時弘

久疾屢遜位不許義康謂賓客曰王公久疾不起神州詎合臥臨曇首勸弘減府兵力之半以配義康乃悅七年卒時年三十七文帝臨慟歎曰王詹事所疾不救國之衰也中書舍人周赳侍側曰王家欲衰賢者先殞上曰直是我家衰耳贈光祿大夫九年以預誅徐羨之等謀追封豫寧縣侯諡曰文孝武卽位配饗文帝廟庭子僧綽嗣

僧綽幼有大成之度衆便以國器許之好學練悉朝典年十三文帝引見拜便流涕哽咽上亦悲不自勝襲封豫寧縣侯尙文帝長女東陽獻公主初爲江夏王義恭司徒參軍累遷尙書吏部郎參掌大選究識流品任舉咸盡其分僧綽深沉有局度不以才能高人父曇首與王華並被任遇華子新建侯嗣才劣位遇亦輕僧綽嘗謂中書侍郎蔡興宗曰弟各位與新建齊弟超至今日蓋姻戚所致也遷侍中時年二十九始興王濬嘗問其年僧綽自嫌早達逡巡良久乃答其謙退若此元嘉末文帝頗以後事爲念大相付託朝政大小皆參焉從兄微清介士也懼其太盛勸令損抑僧綽乃求吳郡及廣州並不許會巫蠱事洩

上先召僧綽具言之及將廢立使尋求前朝舊典劾於東宮夜饗將士僧綽密以啓聞上又令撰漢魏以來廢諸王故事送與江湛徐湛之欲立隨王誕江湛欲立南平王鑠文帝欲立建平王宏議久不決誕妃卽湛之女鑠妃湛妹也僧綽曰建立之事仰由聖懷臣謂惟宜速斷幾事難密不可使難生慮表取笑千載上曰卿可謂能斷大事此事不可不殷勤且庶人始亡人將謂我無復慈愛之道僧綽曰恐千載之後言陛下惟能裁弟不能裁兒上默然江湛出閣謂僧綽曰卿向言將不傷直邪僧綽曰弟亦恨君不直及劾弑逆江湛在尙書上省聞變曰不用王僧綽言至此劾立轉僧綽吏部尙書及檢文帝巾箱及湛家書疏得僧綽所啓饗士并廢諸王事乃收害焉因此陷北第諸侯王以爲與僧綽有異志孝武卽位追贈金紫光祿大夫諡曰愍侯初太社西空地本吳時丁奉宅孫皓流徙其家江左初爲周顓蘇峻宅後爲袁悅宅又爲章武王司馬秀宅皆以凶終及給臧壽亦頻遇禍故世稱凶地僧綽嘗謂宅無吉凶請以爲第始造未及居而敗子儉

儉字仲寶生而僧綽遇害爲叔父僧虔所養四歲襲爵豫寧縣侯拜受茅土流涕嗚咽幼篤學手不釋卷賓客或相稱美僧虔曰我不患此兒無名政恐名太盛耳乃手書崔子玉座右銘以貽之丹陽尹袁粲聞其名及見之曰宰相之門也括柏豫章雖小已有棟梁氣矣終當任人家國事言之宋明帝選尚陽羨公主拜駙馬都尉帝以儉嫡母武康主同太初巫蠱事不可以爲婦姑欲開冢離葬儉因人自陳密以死請故事不行年十八解褐祕書郎太子舍人超遷祕書丞依七略撰七志四十卷表獻之又撰定元徽四部書目母憂服闋爲司徒右長史晉令公府長史著朝服宋大明以來著朱衣儉上言宜復舊制時議不許及蒼梧暴虐儉告袁粲求外出引晉新安主婿王獻之任吳興爲例補義興太守昇明二年爲長史兼侍中以父終此職固讓先是齊高帝爲相欲引時賢參讚大業時謝朓爲長史帝夜召朓却人與語久之朓無言唯有二小兒捉燭帝慮朓難之仍取燭遣兒朓又無言帝乃呼左右儉素知帝雄異後請間言於帝曰功高不賞古來非一以公今日位地欲北面居人臣可乎帝正色裁之而神

采內和儉因又曰儉蒙公殊眄所以吐所難吐何賜拒之深宋以景和元徽之淫虐非公豈復寧濟但人情澆薄不能持久公若小復推遷則人望去矣豈唯大業永淪七尺豈可得保帝笑曰卿言不無理儉又曰公今名位故是經常宰相宜禮絕羣后微示變革當先令褚公知之儉請銜命帝曰我當自往經少日帝自造彥回款言移晷乃謂曰我夢應得官彥回曰今授始爾恐一二年間未容便移且吉夢未必便在旦夕帝還告儉儉曰褚是未達理虞整時爲中書舍人甚閑辭翰儉乃自報整使作詔及高帝爲太尉引儉爲右長史尋轉左專見任用大典將行禮儀詔策皆出於儉褚彥回唯爲詔又使儉參懷定之齊臺建遷尙書左僕射領吏部時年二十八多所引進時客有姓譚者詣儉求官儉謂曰齊桓滅譚那得有君答曰譚子奔莒所以有僕儉賞其善據卒得職焉高帝嘗從容謂儉曰我今日當以青溪爲鴻溝對曰天應人順庶無楚漢之事時朝儀草創衣服制則未有定準儉議曰漢景六年梁王入朝中郎謁者金貂出入殿門左思魏都賦云藹藹列侍金貂齊光此藩國侍臣有貂之明文晉百官表

云太尉參軍四人朝服武冠此又宰府之明文又疑百僚敬齊公之禮儉又曰
晉王受命勸進云冲等眷眷稱名則應盡禮而世子禮秩未定儉又曰春秋曹
世子來朝待以上公之禮下其君一等今齊公九命禮冠列藩世子亦宜異數
並從之世子鎮石頭城仍以爲世子宮儉又曰魯有靈光殿漢之前例也聽事
爲崇光殿外齋爲宣德殿以散騎常侍張緒爲世子詹事車服悉依東宮制度
高帝踐阼與儉議佐命功臣從容謂曰卿謀謨之功莫與爲二卿止二千戶意
以爲少趙充國猶能自舉西零之任況卿與我情期異常儉曰昔宋祖創業佐
命諸公開國不過二千以臣比之唯覺超越上笑曰張良辭侯何以過此建元
元年改封南昌縣公時都下舛雜且多姦盜上欲立符伍家家以相檢括儉諫
曰京師翼翼四方是湊必也持符於事旣煩理成不曠謝安所謂不爾何以爲
京師乃止是歲有司奏定郊殷之禮儉以爲宜以今年十月殷祭宗廟自此以
後五年再殷祭二年正月上辛有事南郊卽以其日還祭明堂又用次辛饗祀
北郊而並無配從之明年轉左僕射領選如故初宋明帝紫極殿珠簾綺柱飾

以金玉江左所未有高帝欲以其材起宣陽門儉與褚彥回及叔父僧虔連名表諫上手詔酬納宋世宮門外六門城設竹籬是年初有發白虎樽言白門三重門竹籬穿不完上感其言改立都牆儉又諫上答曰吾欲後世無以加也朝廷初基制度草創儉問無不決上每曰詩云惟岳降神生甫及申今天爲我生儉也其年固請解選見許帝幸樂遊宴集謂儉曰卿好音樂孰與朕同儉曰沐浴唐風事兼比屋亦旣在齊不知肉味帝稱善後幸華林宴集使各效伎藝褚彥回彈琵琶王僧虔柳世隆彈琴沈文季歌子夜來張敬兒舞儉曰臣無所解唯知誦書因跪上前誦相如封禪書上笑曰此盛德之事吾何以堪之後上使陸澄誦孝經起自仲尼居儉曰澄所謂博而寡要臣請誦之乃誦君子之事上章上曰善張子布更覺非奇也於是王敬則脫朝服袒以絳糾髻奮臂拍張叫動左右上不悅曰豈聞三公如此答曰臣以拍張故得三公不可忘拍張時以爲名答儉尋以本官領太子詹事加兵三百人時皇太子妃薨左衛將軍沈文季經爲宮臣未詳服不儉議曰漢魏以來宮僚先備臣隸之節具體在三存旣

盡敬亡豈無服昔庾翼喪妻王允滕含猶謂府吏宜有小君之服况臣節之重宜依舊君之妻齊衰三月而除上崩遺詔以儉爲侍中尙書令鎮軍每上朝令史恆有三五十人隨上諮事辯析未嘗壅滯褚彥回時爲司徒錄尙書笑謂儉曰觀令判斷甚樂儉曰所以得厝私懷實由稟明公不言之化武帝卽位給班劍二十人進號衛將軍掌選時事有司以前代嗣位或仍前郊年或別爲郊始晉宋以來未有畫一儉議曰晉明帝太寧三年南郊其年九月崩成帝卽位明年改元亦郊簡文咸安三年南郊其年七月崩孝武卽位明年改元亦郊宋元嘉三十年正月南郊二月崩孝武嗣位明年亦郊此二代明例差可依放今聖明係業幽顯宅心言化則頻郊非嫌語事則元號初改禋燎登配孝敬兼遂謂明年正月宜饗禮二郊虞祭明堂自茲以後依舊間歲有司又以明年正月上辛應南郊而立春在上辛後郊在立春前爲疑儉曰宋景平元年正月三日辛丑南郊其月十一日立春元嘉十六年正月六日辛未南郊其月八日立春此近世明例也並從之永明二年領丹陽尹三年領國子祭酒又領太子少傅舊

太子敬二傅同至是朝議接少傅以賓友禮宋時國學頽廢未暇修復宋明帝泰始六年置總明觀以集學士或謂之東觀置東觀祭酒一人總明訪舉郎二人儒玄文史四科科置學士十人其餘令史以下各有差是歲以國學既立省總明觀於儉宅開學士館以總明四部書充之又詔儉以家爲府四年以本官領吏部先是宋孝武好文章天下悉以文采相尚莫以專經爲業儉弱年便留意三禮尤善春秋發言吐論造次必於儒教由是衣冠翕然並尚經學儒教於此大興何承天禮論三百卷儉抄爲八帙又別抄條目爲十三卷朝儀舊典晉末來施行故事撰次諳憶無遺漏者所以當朝理事斷決如流每博議引證先儒罕有其例八坐丞郎無能異者令史諮事賓客滿席儉應接銓序傍無留滯十日一還監試諸生巾卷在庭劍衛令史儀容甚盛作解散幘斜插簪朝野慕之相與放效儉常謂人曰江左風流宰相惟有謝安蓋自況也武帝深委仗之士流選用奏無不可五年儉卽本號開府儀同三司固讓六年重申前命先是詔儉三日一還朝尚書令史出諮事上以往來煩數詔儉還尚書下省月聽十

日出外儉啓求解選上不許七年乃上表固請見許改領中書監參掌選事其
年疾上親臨視薨年三十八詔衛軍文武及臺所給兵仗悉停侍葬又詔追贈
太尉加羽葆鼓吹增班劍爲六十人葬禮依太宰文簡公褚彥回故事謚文憲
公儉寡嗜慾唯以經國爲務車服塵素家無遺財手筆典裁爲當時所重少便
有宰臣之志賦詩云稷契匡虞夏伊呂翼商周及生子字曰玄成取仍世作相
之義撰古今喪服集記并文集並行於世梁武帝受禪詔爲儉立碑降爵爲侯
儉弟遜宋昇明中爲丹陽丞告劉彥節事不蒙封賞建元初爲晉陵太守有怨
言儉慮爲禍因褚彥回啓聞中丞陸澄依事舉奏詔以儉竭誠佐命特降刑書
宥遜遠徙永嘉郡於道伏誅長子騫嗣

騫字思寂本字玄成與齊高帝偏諱同故改焉性凝簡慕樂廣爲人未嘗言人
之短諸女子姪皆嬪王尙主朔望來歸輜輶填咽非所欲也敕歲中不過一稱
見嘗從容謂諸子曰吾家本素族自可依流平進不須苟求也歷黃門郎司徒
右長史不事產業有舊墅在鍾山八十餘頃與諸宅及故舊共佃之常謂人曰

我不如鄭公業有田四百頃而食常不周以此爲愧永元末召爲侍中不拜三年春枉矢晝見西方長十餘丈騫曰此除舊布新之象也及梁武起兵騫曰天時人事其在此乎梁武霸府建引爲大司馬諮議參軍遷侍中及帝受禪降封爲侯歷位度支尚書中書令武帝於鍾山西造大愛敬寺騫舊墅在寺側者卽王導賜田也帝遣主書宣旨就騫市之欲以施寺答云此田不賣若敕取所不敢言酬對又脫略帝怒遂付市評田價以直逼還之由是忤旨出爲吳興太守騫性侈於味而儉於服頗以多忌爲累又惰於接物雖主書宣敕或過時不見才望不及弟暕特以儉之嫡故不棄於時暕爲尚書左丞僕射當朝用事騫自中書令爲郡邑邑不樂在郡臥不視事徵復爲度支尚書加給事中領射聲校尉以母憂去職普通三年卒年四十九贈侍中金紫光祿大夫諡曰安子規規字威明八歲丁所生母憂居喪有至性齊太尉徐孝嗣每見必爲流涕稱曰孝童叔父暕亦深器重之常曰此兒吾家千里駒也年十二略通五經大義及長遂博涉有口辯爲本州迎主簿起家祕書郎累遷太子洗馬天監十二年改

造太極殿畢規獻新殿賦其辭甚工後爲晉安王綱雲麾諮議參軍久之爲新安太守父憂去職服闋襲封南昌縣侯除中書黃門侍郎敕與陳郡殷芸琅邪王錫范陽張緬同侍東宮俱爲昭明太子所禮湘東王繹時爲丹陽尹與朝士宴集屬規爲酒令規從容曰江左以來未有茲舉特進蕭琛金紫光祿大夫傅昭在坐並謂爲知言朱异嘗因酒卿規責以無禮普通初陳慶之北侵陷洛陽百僚稱慶規退曰可弔也又何賀焉道家有云非爲功難成功難也昔桓溫得而復失宋武竟無成功我孤軍無援深入寇境將爲亂階俄見覆沒六年武帝於文德殿錢廣州刺史元景隆詔羣臣賦詩同用五十韻規援筆立奏其文又美武帝嘉焉卽日授侍中後爲晉安王長史王立爲太子仍爲散騎常侍太子中庶子侍東宮太子賜以所服貂蟬并降令書悅是舉也尋爲吳郡太守主書芮珍宗家在吳前守宰皆傾意附之至是珍宗假還規遇之甚薄珍宗還都密奏規不理郡事俄徵爲左戶尚書郡境千餘人詣闕請留表三奏不許求於郡樹碑許之規常以門宗貴戚恆思減退後爲太子中庶子領步兵校尉辭疾

不拜遂於鍾山宋熙寺築室居焉卒贈光祿大夫諡曰文皇太子出臨哭與湘東王繹令曰王威明風韻適上神峯標映千里絕迹百尺無枝實俊人也一爾過隙永歸長夜金刀掩芒長淮絕涸去歲冬中已傷劉子今茲寒孟復悼王生俱往之傷信非虛說規集後漢衆家異同注續漢書二百卷文集二十卷子褒魏剋江陵入長安

暕字思晦騫弟也年數歲而風神警拔有成人之度時父儉作宰相賓客盈門見暕曰公才公望復在此矣弱冠選尚淮南長公主拜駙馬都尉歷祕書丞齊明帝詔求選士始安王遙光薦暕及東海王僧孺除暕騎從事中郎天監中歷位侍中吏部尚書領國子祭酒門貴與物隔不能留心寒素頗稱刻薄後爲尚書左僕射領國子祭酒卒諡曰靖子承訓並通顯

承字安期初爲祕書郎累遷中書黃門侍郎兼國子博士時膏腴貴遊咸以文學相尚罕以經術爲業唯承獨好儒業遷長史兼侍中俄轉國子祭酒承祖儉父暕皆爲此職三世爲國師前代未之有久之出爲東陽太守政存寬惠吏人

悅之卒郡謚曰章承性簡貴有風格右衛朱异當朝用事每休下車馬填門有魏郡申英者門寒才俊好危言高論以忤權右嘗指异門曰此中輻湊皆爲利往能不至者唯大小王東陽耳小東陽卽承弟穉也時唯承兄弟及褚翔不至异門世並稱之

訓字懷範生而紫胞師媪云法當貴幼聰警有識量僧正惠超見而奇之謂門人羅智國曰四郎眉目疎朗舉動和韻此是興門戶者智國以白暎暎亦曰不墜基業其在文殊文殊訓小字也年十三暎亡憂毀家人莫識十六召見文德殿應對爽徹上目送之久謂朱异曰可謂相門有相初補國子生問說師袁昂昂曰久藉高名有勞虛想及觀容止若披雲霧俄而諸袁子弟來昂謂諸助教曰我兒出十數若有一子如此實無所恨射策除祕書郎累遷祕書丞嘗詩云旦奭匡世功蕭曹佐吐俗追祖儉之志也後拜侍中入見武帝帝問何敬容曰褚彥回年幾爲宰相敬容曰少過三十上曰今之王訓無謝彥回訓美容儀善進止文章爲後進領袖年二十六卒謚溫子

僧虔金紫光祿大夫僧綽弟也父曇首與兄弟集會子孫任其戲適僧達跳下地作彪子時僧虔累十二博碁既不墜落亦不重作僧綽採蠟燭珠爲鳳皇僧達奪取打壞亦復不惜伯父弘歎曰僧達俊爽當不減人然亡吾家者終此子也僧虔必至公僧綽當以名義見美或云僧虔採燭珠爲鳳皇弘稱其長者云僧虔弱冠雅善隸書宋文帝見其書素扇歎曰非唯跡逾子敬方當器雅過之爲太子舍人退默少交接與袁淑謝莊善淑每歎之曰卿文情鴻麗學解深拔而韜光潛實物莫之窺雖魏陽元之射王汝南之騎無以加焉遷司徒左西屬兄僧綽爲宋元凶所害親賓咸勸之逃僧虔泣曰吾兄奉國以忠貞撫我以慈愛今日之事苦不見及耳若同歸九泉猶羽化也孝武初出爲武陵太守攜諸子姪兄子儉中塗得病僧虔爲廢寢食同行客慰喻之僧虔曰昔馬援子姪之間一情不異鄧攸於弟子更逾所生吾實懷其心誠未異古亡兄之胤不宜忽諸若此兒不救便當回舟謝職還爲中書郎再遷太子中庶子孝武欲擅書名僧虔不敢顯跡大明世常用拙筆書以此見容後爲御史中丞領驍騎將軍甲

族由來多不居憲臺王氏分枝居烏衣者位宦微減僧虔爲此官乃曰此是烏衣諸郎坐處我可試爲耳泰始中爲吳興太守始王獻之善書爲吳興郡及僧虔工書又爲郡論者稱之徙會稽太守中書舍人阮佃夫家在東請假歸客勸僧虔以佃夫要幸宜加禮接僧虔曰我立身有素豈能曲意此輩彼若見惡當拂衣去耳佃夫言於宋明帝使御史中丞孫叟奏僧虔坐免官尋以白衣領侍中元徽中爲吏部尚書尋加散騎常侍轉右僕射昇明二年爲尚書令嘗爲飛白書題尚書省壁曰圓行方止物之定質修之不已則溢高之不已則慄馳之不已則躓引之不已則迭是故去之宜疾當時嗟賞以比坐右銘兄子儉每覲見輒勗以前言往行忠貞止足之道雅好文史解音律以朝廷禮樂多違正典人間競造新聲時齊高帝輔政僧虔上表請正聲樂高帝乃使侍中蕭惠基調正清商音律齊受命轉侍中丹陽尹郡縣獄相承有上湯殺囚僧虔上言湯本救疾而實行冤暴若罪必入重自有正刑若去惡宜疾則應先啓豈有死生大命而潛制下邑上納其言而止文惠太子鎮雍州有盜發古冢者相傳云是

楚王冢大獲寶物玉履玉屏風竹簡書青絲綸簡廣數分長二尺皮節如新有
得十餘簡以示僧虔云是科斗書考工記周官所闕文也高帝素善書篤好不
已與僧虔賭書畢謂曰誰爲第一對曰臣書第一陛下亦第一帝笑曰卿可謂
善自爲謀或云帝問我書何如卿答曰臣正書第一草書第二陛下草書第二
而正書第三臣無第三陛下無第一帝大笑曰卿善爲辭然天下有道丘不與
易也帝示僧虔古迹十一卷就求能書人名僧虔得人間所有卷中所無者吳
大皇帝景帝歸命侯書桓玄書及王丞相導領軍洽中書令珉張芝索靖衛伯
儒張翼十一卷奏之又上羊欣所撰能書人名一卷遷湘州刺史侍中如故清
簡不營財產百姓安之武帝卽位以風疾欲陳解遷侍中左光祿大夫開府儀
同三司僧虔少時羣從並會客有相之云僧虔年位最高仕當至公餘人莫及
及此授僧虔謂兄子儉曰汝任重於朝行當有八命之禮我若復此授一門有
二台司實所畏懼乃固辭上優而許之客問其故僧虔曰吾榮位已過無以報
國豈容更受高爵方貽官謗邪儉旣爲朝宰起長梁齋制度小過僧虔視之不

悅竟不入戶儉卽日毀之永明三年薨時年六十追贈司空侍中如故謚簡穆
僧虔頗解星文夜坐見豫章分野當有事故時僧虔子慈爲豫章內史慮有公
事少時而僧虔薨棄郡奔赴時有前將軍陳天福坐討唐寓之於錢唐掠奪百
姓財物棄市先是天福將行令家人豫作壽冢未至東又信催速就冢成而得
罪因以葬焉又宋世光祿大夫劉鎮之年三十許病篤已辦凶具旣而疾愈因
畜棺以爲壽九十餘乃亡此器方用因此而言天道未易知也僧虔論書云宋
文帝書自言可比王子敬時議者云天然勝羊欣功夫少於欣王平南真右軍
叔過江右軍之前以爲最亡曾祖領軍右軍云弟書遂不減吾變古制今惟右
軍領軍不爾至今猶法鍾張亡從祖中書令書子敬云弟書如騎驪駸駸恆欲
度驛騶前庾征西翼書少時與右軍齊名右軍後進庾猶不分在荊州與都下
人書云小兒輩賤家雞皆學逸少書須吾下當比之張翼王右軍自書表晉穆
帝令翼寫題後答右軍當時不別久後方悟云小人幾欲亂真張芝索靖韋誕
鍾會二衛並得名前代無以辨其優劣唯見其筆力驚異耳張澄當時亦呼有

意郗愔章草亞於右軍郗嘉賓草亞於二王緊媚其父桓玄自謂右軍之流論者以比孔琳之謝安亦入能書錄亦自重爲子敬書嵇康詩羊欣書見重一時親受子敬行書尤善正乃不稱名孔琳之書天然縱放極有筆力規矩恐在羊欣後丘道護與羊欣俱面受子敬故當在欣後范曄與蕭思話同師羊欣後小叛旣失故步爲復小有意耳蕭思話書羊欣之影風流趨好殆當不減筆力恨弱謝綜書其舅云緊生起是得賞也恨少媚好謝靈運書乃不倫遇其合時亦得入流賀道力書亞丘道護庾昕學右軍亦欲亂真矣僧虔嘗自書讓尚書令表辭制筆旣雅迹又麗時人以比子敬崇賢吳郡顧寶先卓越多奇自以伎能僧虔乃作飛白以示之寶先曰下官今爲飛白屈矣僧虔著書賦儉爲注序甚工僧虔宋世嘗有書誡子曰知汝恨吾未許汝學欲自悔厲或以闔棺自欺或更擇美業且得有慨亦慰窮生但亟聞斯唱未覩其實吾未信汝非徒然也往年有意於史取三國志聚置牀頭百日許復徙業就玄汝曾未窺其題目未辨其指歸而終日自欺人人不受汝欺也由吾不學無以爲訓然重華無嚴父放

勩無令子亦各由己耳汝輩竊議亦當云阿越不學何忽自課汝見其一耳不
全爾也設令吾學如馬鄭亦復甚勝復倍不如今亦必大減致之有由從身上
來也汝今壯年自勤數倍許勝劣及吾耳吾在世雖乏德素要復推排人間十
許年故是一舊物人或以比數汝耳卽化之後若自無調度誰復知汝事者舍
中亦有少負令譽弱冠越超清級者于時王家門中優者龍鳳劣猶虎豹失蔭
之後豈龍虎之議況吾不能爲汝蔭政應各自努力耳或有身經三公蔑爾無
聞布衣寒素輕相屈體父子貴賤殊兄弟聲名異何也體盡讀數百卷書耳吾
今悔無所及欲以前車誡爾後乘也汝年入立境方應從宦兼有室累何處復
得下帷如王郎時邪各爾身己切豈復關吾邪鬼唯知愛深松茂栢寧知子弟
毀譽事因汝有感故略敘胸懷子慈

慈字伯寶年八歲外祖宋太宰江夏王義恭迎之內齋施寶物恣所取慈取素
琴石硯及孝子圖而已義恭善之袁淑見其幼時撫其背曰叔慈內潤也少與
從弟儉共書學謝鳳子超宗嘗候僧虔仍往東齋詣慈慈正學書未卽放筆超

宗曰卿書何如虔公慈曰慈書比大人如雞之比鳳超宗狼狽而退十歲時與蔡興宗子約入寺禮佛正遇沙門懺約戲慈曰衆僧今日可謂虔虔慈應聲曰卿如此何以興蔡氏之宗歷位吳郡太守大司馬長史侍中領步兵校尉司徒左長史慈患腳齊武帝敕王晏慈有微疾不能騎聽乘車在仗後江左以來少例也慈妻劉彥節女子觀尙武帝長女吳縣公主修婦禮姑未嘗交答江夏王鋒爲南徐州王妃慈女也以慈爲東海太守行徐州府州事還爲冠軍將軍廬陵王中軍長史未拜永明九年卒贈太常諡懿子泰

泰字仲通幼敏悟年數歲時祖母集諸孫姪散棗栗於牀羣兒競之泰獨不取問其故對曰不取自當得賜由是中表異之少好學手所抄寫二千許卷及長通和溫雅家人不見喜愠之色姊夫齊江夏王鋒爲齊明帝所害外生蕭子友並孤弱泰資給撫訓逾於子姪梁天監元年爲祕書丞自齊永元之末後宮火延燒祕書圖書散亂殆盡泰表校定繕寫武帝從之歷中書侍郎掌吏部仍卽真自過江吏部郎不復典大選令史以下小人求競者輻湊前後少能稱職泰

爲之不爲貴賤請屬易意天下稱平轉黃門侍郎每預朝宴刻燭賦詩文不加點帝深賞歎沈約常曰王有養炬謝有覽舉養泰小字炬筠小字也始革大理以泰爲廷尉卿再歷侍中後爲都官尙書泰能接人士故每願其居選官頃之爲吏部尙書衣冠屬望未及選舉仍疾改除散騎常侍左驍騎將軍未拜卒諡夷子廓

志字次道慈之弟也九歲居所生母憂哀容毀瘠爲中表所異弱冠選尙宋孝武女安固公主拜駙馬都尉褚彥回爲司徒引志爲主簿謂其父僧虔曰朝廷之恩本爲殊特所可光榮在屈賢子累遷宣城內史清謹有恩惠郡人張倪吳慶爭田經年不決志到官父老相謂曰王府君有德政吾鄉里乃有如此爭倪慶因相攜請罪所訟地遂成閒田後爲東陽太守郡獄有重囚十餘冬至日悉遣還家過節皆反唯一人失期志曰此自太守事主者勿憂明旦果至以婦孕吏人益歎服之爲吏部尙書在選以和理稱崔慧景平以例加右軍將軍封臨汝侯固讓改領右衛將軍及梁武軍至城內殺東昏百僚署名送首志歎曰冠

雖弊可加足乎因取庭樹葉按服之僞悶不署名梁武覽牋無志署心嘉之弗以讓也霸府開爲驃騎大將軍長史梁臺建位散騎常侍中書令天監初爲丹陽尹爲政清靜都下有寡婦無子姑亡舉責以斂葬旣而無以還之志愍其義以俸錢償焉時年饑每旦爲粥於郡門以賦百姓衆悉稱惠常懷止足謂諸子姪曰謝莊在宋孝武時位止中書令吾自視豈可過之三年爲散騎常侍中書令因多謝病簡通賓客九年遷爲散騎常侍金紫光祿大夫卒志善藁隸當時以爲楷法齊游擊將軍徐希秀亦號能書常謂志爲書聖志家居建康禁中里馬糞巷父僧虔門風寬恕志尤醇厚所歷不以罪咎劾人門下客嘗盜脫志車幘賣之志知而不問待之如初賓客遊其門者專蓋其過而稱其善兄弟子姪皆篤實謙和時人號馬糞諸王爲長者普通四年志改葬武帝厚賻贈之諡曰安有五子緝休諱操素志弟揖位太中大夫揖子筠

筠字元禮一字德柔幼而警悟七歲能屬文年十六爲芍藥賦其辭甚美及長清靜好學與從兄泰齊名沈約見筠以爲似外祖袁粲謂僕射張稷曰王郎非

唯額類袁公風韻都欲相似稷曰袁公見人輒矜嚴王郎見人必娛笑唯此一條不能酷似仕爲尙書殿中郎王氏過江以來未有居郎署或勸不就筠曰陸平原東南之秀王文度獨步江東吾得比蹤昔人何所多恨乃欣然就職沈約每見筠文咨嗟嘗謂曰昔蔡伯喈見王仲宣稱曰王公之孫吾家書籍悉當相與僕雖不敏請附斯言自謝朓諸賢零落平生意好殆絕不謂疲暮復逢於君約於郊居宅閣齋請筠爲草木十詠書之壁皆直寫文辭不加篇題約謂人曰此詩指物程形無假題署約製郊居賦構思積時猶未都畢示筠草筠讀至雌霓五的反連蜷約撫掌欣抃曰僕常恐人呼爲霓五的反次至墜石碓星及冰懸培而帶坻筠皆擊節稱贊約曰知音者希真賞殆絕所以相要政在此數句耳筠又嘗爲詩呈約卽報書數詠以爲後進擅美筠又能用強韻每公宴並作辭必妍靡約嘗啓上言晚來名家無先筠者又於御筵謂王志曰賢弟子文章之美可謂後來獨步謝朓常見語云好詩圓美流轉如彈丸近見其數首方知此言爲實累遷太子洗馬中舍人並掌東宮管記昭明太子愛文學士常與筠及

劉孝綽陸倕到洽殷鈞等遊宴玄圃太子獨執筠袖撫孝綽肩曰所謂左把浮丘袖右拍洪崖肩其見重如此筠又與殷鈞以方雅見禮後爲中書郎奉敕製開善寺寶誌法師碑文辭甚麗逸又敕撰中書表奏三十卷及所上賦頌都爲一集後爲太子家令復掌管記普通元年以母憂去職筠有孝性毀瘠過禮大通二年爲司徒左長史三年昭明太子薨敕製哀策文復見嗟賞尋出爲臨海太守在郡侵刻還資有芒屨兩舫他物稱是爲有司奏不調累年後歷祕書監太府卿度支尚書司徒左長史及簡文卽位爲太子詹事筠家累千金性儉嗇外服羸弊所乘牛嘗飼以青草及遇亂舊宅先爲賊焚乃寓居國子祭酒蕭子雲宅夜忽有盜攻懼墜井卒時年六十九家人十二口同遇害人棄屍積於空井中筠狀貌寢小長不滿六尺性弘厚不以藝能高人而少擅才名與劉孝綽見重當時其自序云余少好抄書老而彌篤雖遇見警觀皆卽疏記後重省覽懽與彌深習與性成不覺筆倦自年十三四建武二年乙亥至梁大同六年四十載矣幼年讀五經皆七八十遍愛左氏春秋吟諷常爲口實廣略去取凡三

週五抄餘經及周官儀禮國語爾雅山海經本草並再抄子史諸集皆一遍未嘗倩人假手並躬自抄錄大小百餘卷不足傳之好事蓋以備遺忘而已又與諸兒書論家門集云史傳稱安平崔氏及汝南應氏並累葉有文才所以范蔚宗云崔氏雕龍然不過父子兩三世耳非有七葉之中名德重光爵位相繼人人有集如吾門者也沈少傅約常語人云吾少好百家之言身爲四代之史自開闢以來未有爵位蟬聯文才相繼如王氏之盛也汝等仰觀堂構思各努力筠自撰其文章以一官爲一集自洗馬中書中庶吏部左佐臨海太府各十卷尙書三十卷凡一百卷行於世子祥任陳位黃門侍郎揖弟彬

彬字思文好文章習篆隸與志齊名時人爲之語曰三真六草爲天下寶齊武帝起舊宮彬獻賦文辭典麗尙齊高帝女臨海長公主拜駙馬都尉仕齊歷太子中庶子徙永嘉太守卜室於積穀山有終焉之志梁天監中歷吏部尙書祕書監卒諡惠彬立身清白推賢接士有士君子風彬弟寂

寂字子玄性迅動好文章讀范滂傳未嘗不歎悵王融敗後賓客多歸之齊建

南史卷二十二考證

王僧綽傳陛下惟能裁弟不能裁兒○兒監本訛兄今改正

王儉傳年三十八○三監本訛四今从閣本

王慈傳衆僧今日可謂虔虔○僧監本訛生今改从閣本

南史卷二十二考證

南史卷二十二

南史卷二十二

王僧綽傳第三十八○王僧綽本名僧綽○僧綽本名僧綽○僧綽本名僧綽

王僧綽傳第三十八○王僧綽本名僧綽○僧綽本名僧綽○僧綽本名僧綽

王僧綽傳第三十八○王僧綽本名僧綽○僧綽本名僧綽○僧綽本名僧綽

南史卷二十二

南史卷二十三

唐

李

延

壽

撰

列傳第十三

王誕

兄弟偃瑩從弟亮

偃子藻

藻弟子瑩

王華

從弟琨

王惠

從弟球

王彧

子綯份孫銓

綯弟續

續孫克

彧兄子蘊

與

與弟份

王誕字茂世太保弘從祖兄也祖恬晉中軍將軍父混太常卿誕少有才藻晉

孝武帝崩從叔尚書令珣為哀策出本示誕曰猶恨少序節物誕攬筆便益之

接其秋冬代變後云霜繁廣除風回高殿珣歎美因而用之襲爵雉鄉侯為會

稽王世子元顯後軍長史琅邪內史誕結事元顯嬖人張法順故見寵元顯納

妾誕為之親迎隨府轉驃騎長史內史如故元顯討桓玄欲悉誅諸桓誕救桓

脩等由此得免脩誕甥也及玄得志將見誅脩為陳請乃徙廣州盧循據廣州

以誕為其平南府長史甚賓禮之誕久客思歸乃說循曰下官與劉鎮軍情味

不淺若得北歸必蒙任寄時廣州刺史吳隱之亦為循所拘留誕又曰將軍今

留吳公公私非計孫伯符豈不欲留華子魚但以一境不容二君耳於是誕及
隱之俱得還誕爲宋武帝太尉長史盡心歸奉帝甚仗之盧循自蔡洲南走劉
毅固求追討誕密白帝曰公旣平廣固復滅盧循則功蓋終古勳無與二如此
大威豈可使餘人分之毅與公同起布衣一時相推耳今旣喪敗不宜復使立
功帝納其說後爲吳國內史母憂去職武帝伐劉毅起爲輔國將軍誕固辭以
墨經從行時諸葛長人行太尉留府事心不自安武帝甚慮之毅旣平誕求先
下帝曰長人似有自疑心卿詎宜便去誕曰長人知下官蒙公垂盼今輕身單
下必當以爲無虞可少安其意帝笑曰卿勇過賁育矣於是先還後卒追封作
唐縣五等侯子詡早卒誕兄嘏字偉世侍中左戶尚書始興公嘏子偃

偃字子游母晉孝武帝女鄱陽公主宋受禪封永成君偃尚宋武帝第二女吳
興長公主諱榮男常保偃縛諸庭樹時天夜雪噤凍久之偃兄恢排閣詬主乃
免偃謙虛恭謹不以世事關懷位右光祿大夫贈開府儀同三司諡恭公

長子藻位東陽太守尚文帝第六女臨川長公主諱英媛公主性妬而藻別愛

左右人吳崇祖景和中主讒之於廢帝藻下獄死主與王氏離婚宋世諸主莫不嚴妬明帝每疾之湖熟令袁愔妻以妬賜死使近臣虞通之撰妬婦記左光祿大夫江湛孫敷當尙孝武帝女上乃使人爲敷作表讓婚曰伏承詔旨當以臨海公主降嬪榮出望表恩加典外顧審韜蔽伏用憂惶臣寒門悴族人凡質陋閭閻有對本隔天姻如臣素流家貧業寡年近將冠皆已有室荆釵布裙足得成禮每不自解無偶迄茲媒訪莫尋素族弗問自惟門慶屢降公主天恩所覃庸及醜末懷憂抱惕慮不獲免徵命所當果膺茲舉雖門泰宗榮於臣非倖仰緣聖貸冒陳愚實自晉氏以來配尙王姬者雖累經美胄亟有名才至如王敦懾氣桓溫斂威真長佯愚以求免于敬灸足以違禍王偃無仲都之質而保雪於北階何瑀闕龍工之姿而投軀於深井謝莊殆自害於矇叟殷冲幾不免於強鉏彼數人者非無才意而勢屈於崇貴事隔於聞覽吞悲茹氣無所逃訴制勒甚於僕隸防閑過於婢妾往來出入人理之常當待賓客朋從之義而令掃轍息駕無闕門之期廢筵抽席絕接對之理非唯交友離異乃亦兄弟踈闊

第令受酒肉之賜制以動靜監子待錢帛之私節其言笑姆妳爭媚相勸以嚴
尼媪競前相諂以急第令必凡庸下才監子皆葭萌愚豎議舉止則未閑是非
聽言語則謬於虛實姆妳敢恃耆舊唯贊妬忌尼媪自唱多知務檢口舌其間
又有應答問訊卜筮師母乃至殘餘飲食詰辯與誰衣被故弊必責頭領又出
入之宜繁省難衷或進不獲前或入不聽出不入則嫌於欲疎求出則疑有別
意召必以三晡爲期遣必以日出爲限夕不見晚魄朝不識曙星至於夜步月
而弄琴晝拱袂而披卷一生之內與此長乖又聲影裁聞則少婢奔迸裾袂向
席則醜老叢來左右整刷以疑寵見嫌賓客未冠以少容致斥禮有列媵象有
貫魚本無媢嫡之嫌豈有輕婦之誚今義絕傍私虔恭正匹而每事必言無儀
適設辭輒云輕易我又竊聞諸主聚集唯論夫族緩不足爲急者法急則可爲
緩者師更相扇誘本其恆意不可貸借固實常辭或云野敗去或云人笑我雖
曰家事有甚王憲發口所言恆同科律王藻雖復彊佞頗經學涉戲笑之事遂
爲寃魂褚曖憂憤用致天絕傷理害義難以具聞夫蠡斯之德實致克昌專妬

之行有妨繁衍是以尙主之門往往絕嗣駙馬之身通離釁咎以臣凡弱何以克堪必將毀族淪門豈伊身責前後嬰此其人雖衆然皆患彰遐邇事隔天朝故吞言咽理無敢論訴臣幸屬聖明矜照由道弘物以典處親以公臣之鄙懷可得自盡如臣門分世荷殊榮足守前基便預提拂清官顯位或由才升一叨婚戚咸成恩假是以仰冒非宜披露丹實非唯止陳一己規全身願實乃廣申諸門受惠之切伏願天慈照察特賜蠲停使燕雀微羣得保叢蔚蠢物憐生自已彌篤若恩詔難降披請不申便當刊膚剪髮投山竄海帝以此表遍示諸主以諷切之并爲戲笑元徽中臨川主表求還身王族守養弱嗣許之藻弟懋字昌業光祿大夫封南鄉侯懋子瑩

瑩字奉光選尙宋臨淮公主拜駙馬都尉累遷義興太守代謝超宗超宗去郡與瑩交惡還都就懋求書屬瑩求一吏曰丈人一旨如湯澆雪耳及至瑩答旨以公吏不可超宗往懋處對諸賓謂懋曰湯定不可澆雪懋面洞赤唯大恥愧懋後往超宗處設精白鮪美鮓鱾肫懋問那得佳味超宗詭言義興始見餉陽

驚曰丈人豈應不得邪懋大忿言於朝廷稱瑩供養不足坐失郡廢棄久之後歷侍中東陽太守以居郡有惠政遷吳興太守齊明帝勤憂庶政瑩頗處二郡皆有能名還爲中領軍隨王長史意不平改爲太子詹事中領軍永元初政由羣小瑩守職而已不能有所是非及尙書令徐孝嗣誅瑩頗綜朝政啓取孝嗣所居宅及取孝嗣封名枝江縣侯以爲己封從弟亮謂曰此非盛德也瑩怒曰我昔從東度爲吳興東身登岸徐時爲宰相不能見知相用爲領軍長史今住其宅差無多慚時人咸謂失德亮旣當朝於瑩素雖不善時欲引與同事遷尙書左僕射未拜會護軍崔惠景自京口奉江夏王內向瑩拒惠景於湖頭衆敗瑩赴水乘舫入樂遊因得還臺城惠景敗瑩還居領軍府梁武昌兵至復假節都督宮城諸軍事建康平瑩乃以宅還徐氏初爲武帝相國左長史及踐阼封建城縣公累遷尙書令瑩性清慎帝深善之時有猛獸入郭上意不悅以問羣臣羣臣莫對瑩在御筵乃斂板答曰昔擊石拊石百獸率舞陛下膺籙御圖虎象來格帝大悅衆咸服焉十五年位左光祿大夫開府儀同三司丹陽尹旣爲公

須開黃閣宅前促欲買南隣朱侃半宅侃懼見侵貨得錢百萬瑩乃回閣向東時人爲之語曰欲向南錢可貪遂向東爲黃銅及將拜印工鑄印六鑄而龜六毀及成頭空不實補而用之居職六日暴疾薨諡曰靜恭少子實嗣起家祕書郎尙梁武帝女安吉公主襲爵建城縣公爲新安太守實從兄來郡就求告實與銅錢五十萬不聽於郡及道散用從兄密於郡市貨還都求利及去郡數十里實乃知命追之呼從兄上岸盤頭令卒與杖搏頰乞原劣得免後爲南康嗣王湘州長史長沙郡王三日出襖實衣冠傾崎王性方嚴見之意殊惡實稱主名謂王曰蕭玉誌念實殿下何見憎王驚赧卽起後密啓之因此廢錮亮字奉叔瑩從父弟也父攸字昌達仕宋位太宰中郎贈給事黃門侍郎亮以名家子宋末選尙公主拜駙馬都尉歷任祕書丞齊竟陵王子良開西邸延才俊以爲士林使工圖其像亮亦預焉累遷晉陵太守在職清公有美政時有晉陵令沈攢之性麤疎好犯亮諱亮不堪遂啓代之攢之怏怏乃造坐云下官以犯諱被代未知明府諱若爲攸字當作無駁尊傍犬爲犬傍無駁尊若是有心

攸無心攸乞告示亮不履下牀跣而走攢之撫掌大笑而去建武末累遷吏部
尚書時右僕射江祐管朝政多所進拔爲士所歸亮自以身居選部每持異議
始亮未爲吏部郎時以祐帝之內弟故深友祐祐爲之延譽益爲帝所器重至
是與祐情好攜薄祐昵之如初及祐遇誅羣小放命凡所除拜悉由內寵亮弗
能止外若詳審內無明鑒所選用拘資次而已當時不謂爲能後爲尚書左僕
射及東昏肆虐亮取容以免梁武帝至新林內外百僚皆道迎其不能拔者亦
間路送誠款亮獨不遣及東昏遇殺張稷仍集亮等於太極殿前西鍾下坐議
欲立齊湘東嗣王寶晔領軍瑩曰城閉已久人情離解征東在近何不諮問張
稷又曰桀有昏德鼎遷于殷今實微子去殷項伯歸漢之日亮默然朝士相次
下牀乃遣國子博士范雲齎東昏首送石頭推亮爲首城平朝士畢至亮獨後
裙履見武帝謂曰顛而不扶安用彼相亮曰若其可扶明公豈有今日之舉
因泣而去霸府開以爲大司馬長史梁臺建授侍中尚書令固讓乃爲侍中中
書監兼尚書令及受禪遷侍中尚書令中軍將軍封豫寧縣公天監二年轉左

光祿大夫元日朝會亮辭疾不登殿設饌別省語笑自若數日詔公卿問訊亮無疾色御史中丞樂藹奏亮大不敬論棄市詔削爵廢爲庶人四年帝宴華光殿求讜言尙書左丞范縝起曰司徒謝朓徒負虛名陛下擢之如此前尙書令王亮頗有政體陛下棄之如彼愚臣所不知帝變色曰卿可更餘言縝固執不已帝不悅御史中丞任昉因奏縝妄陳褻貶請免縝官詔可亮因屏居閉掃不通賓客遭母憂居喪盡禮後爲中書監加散騎常侍卒謚煬子

王華字子陵誕從祖弟也祖蒼衛將軍會稽內史父廡司徒右長史晉安帝隆安初王恭起兵討王國寶時廡丁母憂在家恭檄令起兵廡卽聚衆應之以女爲貞列將軍以女人爲官屬及國寶死恭檄廡罷兵廡起兵之際多所誅戮至是不復得已因舉兵以討恭爲名恭遣劉牢之擊廡廡敗走不知所在長子泰爲恭所殺華時年十三在軍中與廡相失隨沙門釋曇冰逃使提衣襪從後津邏咸疑焉華行遲曇冰罵曰奴子怠懈行不及我以杖捶華數十衆乃不疑由此得免遇赦還吳以父存沒不測布衣蔬食不交游者十餘年宋武帝欲收其

才用乃發厥喪使華制服闕武帝北伐長安領鎮西將軍北徐州刺史辟華爲州主簿後爲別駕歷職著稱文帝鎮江陵爲西中郎主簿諮議參軍文帝未親政事悉委司馬張邵華性尙物不欲人在己前邵性豪每行來常引夾轡華出入乘牽車從者不過兩三人以矯之嘗相逢華陽若不知是邵謂左右曰此鹵簿甚盛必是殿下乃下牽車立於道側及邵至乃驚邵白服登城爲華所糾邵坐被徵華代爲司馬文帝將入奉大統以少帝見害不敢下華曰先帝有大功於天下四海所服雖嗣主不綱人望未改徐羨之中才寒士傅亮布衣諸生非有晉宣帝王大將軍之心明矣畏廬陵嚴斷將來必不自容殿下寬叡慈仁所知已且越次奉迎冀以見德悠悠之論殆必不然羨之亮晦又要檀道濟王弘五人同功孰肯相讓勢必不行今日就徵萬無所慮帝從之曰卿復欲爲吾之宋昌矣乃留華總後任上卽位以華爲侍中右衛將軍先是會稽孔甯子爲文帝鎮西諮議參軍以文義見賞至是爲黃門侍郎領步兵校尉甯子先爲何無忌安成國侍郎還東修宅令門可容高蓋隣里笑之甯子曰大丈夫何常之

有甯子與華並有富貴之願自羨之等執權日夜構之於文帝甯子嘗東歸至金昌亭左右欲泊船甯子命去之曰此殺君亭不可泊也華每閑居諷詠常誦王粲登樓賦曰冀王道之一平假高衢而騁力出入逢羨之等每切齒憤叱歎曰當見太平時否元嘉二年甯子卒三年誅羨之等華遷護軍將軍侍中如故宋世唯華與南陽劉湛不爲飾讓得官卽拜以此爲常華以情事異人未嘗預宴集終身不飲酒有宴不之詣若有論事者乘車造門主人出車就之及王弘輔政而弘弟曇首爲文帝所任與華相埒華常謂己力用不盡每歎曰宰相頓有數人天下何由得安四年卒年四十三九年以誅羨之功追封新建縣侯謚曰宣孝武卽位配享文帝廟庭子定侯嗣卒子長嗣坐罵母奪爵以長弟修紹封齊受禪國除

琨華從父弟也父懌不辨菽麥時以爲殷道矜之流人無肯與婚家以獾婢恭心侍之遂生琨初名峴崙懌後娶南陽樂玄女無子故卽以琨爲名立以爲嗣琨少謹篤爲從伯司徒謚所愛宋武帝初爲桓脩參軍脩待帝厚後帝以事計

圖脩猶懷昔顧使王華訪素門嫁其二女華爲琨娶大女以小女適潁川庾敬度亦是舊族除琨郎中駙馬都尉奉朝請先是琨伯父厥得罪晉世諸子並從誅唯華得免華宋世貴盛以門衰提攜琨恩若同生爲之延譽歷位宣城義熙太守皆以廉約稱華終又託之宋文帝故琨屢居清顯孝建中爲吏部郎吏曹選局貴要多所屬請琨自公卿下至士大夫例爲用兩門生江夏王義恭嘗屬琨用二人後復屬琨答不許出爲平越中郎將廣州刺史加都督南土沃實在任者常致巨富世云廣州刺史但經城門一過便得三千萬琨無所取納表獻祿奉之半鎮舊有鼓吹又啓輸還及罷任孝武知其清問還資多少琨曰臣買宅百三十萬餘物稱之帝悅其對後爲歷陽內史上以琨忠實徙爲寵子新安王北中郎長史再歷度支尚書加光祿大夫初琨從兄華孫長襲華爵新建縣侯嗜酒多愆失琨表以長將傾基緒請以長小弟修嗣焉琨後出爲吳郡太守遷中領軍坐在郡用朝舍錢三十六萬營餉二宮諸王及作絳襖奉獻軍用左遷光祿大夫尋加太常及金紫加散騎常侍廷尉虞蘇議社稷各一神琨案舊

糾駁不爲屈時，蘇見寵朝廷，數琨強正。明帝臨崩，出爲會稽太守，加都督。坐誤竟囚，降爲冠軍。順帝卽位，進右光祿大夫。順帝遜位，百僚陪列，琨攀畫輪，獮尾慟泣。曰：人以壽爲歡，老臣以壽爲戚。旣不能先驅螻蟻，頻見此事，嗚噎不自勝。百官人人兩淚。齊高帝卽位，領武陵王師，加侍中。時王儉爲宰相，屬琨用東海郡迎吏。琨使謂曰：語郎三臺五省，皆是郎用人。外方小郡，當乞寒賤。省官何容復奪之？遂不過其事。尋解王師，及高帝崩，琨聞國諱，牛不在宅，去臺數里，遂步行入宮朝士，皆謂曰：故宜待車，有損國望。琨曰：今日奔赴，皆自應爾。遂得病卒。贈左光祿大夫。年八十四。琨謙恭謹慎，老而不渝。朝會必早起，簡閱衣裳料數，冠幘如此數四，或爲輕薄所笑。大明中，尙書僕射顏師伯豪貴，下省設女樂。琨時爲度支尙書，要琨同聽傳酒，行炙皆悉。內妓琨以男女無親，授傳行。每至，令置牀上，回面避之。然後取畢。又如此坐上，莫不撫手嗤笑。琨容色自若。師伯後爲設樂，邀琨，琨不往。中領軍劉劭晚節有栖退志，表求東陽郡尙書令袁粲以下，莫不贊美之。琨曰：永初景平，唯謝晦殷景仁爲中領軍，元嘉有到彥之爲人。

望才譽勳不及也近聞加侍中己爲快快便求東陽臣恐子房赤松未易輕擬其鯁直如此而儉於財用設酒不過兩盃輒云此酒難遇鹽豉薑蒜之屬並挂屏風酒漿悉置牀下內外有求琨手自賦之景和中討義陽王昶六軍戒嚴應須紫櫛左右欲營辦琨曰元嘉初征謝晦有紫櫛在匣中不須更作檢取果得焉而避諱過甚父名懌母名恭心並不得犯焉時咸謂矯枉過正

王惠字令明誕從祖弟也祖劭車騎將軍父默左光祿大夫惠幼而夷簡爲叔父司徒謚所知恬靜不交游未嘗有雜事陳郡謝瞻才辯有風氣嘗與兄弟羣從造惠談論鋒起文史間發惠時相酬應言清理遠瞻等慚而退宋武帝聞其名以問其從兄誕誕曰惠後來秀令鄙宗之美也卽以爲行參軍累遷世子中軍長史時會稽內史劉懷敬之郡送者傾都惠亦造別還過從弟球球問向何所見惠言唯覺逢人耳素不與謝靈運相識嘗得交言靈運辯博辭義鋒起惠時然後言時荀伯子在坐退而告人曰靈運固自蕭散直上王郎有如萬頃陂焉嘗臨曲水風雨暴至坐者皆馳散惠徐起不異常日不以霑濡而改宋國初

建當置郎中令武帝難其人謂傅亮曰今用郎中令不可減袁曜卿既而曰吾得其人矣曜卿不得獨擅其奇乃以惠居之宋少帝卽位以蔡廓爲吏部尙書不肯拜乃以惠代焉惠被召卽拜未嘗接客人有與書求官得輒聚閣上及去職印封如初時以廓不拜惠卽拜事異而意同也兄鑿頗好聚斂惠意不同謂曰何用田爲鑿怒曰無田何由得食惠又曰何用食爲其標寄如此卒贈太常無子

球字蘅玉司徒謚之子惠從父弟也少與惠齊名宋武帝受命爲太子中舍人宜都王友轉諮議參軍文帝卽位王弘兄弟貴動朝廷球終日端拱未嘗相往來弘亦雅敬之歷位侍中中書令吏部尙書時中書舍人徐爰有寵於上上嘗命球及殷景仁與之相知球辭曰士庶區別國之章也臣不敢奉詔上改容謝焉球簡貴勢不交游筵席虛靜門無異客曇首常云蘅玉亦是玉卮無當耳旣而尙書僕射殷景仁領軍將軍劉湛並執重權傾動內外球雖通家姻戚未嘗往來居選職接客甚稀不視求官書疏而銓衡有序遷光祿大夫領廬陵王師

時大將軍彭城王義康專以政事爲本刀筆幹練者多被意遇謂劉湛曰王敬弘王球之屬竟何所堪施爲自富貴復那可解球兄子履深結劉湛委誠義康與劉斌等球每訓厲不納自大將軍從事中郎轉太子中庶子流涕訴義康不願違離故復爲從事中郎文帝甚銜之及誅湛之夕履徒跣告球球命爲取履先溫酒與之謂曰常日謂汝何履怖不得答球徐曰阿父在汝何憂左右扶郎還齋亦以球故履免死廢於家殷景仁卒球除尚書僕射王師如故素有脚疾多病還家朝直至少錄尚書江夏王義恭謂尚書何尚之曰當今乏才羣下宜加戮力而王球放恣如此宜以法糾之尚之曰球有素尚加又多疾公應以淡退求之未可以文案責也義恭又面啓文帝曰王球誠有素譽頗以物外自許端任要切或非所長帝曰誠知如此要是時望所歸昔周伯仁終日飲酒而居此任蓋所以崇素德也遂見優容後以白衣領職十八年卒時年四十九贈特進金紫光祿大夫無子從孫奐爲後

王彧字景文球從子也祖穆字伯遠司徒謚之長兄位臨海太守父僧朗仕宋

位尙書右僕射明帝初以后父加特進贈開府儀同三司諡元公或名與明帝
諱同故以字行伯父智少簡貴有高名宋武帝甚重之常言見王智使人思仲
祖武帝與劉穆之討劉毅而智在焉他日穆之白武帝曰伐國重事公言何乃
使王智知武帝笑曰此人高簡豈聞此輩論議其見知如此爲宋國五兵尙書
封建陵縣五等子追贈太常智無子故父僧朗以景文繼智幼爲從叔球所知
憐美風姿爲一時推謝袁粲見之歎曰景文非但風流可悅乃哺嚙亦復可觀
有一客少時及見謝混答曰景文方謝叔源則爲野父矣粲惆悵良久曰恨眼
中不見此人景文好言理少與陳郡謝莊齊名文帝嘗與羣臣臨天泉池帝垂
綸良久不獲景文越席曰臣以爲垂綸者清故不獲貪餌衆皆稱善文帝甚相
欽重故爲明帝娶景文妹而以景文之名名明帝武帝第五女新安公主先適
太原王景深離絕當以適景文景文固辭以疾故不成婚襲爵建陵子元凶以
爲黃門侍郎未及就孝武入討景文遣間使歸款以父在都下不獲致身事平
頗見嫌責猶以舊恩累遷司徒左長史上以散騎常侍舊與侍中俱掌獻替欲

高其選以景文及會稽孔顛俱南北之望以補之尋復爲司徒左長史以姊墓
開不臨赴免官後拜侍中領射聲校尉左衛將軍加給事中太子中庶子坐與
奉朝請毛法因搗戲得錢百二十萬白衣領職景和元年爲尙書右僕射明帝
卽位加領左衛將軍尋加丹陽尹遭父憂起爲尙書左僕射丹陽尹固辭僕射
出爲江州刺史加都督服闋乃受詔封江安縣侯固讓不許後徵爲尙書左僕
射領吏部揚州刺史加太子詹事不願還朝求爲湘州不許時又謂景文在江
州不能潔己景文與上幸臣王道隆書深自申理景文屢辭內授上手詔譬之
曰尙書左僕射卿已經此任東宮詹事用人雖美職次政可比中書令耳庶姓
作揚州徐干木王休元殷鐵並處之不辭卿清令才望何愧休元毗贊中興豈
謝干木綢繆相與何後殷鐵邪司徒以宰相不應帶神州遠遵先旨京口鄉基
義重密邇畿內又不得不同驃騎陝西任要由來用宗室驃騎旣去巴陵理應
居之中流雖曰閑地控帶二江通接荆郢經塗之要由來有重鎮如此則揚州
自成闕刺史卿若有辭便不知誰應處之此選大備與公卿疇懷非聊爾也固

辭詹事領選徙爲中書令常侍僕射揚州如故又進中書監領太子太傅常侍揚州如故景文固辭太傅上遣新除尚書右僕射褚彥回宣旨不得已乃受拜時太子及諸皇子並小上猶爲身後計諸將帥吳喜壽寂之之徒慮其不能奉幼主並殺之而景文外戚貴盛張永累經軍旅又疑其將來難信乃自爲謠言曰一士不可親弓長射殺人一士王字指景文弓長張字指張永景文彌懼乃自陳求解揚州詔答曰人居貴要但問心若爲耳大明之世巢徐二戴位不過執戟權亢人主顏師伯白衣僕射橫行尚書中袁粲作僕射領選而人往往不知有粲粲遷爲令居之不疑今旣省錄令便居昔之錄至置省事及幹僮並依錄格粲作令來亦不異爲僕射人情向粲淡然亦復不改常以此居貴位要任當有致憂兢不卿今雖在揚州太子太傅位雖貴而不關朝政可安不懼差於粲也卿虛心受榮有而不爲累貴高有危殆之懼卑賤有溝壑之憂張單雙災木鴈兩失有心於避禍不如無心於任運夫千仞之木旣摧於斧斤一寸之草亦悴於踐躅高崖之脩幹與深谷之淺條存亡之要巨細一揆耳晉將畢萬七

戰死於牖下蜀相費禕從容坐談斃於刺客故甘心於履危未必逢禍縱意於處安不必全福但貴者自惜故每憂其身賤者自輕故易忘其已然爲教者每誠貴不誠賤言其貴滿好自恃也凡各位貴達人以存懷泰則觸人改容否則行路嗟愕至如賤者否泰不足以動人存亡不足以絳數死於溝瀆困於途路者天地之間亦復何限人不係意耳以此而推貴何必難處賤何必易安但人生自應卑慎爲道行己用心務思謹惜若乃吉凶大期正應委之理運遭隨參差莫不由命也旣非聖人不能見吉凶之先見正是依稀於理言可行而爲之耳得吉者是其命吉遇不吉者是其命凶以近事論之景和之世晉平庶人從壽陽歸亂朝人皆爲之戰慄而乃遇中興之運袁顛圖避禍於襄陽當時皆羨之謂爲陵霄駕鳳遂與義嘉同滅駱宰見狂主語人云越王長頸烏喙可與共憂不可共樂范蠡去而全身文種留而遇禍今主長頸頗有越王之狀我在尙書中久不去必危遂求江南縣諸都令史住京師者皆遭中興之慶人人蒙爵級宰逢義嘉染罪金木纏身性命幾絕卿耳目所聞見安危在運何可預圖邪

上既有疾而諸弟並已見殺唯桂陽王休範人才本劣不見疑出爲江州刺史慮一旦晏駕皇后臨朝則景文自然成宰相門族強盛藉元舅之重歲暮不爲純臣泰豫元年春上疾篤遣使送藥賜景文死使謂曰朕不謂卿有罪然吾不能獨死請子先之因手詔曰與卿周旋欲全卿門戶故有此處分敕至之夜景文政與客棋扣函着復還封置局下神色怡然不變方與客棋思行爭劫竟斂子內奩畢徐謂客曰奉敕見賜以死方以敕示客酒至未飲門客焦度在側憤怒發酒覆地曰大丈夫安能坐受死州中文武可數百人足以一奮景文曰知卿至心若見念者爲我百口計乃墨啓答敕并謝贈詔酌謂客曰此酒不可相勸自仰而飲之時年六十追贈開府儀同三司諡曰懿長子絢

絢字長素早惠年五六歲讀論語至周監於二代外祖何尚之戲之曰可改耶耶乎文哉絢應聲答曰尊者之名安可戲寧可道草翁之風必舅及長篤志好學位祕書丞先景文卒諡曰恭世子絢弟績

績字叔素弱冠祕書郎太子舍人轉中書舍人景文以此授超階令績經年乃

受景文封曲安侯續襲其本爵爲始平縣五等男元徽末爲黃門郎東陽太守齊武帝爲撫軍吏部尚書張岱選續爲長史呈選牒高帝笑曰此可謂素望再遷義興太守輒錄郡吏陳伯喜付陽羨獄欲殺之縣令孔道不知何罪不受續教爲有司奏坐白衣領職後長兼侍中武帝出射雉續信佛法稱疾不從永元元年卒於太常諡靖子續女適武帝寵子安陸王子敬永明二年納妃脩外舅姑之敬武帝遣文惠太子相隨往續家置酒設樂公卿皆冠冕而去當世榮之續弟約齊明帝世數年廢錮梁武帝時爲太子中庶子嘗謂約曰卿方當富貴必不容久滯屈及帝作輔謂曰我嘗相卿當富貴不言卿今日富貴便當見由歷侍中左戶尚書廷尉續長子儁不慧位止建安太守儁子克克美容貌善容止仕梁歷司徒右長史尚書僕射臺城陷仕侯景位太宰侍中錄尚書事景敗克迎侯王僧辯問克曰勞事夷狄之君克不能對次問璽紱何在克默然良久曰趙平原將去平原名思賢景腹心也景授平原太守故克呼焉僧辯乃諫克曰王氏百世卿族便是一朝而墜仕陳位尚書右僕射

蘊字彥深或兄子也父摺太中大夫摺人才凡劣故蘊不爲羣從所禮常懷恥
慨家貧爲廣德令明帝卽位四方叛逆欲以將領自奮每撫刀曰龍泉太阿汝
知我者叔父景文常誡之曰阿答汝滅我門戶蘊曰答與童烏貴賤異童烏絢
小字答蘊小字也及事寧封吉陽男歷晉陵義興太守所莅並貪縱後爲給事
黃門侍郎桂陽之逼王道隆爲亂兵所殺蘊力戰重創御溝側或扶以免事平
撫軍長史褚澄爲吳郡太守司徒左長史蕭惠開明言於朝曰褚澄開城以納
賊更爲股肱大郡王蘊被甲死戰棄而不收賞罰如此何憂不亂褚彥回慚乃
議用蘊爲湘州刺史及齊高帝輔政蘊與沈攸之連謀事敗斬於秣陵市

奐字道明或兄子也父粹字景深位黃門侍郎奐繼從祖球故小字彥孫年數
歲常侍球許甚見愛奐諸兄出身諸王國常侍而奐起家著作佐郎琅邪顏延
之與球情款稍異常撫奐背曰阿奴始免寒士奐少而強濟叔父景文常以家
事委之仕宋歷侍中祠部尙書轉掌吏部昇明初遷丹陽尹初王晏父普曜爲
沈攸之長史常懼攸之舉事不得還奐爲吏部轉普曜爲內職晏深德之及晏

仕齊武帝以奐宋室外戚而從弟蘊又同逆疑有異意晏叩頭保奐無異志時晏父母在都請以爲質武帝乃止永明中累遷尚書右僕射王儉卒上欲用奐爲尚書令以問晏晏位遇已重意不推奐答曰柳世隆有勳望恐不宜在奐後乃轉左僕射加給事中出爲雍州刺史加都督與寧蠻長史劉興祖不睦十一年奐遣軍主朱公恩征蠻失利興祖欲以啓聞奐大怒收付獄興祖於獄以針畫漆合盤爲書報家稱枉令啓聞而奐亦馳信啓上誣興祖扇動荒蠻上知其枉敕送興祖還都奐恐辭情翻背輒殺之上大怒遣中書舍人呂文顯直閣將軍曹道剛領兵收奐又別詔梁州刺史曹武自江陵步出襄陽奐子彪凶愚頗干時政士人咸切齒時文顯以漆匣匣箠在船中因相誑云臺使封刀斬王彪及道剛曹武文顯俱至衆力旣盛又懼漆匣之言於是議閉門拒命長史殷叡奐女婿也諫曰今開城門白服接臺使不過檻車徵還隳官免爵耳彪堅執不從叡又曰宜遣典籤間道送啓自申亦不患不被宥乃令叡書啓遣典籤陳道齊出城便爲文顯所執叡又曰忠不背國勇不逃死百世門戶宜思後計孰

與仰藥自全則身名俱泰叡請先驅螻蟻又不從奐門生鄭羽叩頭啓奐乞出城迎臺使奐曰我不作賊欲先遣啓自申政恐曹呂輩小人相陵藉故且閉門自守耳彪遂出戰敗走歸土人起義攻州西門彪登門拒戰却之司馬黃瑤起寧蠻長史裴叔業於城內起兵攻奐奐聞兵入禮佛未及起軍人斬之彪及弟爽弼殷叡皆伏誅奐長子太子中庶子融融弟司徒從事中郎琛於都棄市餘孫皆原宥琛弟肅秉並奔魏後得黃瑤起鬻食之弟佻女爲長沙王晃妃以男女並長又且出繼特不離絕奐既誅故舊無敢至者汝南許明達先爲奐參軍躬爲殯斂經理甚厚當時高其節奐弟份

份字季文仕宋位始安內史袁粲之誅親故無敢視者份獨往致慟由是顯名累遷大司農奐誅後其子肅奔魏份自拘請罪齊武帝宥之肅屢引魏人至邊份嘗因侍坐武帝謂曰比有北信不份改容對曰肅既近忘墳柏寧遠憶有臣帝亦以此亮焉後位祕書監仕梁位散騎常侍領步兵校尉兼起部尙書武帝嘗於宴席問羣臣曰朕爲有爲無份曰陛下應萬物爲有體至理爲無帝稱善

後累遷尚書左僕射歷侍中特進左光祿大夫監丹陽尹卒諡曰胡子長子琳字孝璋位司徒左長史琳齊代取梁武帝妹義興長公主有子九人並知名長子銓字公衡美風儀善占吐尚武帝女永嘉公主拜駙馬都尉銓雖學業不及弟錫而孝行齊焉時人以爲銓錫二王可謂玉昆金友母長公主疾銓形貌瘠貶人不復識及居喪哭泣無常因得氣疾位侍中丹陽尹卒於衛尉卿子溥字伯淮尚簡文帝女餘姚公主

銓弟錫字公嘏幼而警悟與兄弟受業至應休散輒獨留不起精力不倦致損右目十三爲國子生十四舉清茂除祕書郎再遷太子洗馬時昭明太子尚幼武帝敕錫與祕書郎張纘使入宮不限日數與太子游狎情兼師友又敕陸倕張率謝舉王規王筠劉孝綽到洽張緬爲學士十人盡一時之選錫以戚屬封永安侯普通初魏始連和使劉善明求聘敕中書舍人朱异接之善明彭城舊族氣調甚高負其才氣酒酣謂异曰南國辯學如中書者幾人异曰异所以得接賓宴乃分職是司若以才辯相尚則不容見使善明乃曰王錫張纘北間所

聞云何可見異具啓聞敕即使南苑設宴錫與張纘朱异四人而已善明造席
遍論經史兼以嘲謔錫纘隨方酬對無所稽疑善明甚相歎挹他日謂异曰一
日見二賢實副所期不有君子安能爲國引宴之日敕使左右徐僧權於坐後
言則書之累遷吏部郎中時年二十四謂親友曰吾以外戚謬被時知兼比羸
病庶務難擁安能捨其所好而徇所不能乃稱疾不拜便謝遣胥徒拒絕賓客
掩扉覃思室宇蕭然諸子温清隔簾趨倚公主乃命穿壁使子涉湜觀之卒年
三十六贈侍中諡貞子錫弟僉

僉字公會八歲丁父憂哀毀過禮初補國子生祭酒袁昂稱爲通理累遷始興
內史丁所生母憂固辭不拜又除南康內史在郡義興主薨詔起復郡後爲太
子中庶子掌東宮管記卒贈侍中元帝下詔賢而不伐曰恭追諡曰恭子僉弟
通

通字公達仕梁爲黃門侍郎敬帝承制以爲尙書右僕射陳武帝受禪遷右僕
射太建元年爲左光祿大夫六年加特進侍中將軍光祿佐吏扶並如故未拜

卒諡曰成弟勸

勸字公齊美風儀博涉書史恬然清簡未嘗以利欲干懷仕梁爲輕車河東王功曹史王出鎮京口勸將隨之蕃范陽張纘時典選舉勸造纘言別纘嘉其風采乃曰王生才地豈可游外府乎奏爲太子洗馬後爲南徐州別駕從事史大同末梁武帝謁園陵道出朱方勸隨例迎候敕令從輦側所經山川莫不顧問勸隨事應對咸有故實又從登北顧樓賦詩辭義清典帝甚嘉之時河東王爲廣州刺史乃以勸爲冠軍河東王長史南海太守王至嶺南多所侵掠因懼罪稱疾委州還朝勸行州府事越中饒沃前後守宰例多貪縱勸獨以清白著聞入爲給事黃門侍郎侯景之亂奔江陵歷位晉陵太守時兵飢之後郡中彫弊勸爲政清簡吏人便安之徵爲侍中遷五兵尚書會魏軍至元帝徵湘州刺史宜豐侯蕭循入援以勸監湘州及魏平江陵敬帝承制以爲中書令加侍中歷陳武帝司空丞相長史侍中中書令並如故及蕭勃平以勸爲廣州刺史未行改爲衡州刺史王琳據有上流衡廣攜貳勸不得之鎮留于大庾嶺太建元年

累遷尚書右僕射時東境大水以勸爲晉陵太守在郡甚有威惠郡人表請立碑頌勸政德詔許之徵爲中書監重授尚書左僕射領右軍將軍卒諡曰温子勸弟質

質字子貞少慷慨涉獵書史梁世以武帝甥封甲口亭侯位太子中舍人庶子侯景濟江質領步騎頓于宣陽門外景軍至都質不戰而潰爲桑門潛匿人間城陷後西奔荊州元帝承制歷位侍中吳州刺史領鄱陽內史魏平荊州侯瑱鎮益城與質不協質率所部依于留異陳永定二年武帝命質率所部隨都督周文育討王琳質與琳素善或譖云於軍中潛信交通武帝命文育殺質文育啓救之獲免文帝嗣位以爲五兵尚書宣帝輔政爲司徒左長史坐招聚博徒免官後爲都官尚書卒諡曰安子弟固

固字子堅少清正頗涉文史梁時以武帝甥封莫口亭侯位丹陽尹丞梁元帝承制以爲相國戶曹屬掌管記尋聘魏魏人以其梁氏外戚待之甚厚承聖元年爲太子中庶子遷尋陽太守魏剋荊州固之鄱陽隨兄質度東嶺居信安縣

陳永定中移居吳郡文帝以固清靜且欲申以婚姻天嘉中歷位中書令散騎常侍國子祭酒以其女爲皇太子妃禮遇甚重廢帝卽位授侍中金紫光祿大夫宣帝輔政固以廢帝外戚妳媪恆往來禁中頗宣密旨事洩比黨皆誅宣帝以固本無兵權且居處清素止免所居官禁錮太建中卒於太常卿謚恭子固清虛寡欲居喪以孝聞又信佛法及丁所生母憂遂終身蔬食夜則坐禪晝誦佛經嘗聘魏因宴饗祭請停殺一羊羊於固前跪拜又宴昆明池魏人以南人嗜魚大設罟網固以佛法呪之遂一鱗不獲子寬位侍中

論曰王誕夙有名輩而間關夷險卒獲攀光日月蓋亦得其時焉奉光奉叔並得官成齊代而亮自著寒松斯爲優矣瑩印章六毀豈鬼神之害盈乎景文弱年立譽芳聲籍甚榮貴之來匪由勢至若使泰始之朝身非外戚與袁粲羣公方驂並路傾覆之災庶幾可免庾元規之讓中書令義歸此矣奐有愚子自致誅夷份胤嗣克昌特鍾門慶美矣

南史卷二十四

唐

李

延

壽

撰

列傳第十四

王裕之

孫秀之
延之子

綸之

延之
曾孫峻

阮韜
峻子琮

王鎮之

弟弘之
弘之孫晏

晏從弟思遠

王韶之

王悅之

王准之

曾孫清
清子猛

准之從弟逵之 珪之 族子素

王裕之字敬弘晉驃騎將軍廩之曾孫司州刺史胡之之孫也名與宋武帝諱同故以字行父茂之字興元晉陵太守敬弘少有清尚起家本國左常侍衛軍參軍性恬靜樂山水求為天門太守及之郡妻弟荊州刺史桓玄遣信要令過己敬弘至巴陵謂人曰靈寶正當欲見其姊我不能為桓氏贅壻乃遣別船送妻往江陵彌年不迎山郡無事恣其游適意甚好之後為南平太守去官居作唐縣界玄輔政及篡位屢召不下宋武帝以為車騎從事中郎徐州中從事史征西將軍道規諮議參軍時府主簿宋協亦有高趣道規並以事外相期嘗共

酣飲敬弘因醉失禮爲外司所白道規即便引還重申初讌永初中累遷吏部
尙書敬弘每被召即便祇奉既到宜退旋復解官武帝嘉其志不苟違也除廬
陵王師加散騎常侍自陳無德不可師範令王固讓不拜元嘉三年爲尙書僕
射關署文案初不省讀嘗豫聽訟上問疑獄敬弘不對上變色問左右何故不
以訊牒副僕射敬弘曰臣乃得訊牒讀之正自不解上甚不悅雖加禮敬亦不
以時務及之六年遷尙書令固讓表求還東上不能奪改授侍中特進左光祿
大夫給親信三十人及東歸車駕幸冶亭餞送十二年徵爲太子少傅敬弘詣
都上表固辭不拜東歸上時不豫自力見焉十六年以爲左光祿大夫開府儀
同三司侍中如故又詣都表辭竟不拜東歸二十三年復申前命復辭明年薨
於餘杭之舍亭山年八十八順帝昇明三年追謚文貞公敬弘形狀短而起坐
端方桓玄謂之彈棋發八勢所居舍亭山林澗環周備登臨之美故時人謂之
王東山文帝嘗問爲政得失對曰天下有道庶人不議上高其言左右嘗使二
老婦女戴五條辮著青紋袴襪飾以朱粉女適尙書僕射何尙之弟述之敬弘

嘗往何氏看女遇尙之不在因寄齋中臥俄頃尙之還敬弘還使二婦女守閣不聽尙之入云正熱不堪相見君可且去尙之於是移於他室上將爲廬陵王納其女辭曰臣女幼旣許孔淳之息子恢之被召爲祕書郎敬弘求爲奉朝請與恢之書曰彼祕書有限故有競朝請無限故無競吾欲使汝處不競之地文帝嘉之並見許敬弘見兒孫歲中不過一再相見見輒剋日未嘗教子孫學問各隨所欲人或問之答曰丹朱不應乏教甯越不聞被捶恢之位新安太守嘗請假定省敬弘剋日見之至日輒不果假日將盡恢之求辭敬弘呼前至閣復不見恢之於閣外拜辭流涕而去恢之弟瓚之位吏部尙書金紫光祿大夫謚貞子瓚之弟昇之位都官尙書瓚之子秀之

秀之字伯奮幼時祖父敬弘愛其風采仕宋爲太子舍人父卒廬於墓側服闋復職吏部尙書褚彥回欲與結婚秀之不肯以此頻爲兩府外兵參軍後爲晉平太守期年求還或問其故答曰此郡沃壤珍阜日至人所昧者財財生則禍逐智者不昧財亦不逐禍吾山資已足豈可久留以妨賢路乃上表請代時人

以爲王晉平恐富求歸仕齊爲豫章王疑驃騎長史疑於荊州立學以秀之領
儒林祭酒武帝卽位累遷侍中祭酒轉都官尙書秀之祖父敬弘性貞正徐羨
之傅亮當朝不與來往及致仕隱吳興與秀之父瓚之書深勗以靜退瓚之爲
五兵尙書未嘗詣一朝貴江湛謂何偃曰王瓚之今便是朝隱及柳元景顏師
伯貴要瓚之竟不候之至秀之爲尙書又不與王儉款接三世不事權貴時人
稱之轉侍中領射聲校尉出爲隨王鎮西長史南郡內史後爲輔國將軍吳興
太守秀之先爲諸王長史行事便歎曰仲祖之識見於己多便無復仕進止營
理舍亭山宅有終焉之志及除吳興郡隱業所在心願爲之到郡修舊山移置
輜重隆昌元年卒遺令朱服不得入棺祭則酒脯而已世人以僕妾直靈助哭
當由喪主不能淳至欲以多聲相亂魂而有靈吾當笑之諡曰簡子

延之字希季昇之子也少靜默不交人事仕宋爲司徒左長史清貧居宇穿漏
褚彥回以啓宋明帝卽敕材官爲起三間齋屋歷吏部尙書尙書左僕射宋德
旣衰齊高帝輔政朝野之情人懷彼此延之與尙書令王僧虔中立無所去就

時人語曰二王居平不送不迎高帝以此善之昇明三年出爲江州刺史加都督齊建元元年進號鎮南將軍延之與金紫光祿大夫阮韜俱宋領軍將軍劉湛外甥並有早譽湛甚愛之曰韜後當爲第一延之爲次也延之甚不平每致餉下都韜與朝士同例高武聞之與延之書曰韜云卿未嘗有別意當由劉家月旦故邪韜字長明陳留人晉金紫光祿大夫裕玄孫也爲南兗州別駕刺史江夏王義恭逆求資費錢韜曰此朝廷物執不與宋孝武選侍中四人並以風貌王或謝莊爲一雙韜與何偃爲一雙常充兼假至始興王師卒延之居身簡素清靜寡慾凡所經歷務存不擾在江州祿俸外一無所納獨處齋內未嘗出戶吏人罕得見焉雖子弟亦不妄前時時見親舊未嘗及世事從容談詠而已後爲尚書左僕射尋領竟陵王師卒諡簡子

子綸之字元章爲安成王記室參軍偃仰召會退居僚末司徒袁粲聞而歎曰格外之官便今日爲重貴游居此位者遂以不掌文記爲高自綸之始也齊永明中歷位侍中出爲豫章太守下車祭徐孺子許子將墓圖畫陳蕃華歆謝鯤

像於郡朝堂爲政寬簡稱良二千石武帝幸琅邪城綸之與光祿大夫全景文等二十一人坐不參承爲有司奏免官後位侍中都官尙書卒自敬弘至綸之並方巖皆剋日乃見子孫蓋家風也綸之子昕有業行居父憂過禮謝藩欲遣參之孔珪曰何假參此豈有全理以憂卒

峻字茂遠秀之子也少美風姿善容止仕齊爲桂陽內史梁天監初爲中書侍郎武帝甚悅其風采與陳郡謝覽同見賞擢累遷侍中吏部尙書處選甚得名譽峻性詳雅無趨競心嘗與謝覽約官至侍中不復謀進仕覽自吏部尙書出爲吳興郡平心不畏強禦亦由處俗情薄故也峻爲侍中已後雖不退身亦澹然自守無所營務遷金紫光祿大夫未拜卒謚惠子子琮爲國子生尙始興王女繁昌主琮不慧爲學生所嗤遂離婚峻謝王王曰此自上意僕極不願如此峻曰下官曾祖是謝仁祖外孫亦不藉殿下姻媾爲門戶耳

王鎮之字伯重晉司州刺史胡之之從孫而裕之從祖弟也祖耆之位中書郎父隨之上虞令鎮之爲剡上虞令並有能名桓玄輔晉以爲大將軍錄事參軍

時三吳饑荒遣鎮之銜命賑卹而會稽內史王愉不奉符旨鎮之依事糾奏愉子綏玄之外甥當時貴盛鎮之爲所排抑以母老求補安成太守以母憂去職在官清潔妻子無以自反乃棄官致喪還上虞舊墓葬畢爲子標之求安復令隨子之官服闋爲征西道規司馬南平太守後爲御史中丞執正不撓百僚憚之出爲建威將軍平越中郎將廣州刺史加都督宋武帝謂人曰鎮之少著清績必將繼美吳隱嶺南弊俗非此不康也在鎮不受俸祿蕭然無營去官之日不異初至武帝初建相國府爲諮議參軍領錄事善於吏職嚴而不殘遷宋臺祠部尙書武帝踐阼卒於宣訓衛尉弟弘之

弘之字方平少孤貧爲外祖徵士何準所撫育從叔獻之及太原王恭並貴重之仕晉爲司徒主簿家貧性好山水求爲烏傷令桓玄輔晉桓謙以爲衛軍參軍時殷仲文還姑熟祖送傾朝謙要弘之同行答曰凡祖離送別必在有情下官與殷風馬不接無緣扈從謙貴其言母隨兄鎮之之安成郡弘之解職同行義熙中何無忌及宋武帝辟召一無所就家在會稽上虞從兄敬弘爲吏部尙

書奏弘之爲太子庶子不就文帝卽位敬弘爲尙書左僕射陳弘之高行徵爲通直散騎常侍又不就敬弘嘗解貂裘與之卽著以採藥性好釣上虞江有一處名三石頭弘之常垂綸於此經過者不識之或問漁師得魚賣不弘之曰亦自不得得亦不賣曰夕載魚入上虞郭經親故門各以一兩頭置門內而去始寧沃川有佳山水弘之又依巖築室謝靈運顏延之並相欽重靈運與廬陵王義真牋曰會境旣豐山水是以江左嘉遁並多居之至若王弘之拂衣歸耕踰歷三紀孔淳之隱約窮岫自始迄今阮萬齡辭事就閑纂戎先業旣遠同義唐亦激貪厲競若遣一介有以相存真可謂千載盛美也弘之元嘉四年卒顏延之欲爲作誄書與其子曇生曰君家高世之善有識歸重豫染豪翰所應載述况僕託慕末風竊以敘德爲事但恨短筆不足書美誄竟不就曇生好文義以謙和見稱歷吏部尙書太常卿孝武末爲吳興太守明帝初興與四方同逆戰敗歸降被宥終於中散大夫阮萬齡陳留尉氏人祖思曠左光祿大夫父寧黃門侍郎萬齡少知名爲孟昶建威長史時袁豹江夷相係爲昶司馬時人謂昶

府有三素望萬齡家在會稽剡縣頗有素情位左戶尚書太常出爲湘州刺史無政績後爲散騎常侍金紫光祿大夫卒曇生弟普曜位祕書監普曜子晏晏字休默一字士彥仕宋初爲建安國左常侍稍至車騎晉熙王燮安西板晏主簿時齊武帝爲長史與晏相遇府轉鎮西板晏爲記室沈攸之事難隨武帝鎮益城齊高帝時威權雖重而衆情猶有疑惑晏便專心奉事軍旅書翰皆見委性甚便僻漸見親待常參議機密建元初爲太子中庶子武帝在東宮專斷朝事多不聞啓晏慮及罪稱疾自疎武帝卽位爲長史兼侍中意任如舊遷侍中祭酒遭母喪起爲司徒左長史晏父普曜藉晏勢多歷通官普曜卒晏居喪有禮永明六年爲丹陽尹晏位任親重自豫章王疑尚書令王儉皆降意接之而晏每以疎漏被責連稱疾久之轉爲江州刺史泣不願出留爲吏部尚書太子右率終以舊恩見寵時尚書令王儉雖貴而疎晏旣領選權行臺閣與儉頗不平儉卒禮官欲依王導諡爲文獻晏啓上曰導乃得此諡但宋來不加素族謂親人曰平頭憲事行已矣十一年爲右僕射領太孫右衛率武帝崩遺旨以

尚書事付晏及徐孝嗣鬱林卽位轉左僕射及明帝謀廢立晏便響應接奉轉
尚書令封曲江縣侯給鼓吹一部甲仗五十人入殿時明帝形勢已布而莫敢
先言蕭謐兄弟握兵權遲疑未決晏頻三夜微步詣謐議時人以此窺之明帝
與晏東府語及時事晏抵掌曰公常言晏怯今定如何建武元年進號驃騎大
將軍給班劍二十人又加兵百人領太子少傅進爵爲公以魏軍動給兵千人
晏篤於親舊爲時所稱至是自謂佐命唯新言論常非武帝故事衆始怪之明
帝雖以事際須晏而心相疑斥料簡武帝中詔得與晏手詔三百餘紙皆是論
國家事永明中武帝欲以明帝代晏領選晏啓曰鸞清幹有餘然不諳百氏恐
不可居此職乃止及見此詔愈猜薄之帝卽位始安王遙光便勸誅晏帝曰
晏於我有勳且未有罪遙光曰晏尙不能爲武帝安能爲陛下帝默然變色時
帝常遣心腹左右陳世範等出塗巷采聽異言由是以晏爲事晏性浮動志欲
無厭自謂旦夕開府又望錄尚書每謂人曰徐公應爲令又和徐詩云槐序候
方調其名位在徐前若三槐則晏不言自顯人或譏之晏人望未重又與上素

疎中興初雖以事計委任而內相疑阻晏無防意既居朝端事多專決內外要職並用周旋門義每與上爭用人數呼相工自視云當大貴與客語好屏人上聞疑晏欲反遂有誅晏意有鮮于文粲與晏子德元往來密探朝旨告晏有異志又左右單景儁陳世範等采巫覡言啓上云晏懷異圖是時南郊應親奉景儁等言晏因此與武帝故主帥於道中竊發會獸犯郊壇帝愈懼未郊前一日上乃停行先報晏及徐孝嗣孝嗣奉旨而晏陳郊祀事大必宜自力景儁言益見信元會畢乃召晏於華林省誅之下詔顯其罪稱以河東王鉉識用微弱欲令守以虛器並令收付廷尉晏之爲員外郎也父普曜齋前柏樹忽變成梧桐論者以爲梧桐雖有栖鳳之美而失後凋之節及晏敗果如之又未敗前見屋桷子悉是大蛇就視之猶木也晏惡之乃以紙裹桷子猶紙內搖動藪藪有聲又於北山廟答賽夜還晏辭部伍人亦飲酒羽儀錯亂前後十餘里中不復禁制識者云此不復久也未幾而散晏子德元有意尙位車騎長史德元初名湛武帝曰劉湛江湛並不善終此非佳名也晏乃改之至是及誅晏弟詡位少府

卿敕未登黃門郎不得畜女伎詡與射聲校尉陰玄智坐畜伎免官禁錮十年
敕特原詡亦篤舊後拜廣州刺史晏誅上遣殺之

思遠晏從父弟也父羅雲平西長史思遠八歲父卒祖弘之及外祖新安太守
羊敬元並栖退高尚故思遠少無仕心宋建平王景素辟南徐州主簿深見禮
遇景素被誅左右離散思遠親視殯葬手種松柏與廬江何昌寓沛郡劉璠上
表理之事感朝廷景素女廢爲庶人思遠分衣食以相資贍年長爲備筭總訪
求素對傾家送遣齊建元初歷竟陵王司徒錄事參軍太子中舍人文惠太子
與竟陵王子良素好士並蒙賞接思遠求出爲遠郡除建安內史長兄思玄卒
思遠友于甚至表乞自解不許及祥日又固陳武帝乃許之仍除中書郎大司
馬諮議詔舉士竟陵王子良薦思遠及吳郡顧暠之陳郡殷叡時邵陵王子貞
爲吳郡除思遠爲吳郡丞以本官行郡事論者以爲得人後拜御史中丞臨海
太守沈昭略贓私思遠依事劾奏明帝及思遠從兄晏昭略叔父文季並請止
之思遠不從案事如故建武中遷吏部郎思遠以晏爲尙書令不欲並居內臺

權要之職上表固讓乃改授司徒左長史初明帝廢立之際思遠謂晏曰兄荷武帝厚恩今一旦贊人如此事彼或可以權計相須未知兄將何以自立及此引決猶可保全門戶不失後名晏曰方噉粥未暇此事及拜驃騎會子弟謂思遠兄思徵曰隆昌之末阿戎勸吾自裁若用其語豈有今日思遠遽應曰如阿戎所見猶未晚也晏既不能謙退位處朝端事多專斷內外要職並用門生帝外迹甚美內相疑異思遠謂曰時事稍異兄覺不凡人多拙於自謀而巧於謀人晏默然不答思遠退後晏方歎曰天下人遂勸人自殺旬日晏及禍明帝後知思遠有此言謂江祐曰王晏早用思遠語當不至此思遠立身簡潔諸客有詣己者覘知衣服垢穢方便不前形儀新楚乃與促膝雖然及去之後猶令二人交帚拂其坐處明帝從祖弟季敝性甚豪縱使詣思遠令見禮度都水使者季珪之常曰見王思遠終日匡坐不妄言笑簪帽衣領無不整潔便憶丘明士見明士蓬頭散帶終日酣醉吐論從橫唐突卿宰便復憶見思遠言其兩反也上既誅晏思遠遷爲侍中掌優策及起居注卒年四十九贈太常諡曰貞子思

遠與顧暲之善暲之卒後家貧思遠迎其妻子經恤甚至暲之字士明少孤好學有義信位太子中舍人兼尚書左丞

王韶之字休泰胡之從孫而敬弘從祖弟也祖羨之鎮軍掾父偉之少有志尚當世詔命表奏輒手自書寫泰元隆安時事大小悉撰錄位本國郎中令韶之家貧好學嘗三日絕糧而執卷不輟家人謂之曰困窮如此何不耕答曰我常自耕耳父偉之爲烏程令韶之因居縣境好史籍博涉多聞初爲衛將軍謝琰行參軍得父舊書因私撰晉安帝陽秋及成時人謂宜居史職卽除著作佐郎使續後事訖義熙九年善敘事辭論可觀遷尚書祠部郎晉帝自孝武以來常居內殿武官主書於中通呈以省官一人管詔誥住西省因謂之西省郎傅亮羊徽相代在職義興十一年宋武帝以韶之博學有文辭補通直郎領西省事轉中書侍郎晉安帝之崩武帝使韶之與帝左右密加酖毒恭帝卽位遷黃門侍郎領著作西省如故凡諸詔黃皆其辭也武帝受命加驍騎將軍黃門如故西省職解復掌宋書坐璽制謬誤免黃門事在謝晦傳韶之爲晉史序王珣貨

殖王厥作亂珣子弘厥子華並貴顯韶之懼爲所陷深附結徐羨之傅亮等少帝卽位遷侍中出爲吳郡太守羨之被誅王弘入相領揚州刺史弘雖與韶之不絕諸弟未相識者皆不復往來韶之在郡常慮爲弘所繩夙夜勤勵政績甚美弘亦抑其私憾文帝兩嘉之韶之稱爲良守徵爲祠部尙書加給事中坐去郡長取送故免官後爲吳興太守卒撰孝傳三卷文集行於世宋廟歌辭韶之所制也子曄位臨賀太守

王悅之字少明晉右軍將軍羲之曾孫也祖獻之中書令父靖之司徒左長史爲劉穆之所厚就穆之求侍中如此非一穆之曰卿若不求久自得之遂不果悅之少厲清操亮直有風檢爲吏部郎隣省有會同者遺悅之餅一甌辭不受曰此誠費小然少來不願當之宋明帝泰始中爲黃門郎御史中丞上以其廉介賜良田五頃以爲侍中在門下盡其心力掌檢校御府太官太醫諸署時承奢汰之後姦竊者衆悅之按覆無所避得姦巧甚多於是衆署共呪詛悅之病甚恆見兩烏衣人捶之及卒上乃收典掌者十許人桎梏之送淮陰密令度瓜

步江投之中流

王准之字元魯晉尚書僕射彬玄孫也曾祖彪之位尚書令祖臨之父納之並御史中丞彪之博聞多識練悉朝儀自是家世相傳並諳江左舊事緘之青箱世謂之王氏青箱學准之兼明禮傳贍於文辭桓玄篡位以爲尚書祠部郎宋武帝起兵爲太尉主簿出爲山陰令有能名預討盧循功封都亭侯宋臺建除御史中丞爲百僚所憚自彪之至准之四世居此職准之嘗作五言詩范泰嘲之卿唯解彈事耳准之正色答猶差卿世載雄狐坐世子左衛率謝靈運殺人舉免官武帝受命拜黃門侍郎永初中奏曰鄭玄注禮三年之喪二十七月而吉古今學者多謂得禮之宜晉初用王肅議祥禫共月故二十五月而除遂以爲制江左以來準晉朝施用搢紳之士多遵玄義夫先王制禮以大順羣心喪也寧戚著自前經今大宋開泰品物遂理愚謂宜同卽物情以玄義爲制朝野一禮則家無殊俗從之元嘉中歷位侍中都官尚書改領吏部出爲丹陽尹准之究識舊儀問無不對時大將軍彭城王義康錄尚書事每歎曰何須高論

玄虛正得如王准之兩三人天下便足然寡風素情愎急不爲時流所重撰儀注咸見遵用卒贈太常子輿之征虜主簿輿之子進之仕齊位給事黃門侍郎扶風太守梁武帝之舉兵也所在響應隣郡多請進之同遣脩謁進之曰非吾志也竟不行武帝嘉之梁臺建歷尙書左丞廣平天門二郡太守左衛將軍封建寧公進之子清位散騎常侍金紫光祿大夫鎮東府長史新野東陽二郡太守安南將軍封中盧公承聖末陳武帝殺太尉王僧辯遣文帝攻僧辯壻杜龕龕告難於清引兵援龕大敗陳文帝於吳興追奔至晉陵時廣州刺史歐陽顓亦同清援龕中更改異殺清而歸陳武帝子猛

猛字世雄本名勇五歲而父清遇害陳文帝軍度浙江訪之將加夷滅母韋氏攜之遁于會稽遂免及長勤學不倦博涉經史兼習孫吳兵法以父遇酷終文帝之世不聽音樂蔬食布衣以喪禮自處宣帝立乃始求位太建初釋褐鄱陽王府中兵參軍再遷永陽王府錄事參軍猛慷慨常慕功名先是上疏陳安邊拓境之策甚見嘉納至是詔隨大都督吳明徹略地以軍功封應陽縣子累遷

太子右衛率徙晉陵太守威惠兼舉姦盜屏跡富商野次云以付王府君郡人歌之以比漢之趙廣漢至德初徵爲左驍騎將軍加散騎常侍深見信重時孔範施文慶等並相與比周害其梗直議將出之而未有便會廣州刺史馬靖不受徵乃除猛都督東衡州刺史領始興內史與廣州刺史陳方慶共取靖猛至卽禽靖送建鄴進爵爲公加先勝將軍平越中郎將大都督發廣桂等二十州兵討嶺外荒梗所至皆平禎明二年詔授鎮南大將軍都督二十四州諸軍事尋命徙鎮廣州未之鎮而隋師濟江猛總督所部赴援時廣州刺史臨汝侯方慶西衡州刺史衡陽王伯信並隸猛督府各觀望不至猛使高州刺史戴智烈清遠太守曾孝遠各以輕兵就斬之而發其兵及聞臺城不守乃舉哀素服藉藁不食歎曰申包胥獨何人哉因勒兵緣江拒守以固誠節及審後主不死乃遣其部將辛昉馳驛赴京師歸款隋文帝大悅謂昉曰猛懷其舊主送故情深卽是我之誠臣保守一方不勞兵甲又是我之功臣卽日拜昉開府儀同三司仍詔猛與行軍總管韋洸便留嶺表經略猛母妻子先留建鄴因隨後主入京

詔賜宅及什物甚厚別賚物一千段及遣璽書勞猛仍討平山越馳驛奏聞時文帝幸河東會猛使至大悅楊素賀因曰昔漢武此地聞喜用改縣名王猛今者告捷遠符前事於是又降璽書褒賞以其長子繕爲開府儀同三司猛尋卒於廣州文帝聞而痛之遣使弔祭贈上開府儀同三司封歸仁縣公命其子繕襲仍授普州刺史仁壽元年繕弟續表陳猛志求葬關中詔許之仍贈使持節大將軍宋州刺史三州諸軍事諡曰成納之弟瓌之字道茂位司空諮議參軍瓌之子逡之

逡之字宣約少禮學博聞仕宋位吳令昇明末尚書右僕射王儉重儒術逡之以著作郎兼尚書左丞參定齊國儀禮初儉撰古今喪服集記逡之難儉十一條更撰世行五卷國學久廢齊建元二年逡之先上表立學轉國子博士又兼著作永明起居注後位南康相光祿大夫加給事中逡之率素衣裳不澣几案塵黑年老手不釋卷建武二年卒從弟珪之位長水校尉撰齊職儀永明九年其子中軍參軍顥啓上其書凡五十卷詔付祕閣

素字休業彬五世孫而逡之族子也高祖翹之晉光祿大夫曾祖望之祖泰之並不仕父元弘位平固令素少有志行家貧母老隱居不仕宋孝建大明泰始中屢徵不就聲譽甚高山中有蛟清長聽之使人不厭而其形甚醜素乃爲蛟賦以自况卒年五十四

論曰昔晉初度江王導卜其家世郭璞云淮流竭王氏滅觀夫晉氏以來諸王冠冕不替蓋亦人倫所得豈唯世祿之所傳乎及于陳亡之年淮流實竭曩時人物掃地盡矣斯乃興亡之兆已有前定天之所廢豈智識之所謀乎

南史卷二十四

南史卷二十四考證

王延之傳卽救材官爲起三間齋屋○材監本誤校今从各本改

王鎮之傳晉司州刺史胡之之從孫○孫監本誤祖今訂正

王思遠傳與廬江何昌寓沛郡劉璉上表理之○寓監本訛寓今改正

南史卷二十四考證